

APOSORO

QARU ABIHO ISERE

Ttotta Ruka qeeteta
Roma Nagapa
Tii 62 (?)

Abi Mina Tteopiro
Ttoroa Nagapa (?)

QAHEUBA SUMASAHO NARU (*Ruk 24:48-49*)

1 ¹O Tteopiro, abi mina name, Dzoobe:
Ana bosata pepa niiho quba qeeteta oi Dzesui sohoroqi quba eete
qaata ma banaite qaata oho isereke ana niiho quba qeeteta.

²Qate noi qusuta peitare boohiqi noo tatanga nomeke Tumakhameto
pobi hiireta ma Qaheuba Sumasa nokoho quba dzoobidzakoiqi hiireta.
³Oonihe noi sama eehaha nome nokoke banaitomi qupadzomata.
Qu padzomami noi Ohongaho pobi qesaqesa noko pobi hiire paanaite
qaami bodza pooti naateta.

⁴Ma oho bodza teeta nokoi Dzesuke saridze oomi noi hiireta, Nike
eto Dzerusaremu nagapake qaateqi tee ma teeta tuumainohe ota
gama susupu ttutturate Maiho naru tatangaho bebe eesuma ana nike
pobi hiireta oi meenoma naataridzoni. ⁵Oi Dzohane noio obama abi
sooro qaata oonihe bodza ao dzamoqa naasuhiiimi ana naamae nikeke
Sumasama soobakoiqi hiireta.

⁶Oonihe bodza teeta nokoi totoho eranomata Dzesuke qasa hiireta,
Soopara naname, nii Isirae abi nanaho bosa qobaqobai ao bodzaqarata
ibo napame Romake suqobidzaqu mae?

⁷Hiiremi noi erake hiireta, Nikei oho bodza ma sau qu padzomaquho
isaki baamu oonihe oke Mai noqeke quba oonoma gesina naate
oorai. ⁸Oonihe hiibi, Qaheuba Sumasa nikehota gaibaqa nike

beedzaenomaitemake oionita nike ao sohoroqa oko ma boto tupu naho Dzerusaremuta oorai ma Dzuttea habana oorai ma Samaria habana oorai ma haba samaneta oorai nokohota naho noo ma sinabidza mekeqoma hiire paanaitemi kata gamaqi habaho moirata soobeqomakoi. Oiqi Dzesu hiireta.

KIRISTU QUSUHO ISAKITA PEITETA (Mar 16:19-20; Ruk 24:50-53)

⁹Ma Dzesui quba oonomaho pobike Qaru Abi nokoke pobi hiireqi bodza ooqata keke nokoho nese ma pengata adzahaha naate, qusuta peitemi nokoi moohimi perettabi ao noke sengi eeteta.

¹⁰Ma nokoi nese dzoobireqi noi qusute bamu naatetaho tekake moohimi abi eseri sasa khabanomai nokoho bisata qoorota. ¹¹Nopoi hee, O Garirea nena, nike abi naga ikanomai qusuke rittabetorai? Oi Dzesu nike qaate qusuta tuume oonihe tete teena ota paha burisi eetakoi.

QARU ABI DZUTAHO HABARA SARIDZETA

¹²Oiqi nopoii hiiremi Qaru Abi nokoi tora dzapa Oriba ota ooqi burisi eete Dzerusaremuta biranateta oi te kharata ooraranilhe dzuma surenake geemaquho isaki. ¹³Oonita Dzerusaremuta biranateqi suruho nokome ota oora ma qaara eetota nokoi ota sohoroqi pupu hiirota.

Qate abiho dzapa ttari oi Peetoro ma Dzohane ma Dzakopo ma Attereo ma Piripo ma Ttoma ma Battoromeo ma Matteo ma Dzakopo Aripeoho khata ma Siimo Romaho khepidzenoma ma Dzuta Dzakopoho khata.

¹⁴Ma paha Dzesuhu pai ma nomamane noho ma paimane quesama noko gama qupa teenaita pupu baura eetota oke noko ota eete oota.

¹⁵⁻¹⁷Oomi bodza qesa naatemi Peetoro noi abi tupu, dzare nokoho 120, oho bisata qooroqi erake noko pobi hiireta. Dzairamane name, napaho ttarita teei Dzesuke geema mootoqi qaa tupu oke dzeimami nokoi Dzesuke aimata dzapa nohoio Dzuta. Oonihe baura nome oke eeteta oi teebo bahe Qaheuba Sumasa oke agobanipameke Tabitihi toonaitemi geetetaho isaki oi ooqaho quba meenoma naateta. Oiqi hiireta.

¹⁸(Qate mooro. Dzuta noi pasena nomeho ttuma aimo ooma ttoka teeke mai eeteqi ota suma kopidza eete taate qura qohabami ttidza nohoi biranateta. ¹⁹Obetemi oho pobi Dzerusaremuta baami noko ona qaata nokoi nookaqi noo kokometa haba oke Akettamaniqi hiireta, oonihe haba oi Dzutaho kasu ooniqi hiiorai.)

²⁰Oonita Peetoro ipibireqi hee, Aoke Samuho pepata erake hiiremi oorai, Nagapa nohoi agiagi naatare abi teei eto oota ooraino. Ma oi paha teeta hee, Sinabidza baura nohoke isanate maina teei aimaridzoni.

²¹⁻²²Oke hiiremi ooraita Dzesuke Dzohanei obama soorotaho bodza ma Dzesui abiniqake napake qaate peiteta bodza oho nakuta apenei Dzesuma

napamae ttaike oora ma qaara eete baa qaabi abi oonomahota teei paana naateqake abi oio napake hoobire Dzesu qoridzetaho mee hibahiba naataare.

²³Hairemi nokoi abi eserike paanaiteta, oi Sabaho khata Dzosepe (oonihe dzapa temu nohoi Dzusto) qate temuhu dzapai Mattiasi, nopo oioni. ²⁴Ma nopo ke paanaiteqi pupu hiireqi nokoi hiireta, ²⁵O Soopara cupa mohimohi, nii isanate abi eseri nopo noha neta teeke moomi isanatem i ni noke Dzutaho tekata mootomi qaru abihi baura erake Dzuta gaubiretake noi mai eetare.

²⁶Ma oho baabeke noko biiremi oi Mattiasike paanitemi noi qaru abihi ttarita ipibireta.

SUMASAI QARU ABIKE NOONOMAITETA

2 ¹Qate Ingolahoh dzuma ao kharata tuumami bodza pipiti naatemi patta ponabetaquho dzuma naate oomi Peetoro ma kara nokoi gama susupu ttutturateqi tupu teenata oota. ²Oonita qusuta bapamuho qesa husu minanipamu teei biranateqi naga noko oota nokoke suqobireta.

³Suqobiremi noko moohimi Ohongaho too dzadzai nokoho irita biranate qoro soubiremi, ⁴Qaheuba Sumasai nokoke gama qoro teetemi nokoi ao nagapa noo maina painata sinabidza hiireta. Oonihe te sepeke hiibaranihe Sumasa nokoke banaitetaho isakita hiireta.

⁵Oonihe Ohongaho dzaodzaonomaho Dzuta abi qesa Dzerusarem nagapanqaata nokoi qeena ma baana oni. ⁶Oonita bapamuho husu oi nokoho tomata dzuubami nokoi gama baa ttutturateqi abi samanei nookahimi Qaru Abi nokoi noo totoho maina paina nokohonipamuta hiirota oonita minarai hasaqe eeteta.

⁷Ma nokoi hasa hiireqi hiireta, Abinaga erai gama Garirea abi keke. ⁸Oonita nokoi ikanomake eeteqi noo maina paina napahota hiiremi maikhameitoi nookorai?

⁹Napai Pattia ma Meette ma Eera, Mesopottamia ma Dzutea haba nena ma Asia gattiqa ma apoho abi ooni. ¹⁰Pirigia ma Papirai ma Agitta ma Ribia nena ma Kirene nena ma Romana baata abi oi Dzuta abinipamu ma paha nokoho nakuta dzuuboraiho abi. ¹¹Oi paha Kerette abi ma Arabia abi napama teena totoho maina paina napahota Ohongaho baura attinomake noko hiire paanaitorai oiqi hiireta.

¹²Oho totoho maina painata Qaru Abi sinabidza hiiremi abi nokoi houpeu eeteqi qesa pobipobi hiireta, Eria naane obaoba? ¹³Oonita qesai Qaru Abi nokoke sube ma pasena hiireta. Oi nokoi bai oba agiagike muunaqi ruume nooke hiiroraiqi hiireta.

PEETOROI NOO IPI HIRETA

¹⁴Nokoi qepuqepu hiiremi Peetoro noi ttuerebe nokoho bisata qoridze dzaubarike hiireta, O Dzuttea abi ma Dzerusarem oorai abi, dzoobe.

Nikei bage eete toma ttiteqa naho noo nookare. ¹⁵ Saunaba naini kiroko naataamake oorami nanake nike hee, Bai oba nike suqobirorai ooiqi hiire mae? Oi baamu.

¹⁶ Onihe hore noo too abi Dzoerei hiireta oho meeke nike erake moori. ¹⁷ Oi Ohongai noho toota eraiqi hiireta, Anai kebanoke Sumasa name dzoobiremi haba samaneho abike igabire soubirema mutu ma khata nokoi too abiho isakita hiibakoi, ma abi tasu nokoi nese parara eeteqa baku meenomaho qesa mooqa tete qupadzomakoi. ¹⁸ Oonita ana kokora abi ma paimane nameho quba eeteqa Sumasa name dzoobiremi nokoi naho too naate hiibakoi.

¹⁹⁻²⁰ Ma ana nokoke qusuta quba agiagi banaiteqa ttokata mumureho isaki dzoobiremi dzuu biranatem iepa ma dzapunamu ma quba biranatakoi oi etei burisi eetemi cupi sooromi dzasidzai dzuu eetakoi.

Oke eete soubiremi abi nokoi Soopara minake qaupuitaquho bodza ao biranatakoi. ²¹ Biranatem iionita apenei Soopara oho dzapake qiraitaqu nokoke ana qidzaitakoi oiqi Dzoere hiiretanita oho mee era.

²² Hiireqi Peotoroi hee, Oionita Isirae abi, nike toma tiiteqa noo erake nookare. Dzesu Nadzarette nenake Ohongai husi ma painomaitemi noi bisa nikelhota quba nese agiagi ma baura bamenoma samane eete qaami oi Ohongaho mumure naatemi nike te oho ruume naatoraidzara. ²³ Qate nikel abi oonoma Dzesuke teetareiqi noke tuuma abiho botota mootomi hapahapanaitemi baateta.

Oonihe oi teeoh quba bahe Ohongai sauqata qupadzomaqi oho tete braitemi nike qusubaiteta. ²⁴ Oonita Ohongai noke paha qaraqaranomaiteqi baata ma hemeho neta saqorotaho isakita noi ao eehahaho pobi naateqi baatake suqobireta.

²⁵ Nookao, agobake Tabiti noi Dzesuhu too naateqi eraiqi hiireta, Anai moomi Ohonga anake dzaga bobotorai oho isaki oni. Oi noi naho boto pobita ooraimi ana bamu quba teeoh atti eetaqu. ²⁶ Oho qubake ana ttidza qidza eetemi naho too hasahasa hiirorai. Oho qesa sama nahoi bage eete oorakoi.

²⁷ Oi teeoh bamuhe nii gisi nahoke sepeke gaubiremi rubenga naataquho tete bamu oi nii qeseba khata niime anake qaatemi ngausa naataqu oi teqaha ooraidzara. ²⁸ Baamu, nii anake qaraqaraho tete banaitemi ota tuumakoi oi nii anake penganaite qaama qaama anai oho qaki naate qaarakoi oiqi Tabitti Dzesuhoke qeeteqi hiireta.

²⁹ Oonita Peotoroi noo ipibireqi Dzuta abike hee, Qesa ma dzairamane name, uumi napaho Tabiti noi baatemi qurabireta oonita nohoke ana te hiiremi nike nookoraidzara baamu. Napa moomi noho nesetu napahota ooraita noi Dzesuhoke eeteqi hiireta. ³⁰ Oi noi too abi qaaqi Ohonga naru noo tatanga noho irita mootota oi biidza ma suna nohota teei abi mina naatarotaho naru. Oonita Dzesuhu naruke Tabiti qupadzomaqi hiireta.

³¹Noi Kiristuhu hore noo paanaiteqi hee, naho qeseba khatai bamu koseta qaami noho samai ota arinataqu oonihe, baata neta qoridzaqu oho noo hiireta. ³²Oonita Ohongai Dzesuke ao tukuto qoridzemi nana nese nanamema noke moota.

³³Qate noi qoridze peiqi Ohonga maiho boto pobi naate ooraiqi napake naru hiiretaho isakita Sumasa nanaho irita dzoobiremi soororai ma sobasoba ooqake nike poiqa moo nookorai. ³⁴Oi Tabiti teqaha noomae quoluta peitaranita oi te noho noonidzara.

Oonihe Tabiti eraiqi hiireta, Ohonga mai noi Soopara mina nahoke hee, Nii naho boto pobi naateqa erata qobare. ³⁵Qoro qaama ibo abi niihoke anai aimami noko oko toro niihota ttutturate qaarare oke Ohongai Dzesuke pobi hiiremi Tabiti qaupuiteqi hiireta.

³⁶Oonita Peetoroi noo ipibireqi hee, Isirae abi qeena ma baana ma nike gama korabete nookare. Nike Dzesu hapahapanaitemi baateta oonihe noke Ohongai tekata upubiremi noi Kiristu ma Soopara mina napahoke naate oorai. Oiqi Peetoro hiireta.

ABI SAMANE QUPA BURISI EETETA

³⁷Noo oke Peetoroi hiiremi oi nokoho tomata dzubaqi cupa nokohoke kootoromi nokoi Peetoro ma qaru abi qesa minarake pobi hiireta, Dzairamane nana ikanomake eetaqu?

³⁸Hiiremi Peetoroi hee, Nike cupa burisi eete Dzesu Kiristuhu dzapa mai eetare. Mai eeteqi sinabibidzaho sobasobata dzuubami kahosa nikeloh dzamutomi Ohonga mai noi Qaheuba Sumasama nikeloh dzou eete qaarakoi. ³⁹Oi nikeloh keke bahe eemane khameto ma abi kharana oorai minarama nikeloh Ohonga Soopara napahoi ao Qaheuba Sumasaho pobi hiiremi oorai.

⁴⁰Ma Peetoroi noo oonomake hiroqi ipibire noko pobi hiireta. Nike abi naga rasakinomake qaateqa baa aimare. ⁴¹Oke hiire qaami apenei Peetoro sinabidza nookami meenoma naateta (oio tiri ttauseni oni kaqa) nokoi sobasoba saridzeqi Qaru abi nokota ipibireta.

NOKOHO OORA MA QAARAI MAINA NAATETA

⁴²Oonihe nokoi gama ota teenaqata oomi, Qaru abi nokoke sinabidza pobi hiire banaitemi bage eete nokomae qaata. Ma teena naateqi dzobadzoba qooto muunaqi pupu baura eete qaata. ⁴³Oonita Qaru abi nokoi quba nese agiagi eetemi mumure naatemi nokoi moo nookami attinoma naateta.

⁴⁴Oonita nooka hisi etaeta abi nokoi tupu teenata oomi quba nokohoi ttaiqa kekeni. ⁴⁵Ma qesa nokoi quba tongo ma qubabosa nokome ttuma quba mootomi oma biranahimi quesamanei patta ma qubaho dzore qaata nokohoi quba isakiqata batabire moite qaata.

⁴⁶Qate cupi samane noko Ohongaho biirita ttutturate qupa teena eete qaaqi, burisi eete naga nokometa patta qooto muuna qaaqi muuna ma aim aqida eete qaata. ⁴⁷Oi noko Ohongaho hasa hiire qaami abi paha qesai nokohoke nookami bagenoma naate qaata. Ma Ohongai abi sinabidzaho dza minake eete qaata nokoke aimaqi Qaru abiho tuputa ipibiremi qidzanate qaata.

QARU ABI HIIREMI ABI PONE QIDZANATETA

3 ¹⁻²Qate ete aparana naahimi pupu bodza naatemi Peetoro ma Dzohane nopo Ohongaho Biirita peiteta. Oonihe abi pone (paiho amenata pone naate qaata) noke quesamane nohoi bodza samane aim tuuma Biiri pouta mootomi habese qaami nokoi sinabidza guhu ota tuuma ma baaba eesumi noi nokoke ttuma ma qurumaho pupu ma nenesa hiire qaata noio ota habese oota.

³Oonita abi ponei moohimi Peetoro ma Dzohane Biiri nakuta dzuubake boohimi nopo nenesa hiireta. ⁴Hiiremi Peetoro noke moohimi Dzohane paha oke eeteta. Nopoi hee, Maa, nii nese taate nakake moorare.

⁵Hiiremi noi hairiamake erake qupadzomata, nopo quba teeke ana moitareke hiibi.

⁶Hiimi Peetoro hiireta, Maaqa, anai ttuma baamu, siriba baamu. Oonihe quba naho torona oorai oke ana isanate nii moitakoi. Onita Dzesu Kiristu Nadzarette nenaho dzapata nii ao qoori tuumare. ⁷Hiireqi noi noho boto pobita aim aqusubaitemi oko ma sama nohoi tatanga naatemi noi tukuba qorota.

⁸Ma noi nopo gama sinabidza guhuta peiteqi nome tuuma ma baaba eesuhiqi Ohonga hasa ma gegema hiireta. ⁹Oonita noi tuuma ma baaba eesuhiqi Ohongaho dzoobe hiiromi, abi ma paimane nokoi noke mooqi hee, ¹⁰Biiri pou qidzata habese ttuma ma qurumaho nenesa hiire qaapu abi oioni. Oi quba nese agiagi oke mooqi noko hasahaha minanipamuke hiireta.

PEETOROI OHONGAHO BIIRITA SINABIDZA HIIRETA

¹¹Obetemi abi oi Peetoro ma Dzohane nopo soomata oi biirih totaqi suba kharanoma oke hee Soromoho suruhoniqi hiire qaata ota nokoi oomi abi samanei nokoho toro torouma baaqi hasaqua eeteta.

¹²Oke eetemi Peetoro abi tupuke mooqi hiireta, Isirae abinaga, nika naane quba abiqake mooqi oho hasahaha minanipamuke hiiroaidzo? Nike qupadzomami Dzohane ma nakamaeho beedzae isanatorai mae sinabidza nakahoi bagenoma naatemi ooqaho qubake abirai tuuma ma baaba eetorai mae? Oi baamunipamu! ¹³Uimane napaho Abarahamu ma Isaka ma Dzakopo nokoho Ohonga noi khata nome Dzesu Soopara noho beedzaeke abi eraho irita paanaite.

Oonihe Dzesuke nikei ibo eeteqi raaba abi nokohota mootomi Piratoi noke ingonaitare hiiremi nike oho bai hiireta.¹⁴ Dzesui cupa sasarinoma ma rikerikenomanihe nike teqaha noke ingonaitara. Baamu, nike Kiape Piratoke tototo hiireqi taanga abike ingonaitareiqi hiireta.¹⁵ Qate nike Dzesuke baatata mootota oonihe noi qaraqaraho maikhantanita noke Ohonga baata neta eehahaitemi qoridzetake nana nese nanamema mooqorai.

¹⁶ Oonita abi erai Dzesuho dzapake nookaqi hiisi eeteqi dzapa nohota paha qidzanate. Oi abi nike moo nookahimi noomaeho ai tataumai isanatemti Dzesuho beedzae noho irita dzuubami noho sama pobirate.

¹⁷ Peetoroi hee, Qateqa, Qesamane obera name, Ana qupadzomami bosa qobaqoba nikoho ma nikeli ruume nikemaeho isakita oke eetepu.¹⁸ Oonihe Kiristui heme oonomake aimarotake Ohongai hiireqi oho nooke too abi nomeho toota hiire paanaitemi biranateta tete ooqake Ohonga biraitemi nike qusubaiteqi oonoma eetepu.

¹⁹ Oho quba nike cupa burisi eeteqa oora ma qaara qanqa nikeme tume biiremi honga ma kahosa nikehoke Ohongai dzamutakoi. Oke eeteqake Soopara mina napahoi nike khakhope biirorakoi.

²⁰ Oonihe Khakhope biiroraquho khooba erani: Kiristuke Ohongai agobake uhutota. Oonihe too abi noho too naateqi hee,²¹ Kiristuke qusuta qaanatemti quba samaneke roibete isanatemake Dzesuke ana ttokata dzoobiremi paana naatakoiqi hiireta, khooba oioni.

²² Peetoroi hee, Ohongai Moseke qupanomaitemi noi abike hee, Ohongai anake upubiremi anai too abi nohonihe, naho temuke noi dzairamane nikoho neta teeke uhuto upubiremi nike noho too qusubaite soubidzare.²³ Oonihe teei noke qusubaitaama naataquko noke rubengaitemi abihota bamu naatakoi.²⁴⁻²⁶ Oiqi Mosei agobake hiireta oonihe Samue ma too abi samane nokoi noo teena oke hiire baaorai.

Oi Ohongai naru oke Abarahamu ma ttari nohoke moiteqi eraqi hiireta, Niiho sooro ma sainata ttoka minaraho abi nokoi oho agoago saridzakoi. Oiqi hiiretanita nikeli naru noo oho eemane khameto oomi Ohongai qaheuba qaru khata nome ai upubireqi noke bosata nikoho quba dzoobiremi noi nikoho cupa burisi eetemi sasari naataridzo — agoago oioni. Oho qubake nike koirikairi nikemeho isaki sigita biiremake noi nikeli agoago oke eetakoi, khooba oioni. Oiqi Peetoroi hiireta.

PEETORO MA DZOHANEKE SUTASUTATA MOOTOTA

4 ¹Oke Peetoroi hiireqi Dzohane ma nopo abi noo pobi hiiromi sinabidzaho soopara mimi ma Satukeo nokoi biirilo piritannihi pobipobi abima noko nopoho torota biranateta.² Oi nopo noo ma sinabidza oke abi tupuke pobi hiireqi Dzesu baata neta eehaha naate qoridzetaho noo oke hiimi abi mimi nokoi oke nookami qanganateta.

³Qanganatemi nokoi nopoake aima suutotanihe ao sure mootomi nokoi iihaihoke qupadzomaqi nopoake sutasuta nagata mootota. ⁴Oonihe biirita abi samane sinabidza noo nookaqi hiisi eeteta abi nokoho dzare paipu ttauseni naateta.

SINASINA TUPUI QARU ABIKE NOOTA MOOTOTA

⁵⁻⁶Obetemi iihai mootomi abi mimi ma hobihobi ma sinabidza soopara mina nokoi gama Dzerusaremuta ttutturateta. Oi Dzube abi mina Anasi ma Kaipa ma Dzohane (noi abi maina) ma Aresatte nokoi gama Dzube abi mimihi quni ma mani keke. Oonita noko hiiremi qaru abi eseri oke aima garuba nokoho bisata mootota. ⁷Mootoqi qasa hiireta, Apeho beedzae ma dzapata nipei obaoba oke eeteo?

⁸Oke hiiremi Qaheuba Sumasai Peetoroke sahurunomaitemi noi erake hiireta, Abi mimi ma abiho bosa qobaqoba name nookare. ⁹Nike nakeke hee, Apei nipeho husi ma pai naatemi nipei abi pone erake kokora eeteiqi hiire.

¹⁰Oonita ana hiire paanaitemi Isirae abi ma nike gama susupu nookare. Dzesu Kiristu Nadzarette nagapa nenake nikey hapahapata teetemi baateta noke Ohongai baata neta tukuto eehahaitemi qori oorai noqaho beedzaeho qubake abi erai sama ma sasa qidza eeteqi oorai.

¹¹Oonita nike naga gosogoso abiho isaki ooqi Dzesu oma oonomaho bai hiireta oonihe noi ao naga oho ttittira naate oorai. ¹²Ma napa paha maina teevo dzapata qidzanataqu oho tete te ooraidzara, baamu.

¹³Hiremi nokoi Peetoro ma Dzohaneke moohimi nopoai abi sepe nokanoka guhuuzuubaamaho isaki oonihe nopoai too ananama noo hiiremi abi moo nookami nokoi bosata Dzesuma qaata oonita nokoi oho hasa hiireqi iha ma dzoobidza eeteta. ¹⁴Oonihe abi ponei qaata noi nopolma noko qoro oomi nokoi mooqi tee ma teeke hiiba quba bitta eeteta. ¹⁵Bitta eeteqi nokoi nokoke iihami tta eete naga patita oomi nokomae keke dzahe gunugunu hiireta. ¹⁶Nokoi hee, Napa nopoake ikanomake eetaqu? Nopo ao quba eetemi oho pobi Dzerusaremuna oorai nokoi ago nookami Ohongaho mumure naate oorai. Oho qubake ikaqi oke gimutta eetaqu?

¹⁷Oonine eto noo erai ango abiho otoba patita dzuubami nooka tani naatainoho quba napa nopoake qamuni hiireqa hee, Eetoqa Dzusuho dzapake ipita abike pobi hiibainoqi hiibare. ¹⁸Oiqi hiireta. Oonita nokoi Dzohane ma Peetoro quba hiiremi baami nopoake dzoobidzareiqi noo tatanga hiireqi hiireta, Eetoqa Dzesuho dzapake abi pobi hiibainonipamu!

¹⁹Oonihe Peetoro ma Dzohane erake noko pobi hiireta, Nikeho nooke qusubaiteqa Ohongaho nooke qaatareiqi nike hiibi mae? ²⁰Oonihe nanai quba moo qaabi ma nooka hiire qaabi oke qaataquho isaki baamunipamu.

²¹⁻²²Oke hiiremi Dzuta abi mimi nokoi ao nopoake eheitarota. Oonihe abi pone oho tii bodza 40 naatemi obaoba oke noho irita eetemi abihota

bagenoma naateta. Oho qubake Dzuta abi mimi hee, Eto abi minarai oho nookami qanganatainoinqi hiiretanita nopo kee ma teeke eetaquho tete bamu naatemi nokoi nopo kee paha qaupasasa gaamaqi dzoobiremi tuumata.

SINABIDZA HIIBAQUHO BEEDZAE QUBA PUPU HIIRETA

²³Oonita nopo kee saaqorom i nopo kee qesamane nopo meho toro biranateqi abi mimi ma bosa qobaqoba nokoi noo ikanoma hiireta isere oke qesamane nopo kee gama pobi hiire soubireta.

²⁴Hiiremi nookaqi noko totoho nokome teenaite qusubaiteqi Ohongaho toro pupu hiireqi hiireta, O agoago khata teena. Nii qusu ma ttoka ma besa oke nii khooba nokohoma gama mooto soubireta. ²⁵Oke eetetai Qaheuba Sumasa dzoobiremi noi uumi nanaho Tabiti qaru khata niihoho too adzahahaitemi noi eraiqi hiireta, Abi soropurunoma nokoi naane quba dzauba eetora? Ma abi nokoi naane quba noo sepesapeke qupadzomorai? ²⁶Oi ttokaho abi qiba nokoi ttarita qooromi bosa qobaqoba nokoi oho qesa ttuttureteqi nokoma gama Ohonga ma Kiristu nopho ibo eeteqi basesa eetora. Oiqi Ttabitti hiireta.

²⁷Oonita meenipake nagapa eraho abi nokoi qaheuba khata Dzesu apeke Ohonga nii upubireta noke nokoi ibo eeteqi Herote ma Pottio Pirato nopo ma raaba abi ma Isirae abi ma noko gamaqa noo teenaiteta. ²⁸Oonihe niimaeho boto ma too niihohi hiiretaho isakiqata noko eetora.

²⁹Oonita Ohonga niimae moomi nokoi qaupasasa gaamami attinoma naatarorihe iboho isaki oke nii rasaki eeteqi qaru khameto niime beedzae moitemi nokoi too ananama niiho sinabidza hiire qaari oke paanaite qaarare. ³⁰Oke eesuhima niimae boto dzoobiremi abiho sama ma sasa qidzanatorare ma quba nese agiagi biranatem i mumure naatorare. Oonihe oi gama qaheuba khata niihohi, Kiristuho dzapata biranate qaarare.

³¹Oiqi hiire pupu hiimi naga nokoi oota oi ngungudza eesuhima Qaheuba Sumasa nokoho qupake qanoqanonomaitemi sinabidza oke noko beedzaema hiire qaata.

SINABIDZAHO ABI TUPUI QUPA TEENA KEKE

³²Obetemi sinabidza qusubaitetaho tupu mokoi quba samane nokome gama mootoqi ttaike aimaa qaata ma ipibidza ma hongasidza mekeqoma eete qaata. Nokoi quba niiho naaho hiibaamake teenaite aimaa qaata. ³³Ma Qaru abi nokoi Dzesu Kiristu baata neta qoridzetaho noo hiire qaami mee nokoi minanipamu naatemi abi minarai dzoobe ma kanakanaho isakinipamuta qaata.

³⁴Ma bisa nokohota teei teqaha sepeke qaarara. Quba tongo ma qubabosa, guhu ma naga, dzoo ma hoo oi qaami oke noko oma quba hiiremi biranatem oke ³⁵Qaru abi moitemi pattabete abi oooh dzoreke isakiqata moite qaata.

³⁶Qate abi teei qaata dzapa noho Dzosepe noke Qaru abi paha dzapa moiteta oi Banabe (dzapa nohoho khoobai ttapuita khata) noi Reebiho eema. Kusu Kipuro nena. ³⁷Noi oho qesa eeteqi quba tongo nome oho ttuma quba hiiremi biranatemi noi oke gama aima Qaru abiho dzagata mooto soubireta.

ANANIA MA SAPIRAHO IKOIKO

5 ¹⁻²Oonihe abi teevo dzapa Anania ma ata noho Sapira nopo i ttoka nopo me tteke ttuma quba hiiremi biranatemi qesai oma gama Qaru abi moitetaho isaki bahe nopo mae qesa naru hiireqi seike oma koko teevo nopo me quba qaateqi koko temuke noi aima Qaru abiho dzagata mooto i hee, oqaioniqi hiireta.

³Oke hiiremi Peetoro i hee, Anania nii naane qubake Saatai niiho qupa rasaki eetemi Qaheuba Sumasake ikobeteqi ttoka ma haba niimeho ttuma koko qahitotoraidzo? ⁴Ttoka ma haba niihoho koko teevo oorareiqa oorakoi. Mae nipe oho ttuma quba hiiremi oma biranatemi ooma nipe quba teevo ma teevo eetarorihe, naane qubake qupa niihoi niike ikobetemi nii oke eeteo? Nii abi nanake bahe Ohongake ikobetareqi hee, Ttuma paha teevo te ooraidzaraniqi hiiret hee o bamenoma!

⁵Hiiremi Anania noi noo oke nookahiqi taate baateta. Obetemi qesai moo nookata nokoi atti minanipamuke eeteta. ⁶Qate abi khameto nokoi Ananiaho kebake aimat tuuma ao qurabireta.

⁷Obetemi bodza khara naataamake ata nohoi noka pobitaamake teka teena ota biranateta. ⁸Biranatemi Peetoro noke qasa hiireqi hee, Ttokaho ttuma oqaioni mae? Nii ana pobi hiibare, Hiiremi noi hee, Oore oqaioni.

⁹Hiiremi Peetoro erake no pobi hiireta, Apu ma nipei naane qubake Ohongaho Sumasa ikobetareqi erake eete? Oionita moorare, abi khameto apu niihoke ai tuuma qurabire nokoi burisi eete baahuqi naga pou samata qoro ooraita nokoi paha niiho kebake aimat tuuma qurabidzakoi.

Noi oke hiimi Sapiro i ao oko toro nohota taate baateta. ¹⁰Baatemi abi khameto nokoi keba nohoke aimat tuuma apu noho qurabireta teka teena ota noke qurabireta. ¹¹Obetemi sobasoba tupu nokoi oho pobi nookaqi gama susupu atti ququimaqi qaata.

QARU ABI OHONGAHO OBAOBA EETOTA

¹²Oonita Qaru abi nokoi obaoba ma quba nese agiagi maina painake abiho pengata eetemi noko mooqi teena naate Ohongaho biiri totaqi, dzapa noho Soromoho suruho ota noko ttutturet qaata. ¹³Oonihe abi sigina qesai nokohi ttaiqa naataranihe nokohoke nookami dzapa pobicoma naateta. ¹⁴Qate abi paha qesa samane, oi abi ma paimane tupu minai nooka hiisi eeteqi Ohongata ipibireta.

¹⁵Oke eetemi nokoi qesa ma dzaira nokohi apenei keba ma khetedza naate mee dzeuba qaata, ma pone ma qeqesa naate merameria tekata

mee qaata, nokoke teteta mootomi Peetoroi baa riinimi noho sumusumui nokoke sirihahimi qidzanate qaata. ¹⁶Oke eetemi Dzerusaremu nagapa totaqi ma totaqi abi tupu mina qaata, nokoi gama susupu khetedzanoma ma songena ngiinginoma oke aim aima biranatem i nokoi oho qesa gama qidzanate qaata.

OHONGAHO ANGEROI QARU ABIKE INGONAITETA

¹⁷Qateqa dzube abi mina ma Satukeoho nena nokoi ¹⁸Qaru abiho baurake bisi naateqi Qaru abi mimike aimaqi sutasuta naga minata mootota.

¹⁹Oonihe qupibake Sooparaho angero teei sutasuta naga mina oke kurauma noko dzeima qurateqi hiireta, ²⁰Nikei tuumaqa Ohongaho Biirita peiteqa teka nikemeta qooroqa qaraqara tatangaho kuku ma khooba abike pobi hiiire qaarare.

²¹Hiiremi nokoi tuumaqi Biirita dzuubaqi saunaba samaneke abi ma khata nokoke qusuho qaraqara oho pobi hiireta.

Onihe dzube abi mina ma qesa noho torona oota nokoi sinasina tupu ma Israeho Kanusoreho tupu mina oke gama ttuttuiteqi habeseta. Nokoi hee, Oonita noo dzoobiremi sutasuta nagata oorai qaru abi oke dzeima baabareiqi hiireta. ²²Oonihe pirittani nokoi qeemaqi sutasuta nagake moohimi nokoi bamu naateta. Bamu naatemi noko ao burisi eete oho isere hiireta. ²³Hee, Ae! sutasuta nagaho tete oi sibasibai oori, qate tete soopara abi paha pouta oori. Oonihe nanai tete geema pei moohimi teei te nakuta oorara, baamu!

²⁴Noo oke hiiremi Biirilo soopara ma dzube abi mimi nokoi nookaqi oho iiha ma dzoobidza eeteqi hee, Nokoi ikanomake eeteqi biranate?

²⁵Oke hiiremi teei baaqi hee, Maqa, nikei sutasutata mootota abi naga nokoi qaheuba biirita abi ma khata sinabidza pobi hiirorai. ²⁶Oke hiimi biirilo soopara ma pirittani nokoi tuumaqi motta, Ma nokoi qaru abike urupusa eete aimarotahe eto abi qesai nokomaeke omama teetainoiqi nokoke keba ma dzapata dzeima baata.

²⁷Oonita nokoi Qaru abi oke aim bisa nokometa mootomi dzube abi minai nokoke qasa hiireta. ²⁸Nanai nike Dzesuho dzapake hiiire paanaitainoiqi hiiretake nike naane quba abi bapotopotomi dzapa oi Dzerusaremuta gegebetorai?

²⁹Hiiremi Peetoroi Qesamane nomeho puike naateqi noo ipi erake hiireta. Baamu, nanai abiho nooke qaateqi Ohongaho noo qusubaitorai.

³⁰Nookao, nikei Dzesuke hapahapanaitemi baateta. Noke uimane napahoho Ohonga Mai tukutoqi qaraqara moiteta.

³¹Oi Isirae abi ma napai qupa buiris baura eeteqa kahosa napemeho dzamudzamu saridza qubake Ohongai noke ai qusubaitemi noi bosa qobaqoba ma ingona mai minanipamu napahoke naate oorai. ³²Oonita

nanai nese nanamema quba oke gama mooqi hiiorai, oonihe nanaqeke keke bamuhe apenei Ohongake qusubaitorai nokoma nanake Ohongai Sumasa nome moitemi ooraita nanaio noho noo qaupuitarai. Oiqi hiireta.

QARU ABIKE HESATAINOIQI GAMARIEI HIRETA

³³Hiiremi noko noo oke nookami nokoho dzauba peitemi Qaru abi oke teetareiqi hiireta. ³⁴Oonihe Kaunsoriho tupu ota Sattukeo abi keke bahe paha Pariseoho abi teei oota, dzapa noho Gamarie, noi hu nooho sinasina abinipamu, noho dzapake abi qusubaite qaata oonita noi Qaru abi nokoke hee, Nikei paata qurateqa oorareqa teeke eetare.

³⁵Noi oke hiiremi Qaru abi nokoi paata quratemi abi oi quesamane nomeke erake pobi hiireta. Isiraeho maimane nookao. Abinaga erake quba teeke eetareiqi iihā dzoobireqake eetare. ³⁶Bosata abi teei qaata dzapa noho Teuta, noi hee, Anai abi ohonga, bosa qobaqoba nokohoniqi hiiremi abi 400 nohota ipibireta. Obetemi Roma abi noke teetemi oko ma bodo noho sakabami oho noo bamu naateta.

³⁷Qate noho ipiqata Garirea habaho abi teei qaata, dzapa noho Dzuta (oi abi maina). Noi dzapa qetaqeta bodza napahota abi quesake ikobeteqi dzeima qaatahe noi oho qesa bamu naatemi noho oko ma bodo gama sakabaqi baamu naateta. ³⁸Oonita quba oonoma biranate qaimi ana nike pobi hiiire nookare. Nike abinaga erake qaatemi noko sepeke oorare.

Nokoi noo ma baura mina erake eetorai oi noko qupa nokomete eetoraquko oi rasakinoma naatakoi. ³⁹Oonihe Onongaho baurai ooraquko nike nokoke suqobidzaquho isakiama naatakoi ma Ohongaho baurai ooraquko nike Ohongake ibo eetakoita nookare, ooiqi hiireta.

QARU ABI OHO MIDZA BAHE QAKI NAATETA

⁴⁰Oke hiiremi nokoi qaru abi nokoho quba hiiremi garubata peitemi gouma teeteqi erake hiireta. Nike Dzesuho dzapake abi pobi hiibainoipi hiireqi dzoobireta. ⁴¹Dzoobiremi nokoi Dzesuho dzapaho quba heme saridzetaho midza te eetaranihe ohongahonga naateta.

⁴²Oke eeteqi noko bodza ma sau samane Dzesuke Kiristu ooniqi hiireqi oho noo ma sinabidza Biirita hiire qaata. Oho qesa naga nokome ma nokomete nokoi hiiire qaata.

QARU ABIHO HOBIHOBI SEBENIKE UHUTOTA

6 ¹Bodza ota sinabidzaho abi tupu gaira naatemi noko patta ttihu biire qaami Girikiho noonoma nokoi qesa Heboroho noota hiire qaata nokoke hee, Nikei naane quba nanaho ttarumike qaateqi ooraidzo? ²Oke hiiremi Qaru abi mimi nokoi abi ttuttuiteqi hiireta, Nanamae Ohongaho baura qaateqa samaho ttihu biidzaqu oi baamu isanataqu. Oonita nikeho neta abi sebenike oho baura quba paanaitare.

³Oonihe abi nokanoka, Sumasanoma oomake nike batabireqi napai nokoke oho baura moitemi eetorare. ⁴Qate nanaio bodza nanameta pupu ma sinabidza baura oke eete qaarakoi.

⁵Noo oke Qaru abi mimi hiiremi minarai nookami isanatem i nokoi abi erake paanaiteta: oi Setepano (abi nooka hiisi eetanoma, Qaheuba Sumasa noho qupata heuheu eete qaata) ma Piripo ma Porokoro ma Nikano ma Ttimo ma Pamena ma Nikora (noi Attiokhia nagapa nena raaba abi Dzuta abihota ipibireta). ⁶Nokoqake uhutoqi nokoke Qaru abiho dzagata mootomi noko qiba nokohota boto mootoqi agoago eeteta.

SETEPANOKE DZUTA ABI QOMAQOMA HIRETA

⁷Obetemi Ohongaho sinabidza kata gaamami Dzerusaremata abi tupu minanipamu naateta. Paha dzube abihota minanipamui sinabidza nooka tani naateta. ⁸Qate Setepanoke abi nookami bagenoma beedzae minanoma noi abiho bisata quba nese agiagi eete qaami subesubeho isaki naate qaata.

⁹Oonihe abi tupu nokanoka naga teeho nena naga oke hee Saqosaqo abiniqi hiire qaata, oho neta Kirena abi ma Aresatteria abi ma Kirikia abi ma Asia gattiqaho abi oi teena naateqi Setepano ma noko qesa kurebete qaata. ¹⁰Oonihe noo oke noi Sumasama hiiremi nokanokanomanipamu naatemi nokoho noo asaqobami bitta eete qaateta.

¹¹Oonihe nokoi noho qore ma geema hiibareiqi abi qesa uhutomi nokoi hee, Abi oi Mose ma Ohongake dzakidzake eetoraiqi hiiremi nana nooke. ¹²Oke hiireqi nokoi abi sepe ma Dzuta abi mimi ma qetaqeta abi quesake bitta ma kaka eetemi nokoi Setepanoho qaa mootoqi aimasinasina abi mimihi nagata tuumata.

¹³Oonihe ao noo suutoqi quesamane moitemi aimasinasina oota noko oke hiiremi Setepanoho obera noo erake hiireta, Abi oi hapaho qahueuba biiri ma hu noo napahoke qangake keke hiiremi nanai nookorai. ¹⁴Noi hee, Dzesu Nadzarette ho nenai nagapa erake ngausa eeteqa tete Mose napaho quba hiire paanaiteta oke rasaki eetakoi noo oonomake hirorai. ¹⁵Oonihe aimasinasina tuputa oota nokoi gama moohimi Setepanohi angero midza ma attiamaho isakita oota.

SETEPANOI SINASINA TUPUKE SINABIDZA HIRETA

7 ¹Oonita dzube abi mina noi erake hiireta, Oi noo mee ooni mae?

²Hiiremi Setepano noi eraiqi hiireta, Maimane ma dzairamane name nike nookare. Napaho eebobo Abrahamu noi Harani nagapa Mesopotamia habata qaami Ohongaho totoho noho toro biranateqi hiireta, ³Nii poike haba khooba ma nagapa qiba niime qaateqa haba anai niiho quba hiire oorai ota tuuma qaarare.

⁴Hiiremi Abarahamu noi noo oke nookaqi Kharattea haba nome qaateqi Harani nagapata tuumami mai noho baatemi Ohongai haba nike

ma napai maikhameto naate oorai erata dzeima baata.⁵ Dzeima baaqi haba koko teeqake noi teqaha noke moitara, baamuhe Abarahamui biidzaamake ooqi ipita eemane khameo nomema gama mai eetarotaho naruqake Ohongai hiireta.

⁶ Ohongai tete erake noke pobi hiireta. Biidza ma khata niiho nokoi haba kharata tuumaqa dzore ma aabeho isakita gaama haba oho maikhametoi nokoke sesero eete qaamake tii 400 naatakoi.⁷ Oonihe tii 400 naatemade haba oho maikhameto apenei sutasuta baura moitoraqu nokoke ana ipi moitakoi oiqi Ohongai hiireta. Noi hee, Nokoke ipi moitemi biidza ma khata niihoi saqosaqo naateqake biranate haba erata baaqa anaho qaru eete qaarakoi.

⁸ Qate Ohongai sama geebaho noo Abarahamuke moitemi qusubaite qaata. Oonita Ohonga hiiretaho isakita khata noho biranate qupi⁸ naatemi noke geebanomaiteta. Geebanomaitemi Isaka noi bitoto qaaqi ipita Dzakopoho mai naateta. Dzakopoi abi tuerebe nokoho mai oio Isirae abiho nase ooni.⁹ Qate neimane napaho nokoi noma nokome Dzosepe biisi naateqi noke ttuma quba mootomi noi Aigitta habata tuumata.

¹⁰ Oonihe Onongai noke gainene eete qaata. Oonita noi qangahasita oomi Ohonga noke hoobiremi Aigittaho abi qiba Parao noi noke moomi noho qupa qidzanipamu naatemi noho dza eeteqi noke minaraho soopara upubiremi haba mina noho ma guhu ma nagapa noho oke noi gama soopara eete qaata.

¹¹ Qate Aittita ma Kana habata seebe mina biranatemne neimane napaho seebe meeqi ttidza uhuba bosasuba qaata.¹² Qaaqi Dzakopo noi nookami Aigitta habata patta oorai hiiremi nookaqi khameo nome dzoobiremi ota tuumata.

¹³ Oonihe bodza temuta Dzosepe noomae nanemane nomeho khooba hiire paanaitemi ota Parao noi Dzosepe biranatetaho khooba gesina naateta.¹⁴ Obetemi Dzosepe hiiremi mai noho Dzakopo noi quba samane nome gama susupu aimaqi nokoi abi ma paimane dzare 75 naateqi Aigitta habata tuumata.

¹⁵ Oonita Dzakopo noi Aigitta habata qaaqi baateta ma khameo noho oi neimane napaho nokoi oho qesa baate baamu naateta.¹⁶ Baatemi noko keba nokohoke aimaqi baaqi Abarahamu noi Sekhemu nagapa Hamoro ma quni ma manihota ttoka teke nesetu quba ttuma eeteta ota nokoi keba nokohoke mootota.

¹⁷ Obetemi Ohonga naru noo Abarahamu pobi hiireta oi kebanonipamuke tataumarota oonita nokoi Aigitta habata minanipamu huba biireta.

¹⁸ Oke eete qaami Aigitta abi qiba usaqe tee biranateta noi Dzosepeho isaki ababara naateta.¹⁹ Noi neimane napahoke eenaiteqi sesero minake eete qaata. Eesuqi khameo bittina teke kebaite qaata.

²⁰Qate kebanoke Mose biranateta. Biranatemi Ohonga nookami noi khata bagenoma oonita pai noke dzasidza tapariho isakita maiho nagata amena moitemi qaata. ²¹Qaami nokoi noke dzukuromi Paraoho khatatai saridzeqi aimami noi noho khata naateta. ²²Eetemi Aigittaho banaita mimi noke noo moite qaami nakanokaho gesina saridzeqi, Aigittaho noo ma baura oho abi mina naateta.

²³Oonihe Mosei qaami tii noho 40 naatemi dzairamane nome Isiraeho abi tupu nokoke moorare qupa nohota tukubami tuumata. ²⁴Tuumoqi noi moohimi Aigitta abi teei Isiraeho teeke oberama eetomi noi qesa nomeke hoobidzareiqi Aigitta abi oke teetemi baateta. ²⁵Oi noi erake qupadzomata, Ohongai anake asatemi ana noho boto naate Isirae abike Paraoho botota karabetareimi Isirae abi nokoi khooba qupadzomaridzoni. Oke hiireqi noi Aigitta abi oke teeteta.

²⁶⁻²⁷Oonihe noho quesamane oke te qupadzomara. Oi iihai mootomi Mosei nokoho toro tuumomi Isirae abi eseri nokomae samai keke temu temuke botoma teetomi noi mooqi hee, Nipe sama teenanihe naane quba qesa teetora? Hiiremi abi qaa sohorota noi hee, Nii nakaho kiapeni, mae apei niike nanaho soopara moote? ²⁸Oonita nii arukuke Aigitta abi teete baateta oho quesake nii anake teetareke hiireo?

²⁹Hiiremi oionita Mosei oho totoho nookami atti noke suqobiremi noi Mittia habata tuumaqi abi agiagihio bisata soomata. Oonihe noi ota ata naatemi khameto noho eseri biranateta.

³⁰Oonita noi ota qaami tii pooti naatemi noi tora Sinaiho khoobata tuumomi ee hoho teei qaitomi oho gabii nakuta Ohongaho angero teei ota biranateta. ³¹Oonihe Mosei hee, Quba apei oke eetorai hiireta, bageke eete moorakoi hiireqi ota qeemomi Sooparahoh totoho ota biranateta. ³²Oi hee, Anaio Abarahamu ma Isaka ma Dzakopoho eebobo ma uimane niihoho Ononga oonita nookare.

Hiiremi Mosei noo oke nooka roqobeteqi subateta. ³³Subatemi Ohongai eraiqi hiireta, Nii ttoka qoore oi Qaheubananita oko sasa niime ao hiumare. ³⁴Oonita abi tupu nahoi Aigittata ooraiqi abiho botota heme saridzeqi tti ma ttaka eete baa qaimi ana poiqa oke suhe hiibaridzoni. Oho quba ana niike dzoobiremi Aigitta habata tuumami ana hiiremi nii abi tupu ota hiumakoi.

³⁵Oiqi Ohongai Moseke pobi hiiretake Setepanoi abi mimi qupanomaiteta. Noi hee, Oonita niki moomi qesai Mose dzaira eetaama naateqi hee, Apei niike kiape ma soopara nanaho uhutotaiqi hiireta. Oonihe Ohongai angero dzoobiremi noi eepa gabii nakuta biranateqi bosa qobaqoba ma ingona maiho baura oke Mose teena mai eetare pobi hiireta. ³⁶Hiiremi noi tuumaqi obaoba samaneke Aigitta habata eetetati noko dzeima baaqi besa dzuunoma ma haba habanata obaoba samane eetemi mumure naate qaami tii paha pooti baamu naateta.

³⁷Oi Mosei keke Isirae abi eraiqi pobi hiireta, Ohonga noomae too abi teeke anaho tomidzake gesamane nikelohoho bisata saridzakoi. ³⁸Oke hiireqi noi keke haba habanata neimane napahoho garubata qaaqi Sinai torata angeroho toota oora ma qaaraho sinasina bamenoma nookaqi oke noko pobi hiireta.

³⁹⁻⁴⁰Hiiremi neimane napaho nokoi Moseho noo bai hiireqi ai siginaiteta. Oi nokoho cupai hee, Ao burisi eete Aigitta habata tuumareiqi hiiremi nokoi Aaro erake pobi hiireta, Maqa! Mose nanake Aigitta habata dzeima baata noi poi tuuma dzaeteta kaqa? Oonita nii gisigisi teeke korabeteemi noi nanaho ohonga naate bosa qooromi nana burisi eete Aigitta habata tuumare.

⁴¹Oke hiiremi Aaro kau gisigisi teeke botoma korabeteqi nokomaeho boto kinisa oho hasahaha hiireqi oho kiridza queereta. ⁴²Oke bohimi Ohongai noko qaatemi qupa nokohoi rasaki naatemi nokoi dzasidza ma pomatti (oi sinabidza Oberaobera) ota qeemaqi soomata.

Oho qubake Amosi too abi nokohota noo qeeteta oi erake hiire oorai, Isirae maikhamento nikelohoho bisata qaaqi kabiraho kiridza mae kiridza qesa oke Ohonga anaho quba queereta mae? ⁴³Eehe, nikelohoho paraika qusubaita qaaqi, paha Repani noho taama gisigisike khakhauma qaata. Quba oonomai Isirae ma nikelohoho ohongaho isaki naatemi noko pupu hiireqi korabete qaabi. Oho qubake anai hiiremake qaa abi nokoi nikelohoho suutoqa dzeima Baberonia nagapata tuumakoi oiqi hiiremi Amosi qeeteta.

⁴⁴Hiireqi Setepanoi Dzuta abi mimike hee, Oonita uimane napahoho sinabidza parai naga haba habanata qaata oho horeke Ohongai bosata Mose banatemi oho isakita gootota. ⁴⁵Obetemi Uimane napaho sinabidza parai suba oke biire biire baa pei qaami, Mose bahe Dzosuba (Dzesuho qaamodzamodza) noi bosa qooromi erata raaba abihi bisata baaqi biranateta.

Biranatemi Ohongai raaba abi iihami uimane napaho haba oke mai eeteqi sinabidza parai suba oke biire qaami Tabiti biranateta.

⁴⁶Biranatemi Ohonga nohoke nookami bagenoma naatemi oho quba noi Dzakopoho Ohonga (Ohonganipamu) noho biiri teeke gootareiqi hiireta. ⁴⁷Oonihe noomae bahe, khata noho Soromo (noi paha Dzesuho qaamodzamodza) noio Ohongaho biiri gootota.

⁴⁸Oonihe Ohongaio qusu ma quba minarahonita abi botoma gootorai naga ota noi ikanomake eete oora ma qaara eetaqu? Baamu. Oho qubake Dzesea too abihi toota noo erake hiireta. ⁴⁹Qusui naho ttube ma ttarakia qaaate ttokai naho basanita naho naga ikanomake gootomake isanataqu? Ma teeka ikanomake korabeteemi ana ota mee qidzanaataqu? Noo oke Soopara napahoi hiireqi hee, ⁵⁰Apeho boto bahe Naamaeho botoi quba erake korabete soubireta. Oiqi Ohongai hiireta.

⁵¹Noo oke Setepano Dzuta abi mimike pobi hiireqi noi hee, Oonita qiba qanganoma nike! Qupa ma toma nikehoi uhubaamanipamu. Oonita neimane nikehoi eete qaata teteke nike iihaqi Qaheuba Sumasake basesa eetoraidzo? ⁵²Oonita too abi samane baa qaata nokohota teena teeke nikeho neimanei ingonaiteta, mae nokoke gama sesero eete qaata? Baamu, nokoke gama sesero eete qaata.

Oi apenei pobipobi ma rikerikeho Maikhata biranatarotaho qaamodzamodzake hiireta nokoke nikeho neimane gama teetemi baateta. Qaaramuti Maikhata noomae biranatemi nikoe geema mootomi teeteta. Nikeio eeteta! Oke Setepanoi nokoke pobi hiireta.

SETEPANOKE MARANGA BIIREMI BAATETA

⁵³Setepanoi ipibireqi Dzuta abi mimike hiimotoqi hiireta, Oonita hu nooke angeroi tooma hiireta oke nike too kakama aimatahe qusubaitaamanipamu ooni! ⁵⁴Noo oke Setepanoi hiiremi nokoho ttidza qosu sahaubami dzauba minake eeteta.

⁵⁵Oonihe Setepano noke Qaheuba Sumasai ao raraku biiremi noi qusuta nese dzoobire Ohongaho dzapa pobi moohimi Abiho Isaki pobita qoroqi oota. ⁵⁶Oke mooqi noi hee, Idze! Qusu papatemi ana moohimi abiho isaki Dzesui Ohongaho boto pobita ooramia ana moori.

⁵⁷Oke hiiremi noko qarutoqi noho noo rasaki eeteqi toma nokome isingi kotoro noke aimahotou hotou biireta. ⁵⁸Nokoi tuuma nagapa tumeta noke omama teetare boohita. Oke boohiqi soopara nokoi sasa khara nokomeke kuimaqi abi eehaha tee, dzapa noho Sauro, noho dzagata tupu biireta. Tupu biireqi Setepanoke omama teeteta.

⁵⁹Oonihe nokoi Setepanoke omama teetomi noi pupu totoho eraiqi hiireta, O Soopara Dzesu, nii gisi nahoke aimare. ⁶⁰Oke hiireqi dzaubama sokateqi eraiqi hiireta. Soopara name, nii kahosa nokoho erake qaatare, oiqi hiireqi baateta. Baatemi Sauro (oi Pauro) noi nookami isanateta.

SAUROI SINABIDZAHO ABI BIKHI BAKHA EETETA

8 ¹⁻³Nokoi Setepanoke omama teetemi baatemi sinabidza abi quesai noho keba qurabireqi tti ma ttaka noho eetota. Oonihe Sauro (oi Pauro) noi beedzae eeteqi sobasobaho abi ma paimane sesero minake eeteqi nagaho isakita peiteqi nokoke aimahotou tuumami sutasutata qaata.

Khooba oho qubake bodza ooqate sinabidzaho abi tupu Dzerusaremu nagapanqaata nokota uuba ma sakaba mina biranatemi nokoi sakabaqi Dzutea ma Saramia habata tuuma tee ma teeta soomaqi qaata. Oonihe Qaru abi mimi nokoqai keke Dzerusaremata qaata.

PIRIPPO MA KARAI SAMARIATA SINABIDZA BAURA EETETA

⁴Oonihe apenei qaaho atti ika ma ikata tuumata noko abike sinabidza pobi hiire tuumata. ⁵Oonita Piripo Samaria habaho nagapa qibata biranateqi Kiristuho noo ma sinabidza nokoho quba hiire paanaite qaata. ⁶Oke eete qaaqi obaoba maina paina eetemi abi tupu minai gamaqa noho noo ma baura quba dzaodzao minanipamuke eeteta.

⁷Oi noi abiho irita songena ngiinginoma samaneke iihami arearema biranate atti tuumata. Paha pone ma qosu samaneke qidzaiteta. ⁸Eetemi nagapa oho abi qakiqaki minake eeteta.

⁹Oonihe nagapa ota abi tee qaata dzapa noho Simona noi sama nome qusubaiteqi hee, Anai minaniqi hiireqi iima ttopo eetemi Samaria abi tupu minai nookami attinoma naate qaata. ¹⁰Eetemi mina ma gattiqi nokoi nohoke nookami mina naatemi eraiqi hiire qaata. Abirai Ohongaho beedzae minanipamuniqi hiireqi hee, Beedzae teeho bahe oioniqi hiire qaata. ¹¹Eetemi noho iima ttopoi nokoke qupa rasakinomaiitemi nokoi bodza kharake nota atima qaata.

¹²Qaami Piripo Ohongaho pobi ma Kiristuho isere qidza hiiremi abi ma paimane gama susupu nooka hiisi eeteqi sinabidzaho sobasoba saridze soubireta. ¹³Saridze soubiremi Simona oho qesa sinabidza nookaqi noomae sobasoba saridzeqi Piripoho dzagata qaata. Qaami Piripo obaoba maina painake eetemi noi mooqi boto gaamaqi qaata.

QARU ABI ESERI SUMASAKE SAMARIATA QAUPUITETA

¹⁴Oionita Samariaho abi ma paimane sinabidza nooka hiisi eetemi oho pobi Dzerusaremota baami Qaru abi nookaqi Peetoro ma Dzohane dzoobiremi ota tuumata. ¹⁵Tuuma biranateqi Samaria abi nokoi Sumasa saridzareiqi pupu hiireta.

¹⁶Oi bosata noko sobasoba saridzetahe Qaheuba Sumasai noko raraku bidzaamake oota oi teeho bahe noko Dzesu Kiristuho dzapa nookaqi obaqaho sobasobake saridzeta. ¹⁷Oonita Qaru abi nopo bato nopolome qiba nokohota mootoqi agoago eetemi Qaheuba Sumasake saridzeta.

¹⁸Qate nopo abi ma paimaneho qibata bato nopolome mootomi Sumasa biranatemti Simonai mooqi baura oonoma saridzare hiireqi noi nopo oho ttuma moitare hiireta, ¹⁹Nipei beedzae oho qesa teeke ana moitemake, ana abi teeho qibata bato name mootomake noi Sumasanoma naatare.

²⁰Hiiremi Peetoro eraiqi hiireta. Maqa, nii Ohongaho kokorake ttuma eetareiqi hiibi mae? Idzii! Nii ao oma niimema rubenga naasuidzo. ²¹Nii Ohongake ikobetareiqi baura eraho ttaiqa naataquho tete baamunipamu!

²²Oho qubake nii rasaki niimeke qaatanipamuke eeteqa Ohongake pupu hiiremi noi qupa qanga niihoke qidzaita mae? ²³Oi ana moohimi nii pasenaho dzoquta ooraimi oho togoi niike igabiremi oorai.

²⁴Oke hiiremi Simonai hee, Oonita nipemae naho quba Ohongaho toro pupu hiiremake ana ingonaitemi quba nipei hiibi oi eetoqa naho irita biranataino. Oiqi hiireta.

²⁵Qate Qaru abi nopoq isere nopome ma Ohongaho noo oke gama abi ma khata pobi hiire tatangaite soubireqi burisi eete Dzerusaremuta tuumata. Oonihe tuusuqi nopoq Samariaho nagapa gamitti samaneke Sinabidza pobi hiire ke tuumata.

PIRIPOI AIGITTA ABIHO SINABIDZA TETE GEEMATA

²⁶Qate Sooparaho angero teei Piripoke eraiqi pobi hiireta, Nii qoridze pobi neta tuusuhiqa Dzerusaremu nagapa robena Gadza nagapana tete quratorai tete oi haba habana oonihe nii ota tuumare. ²⁷Hiiremi Piripoi noo oke qusubaiteqi tuumata.

Qate Ettioipa habata atapa qiba teei qaata, dzapa noho Kattake, Noho kokora abi puniama nokanoka minanoma noi ttuma ma quruma mina nohoke soopara eete qaata. Oonihe noi Dzerusaremu nagapata Ohonga penga bobotare baa peiteta. ²⁸Peiteqi burisi eete karesita habeseqi nagapa nometa tuusuhiqi too abi Dzeseaho pepake isaitota.

²⁹Oke eesuhimi Sumasai Piripoke hee, Nii hairiamake tuuma karesi keerake saridzare. ³⁰Hiiremi Piripo torouma qeema saridze nookami noi too abi Dzeseaho geeta isaitomi noi noke qasa hiireta. Nii noo isaitoraihe oho khooba qupadzomorai mae?

³¹Hiiremi noi hee, Abi teei oho khooba ana pobi hiiremake ana nookareni baamu. Oonita noi Piripoke ota peitareiqi hiiremi pei noma habeseta.

³²Qate noo qetaqeta noi isaitota oi erani. Abi noke sipisipiho isakita aimami nooamake tuumorai, mae sipisipi khata teeke suu geemami nipanatoraiho qesake noi noo amake oota. ³³⁻³⁴Nokoi noke midzata mootomi noi oho quba noo ipi hiibaquho tete baamu naateta. Ma ttokata nokoi qaraqara nohoke geemataho qubake apei ororiba nohoke isaitaqu?

Oho teteta isaiteqi abi mina noi Piripo qasa hiireqi hee, Too abi noi apehoke hiireta, sama nomeke hiiretani mae apeke hiireta? Oho khoobake nii hiire ana nookare. ³⁵Hiiremi Piripoi too abiho noota ipibireqi Dzesuho isere qidza no pobi hiiremi nookata.

³⁶Oke nopo hiire tuuma qaramuti obata biranateta. Biranateqi abi minai hiireta, Moora, oba ooraita ana sobasoba quba hiiremi nii isanate anake obama soobaqu mae? ³⁷Hiiremi Piripoi hee, Anai noo nii pobi hiibi oke nii qupa susupu niimema nooka hiisi eetaquko oke eetakoi. Hiiremi noi hee, Dzesu Kiristu Ohongaho khata oke ana qupa susupu namema ai tataume. ³⁸Oke hiireqi Piripo ma abi mina nopoq ota karesi qaateqi obata qurateqi Piripoi obama noke soorota.

³⁹Obeteqi nopoq oba neta baa peihiqi Ohongaho Sumasai ao Piripoke raraku biiremi abi mina noi noke mooraama naateta. ⁴⁰Oonihe meeke

abi mina noi ttidza qidzama tete nometa tuumata. Qate Piripoi Adzota nagapata biranatemi moota. Oonita noi ota sohoroqi nagapa samaneke sinabidza pobi hiire tuuma qaaramuti Kaisarea nagapa biranateta.

PAURO QUPA BURISI EETETA

(*Apo 22:4-16; 26:9-18*)

9 ¹Qate Sauro (oi Pauro) noi dzauba bisamu naateqi Dzesuho oko ma boto ibo eetemi noho qupata eepa qooridzemi noi dzube abi minaho torota tuumata. ²Tuuma gunu ma naru hiiremi Ttamasiko nagapata dzuta abi qaata nokoho pepake dzube abi mina qeeteqi moitemi Sauro aimaa qee ota sinabidza nokanoka abi ma paimane saridze aimaa boto suuto Dzerusaremu nagapata aimaa baabareiqi tuumata.

³Oonihe qesa ma nokoi tete bosaho eete tuuma Ttamasiko nagapa dzamoitemi qusuta eepa dzadza kisakisama uhubaqi qura noke rome biireta. ⁴Eetemi noi ttokata taasuhimi ota totoho teei hee, Sauro, Sauro nii naane iboke eeteqi anake iihorai?

⁵Hiiremi Sauroi qasa hiireta, Oonita Soopara name nii ape oni? Hiimi hee, Anai ape bahe Dzesu Kiristu nii ibo eetorai ooni. ⁶Oonita nii qooridzeqa Ttamasiko nagapata tuumake teei niike ota saridzeqa sinasina hiiremi oke nii qusubaitare. ⁷Noo oonoma hiiromi abi noma noko baaota nokoi noo totohoqake nookatani quba teeke te ota mooraranita noko noo apeke hiiremi isanatarota? Baamu.

⁸Qate Sauro noi ttoka neta qoridzemi eehe, nese nohoi ao khaba eeteta. Khaba eetemi quesamane nohoi boto nohota kharikhari eete ai Ttamasiko nagapata tuumata. ⁹Tuumaqi noi ota biranate qupi taparike eetetahe nese noho teqaha uhubara, ma noi teqaha oba ma patta muunara.

¹⁰Oonihe Ttamasikota Dzesuho qaru khata teei qaata dzapa noho Anania. Noke Ohongai tukutoqi hee, Anania! ¹¹⁻¹²Oke hiiremi noi hee, Oe Ohonga anai erani. Hiiremi Ohongai ipibireqi hiireta, Maa, tete teeho dzapa pobipobi ota nii tuuma Dzutaho nagapa peiteqa abi tee, dzapa noho Sauro, noi Tarasu nagapa nena. Oonihe noi naho pupu hiiroraita qupa nohoi quba erake qupadzome: Abi teeho dzapa Anania noi naho toro baahuqa boto nome qiba nahota mootomi nese uhubareiqi hiirorai. Oonita nii tuuma noke saridze qidzaitare.

¹³Sooparai noo oke hiiremi Ananai eraiqi hiireta, Abi ohoke minanipamuke hiiremi ana nookorai, noi dzagana niihoke Dzerusaremu nagapata adzapeke sesero eetorai. ¹⁴Obeteqi erata nanai niihoo dzapa qiraitorai nanake suuto ai tuumare dzube abi minai noke pobi hiiremi orai.

¹⁵Hiiremi Ohongai hee, Abi oke naamae asatem i noi naho kamo naate dzapa pobi nahoke raaba abi qiba ma Isirae tupu nokohota aimaa tuuma qaarakoi. ¹⁶Oi noi dzapa pobi nahoho quba iima ma bago samaneke

saridze qaaraqu oke ana isanate noke banaitakoita nii tuuma noke qidzaitare.

¹⁷Oke hiiremi Anania noi tuuma naga hiireta ota peiteqi Sauroho qibata boto mootoqi hiireta, Sauro, qeseba khata name. Dzesu Sooparai teteta niiho toro biranate noi ana dzoobiremi baabe. Oonita nese niiho uhubami Qaheuba Sumasai ao niike raraku biidzare.

¹⁸Oke hiiremi noho neseta quba qoringi tomidza teei taatemi nese uhubami haba moota. Oonita noi qooridze hiiremi Ananiai noke obama soorota. ¹⁹Obama sooromi oionita noi patta muunaqi tatanga aimata.

SAURO (PAURO) TTAMASIKOTA SINABIDZA HIIROTA

²⁰Ma Sauro noi Ttamasikota Dzesuho oko ma boto ma nokoi isakiqata oota. Ooqi noi ao Dzuta abiho sinabidza guhuta peiteqi Dzesuho khooba hiire paanaiteqi eraiqi hiireta, Dzesu Kiristu noio Ohongaho khatanipamu ooni. ²¹Oke hiiremi nokoi nookaqi houpeu eeteqi hiireta, Dzerusaremua nagapata dzapa oke abi qiraite qaami oho quba noi nokoke sesero minake eeteqi suuto baa qaarita erata oho qesa abi suutoqa dzeima dzube abi mimi nokoho botota mootare baata. Oonihe noi ikanomake eeteqi ao maina naate oorai, eo baamu? Atti quba hiireqi oke hiireta.

²²Oonihe Sauro noi bedzabedza eeteqi hiireta, Dzesu noi Kiristunipamu ooniqi hiireqi sinabidza noo suunipamuta hiire paanaitemu oi Dzuta abi hu noonoma nokoke suqobidzaquho isaki naateta.

²³Oho ipi ota dzuta abi nokoi Sauro teetare gunu dzoomata. ²⁴⁻²⁵Gunu dzoomatanahi noi ao pobi nookata. Oi nokoi repa patita sogimo qoro qaata, oonihe quesamane nohoi noke susu kamo minata sengibeteqi quipibake repa heeta dzoobiremi ttokata qurate biranate atti tuumata.

PAUROI DZERUSAREMUTA BAAQI QARU ABI MOOTA

²⁶Tuumaqi Sauroi Dzerusaremua nagapata biranateqi Dzesuho Qaru abi nokohota ipibidzare eeteta. Oonihe noi ao Dzesuho khata naateta oke nokoi nookami teqahama naatemu atti eeteta. ²⁷Oonihe Banabei noke dzaira eete Qaru abi nokohu toro dzeima tuumaqi Dzesui teteta Sauro saridzetaho noo ma pobi hiireta. Ma noi Ttamasikota Dzesuho tete hiire paanaiteta oho pobi ma biidza noo nokoke pobi hiireta, oke Banabei gama nokoho pengata hiire paanaiteta.

²⁸Hiiremi Sauro (Pauro) noi nokoma Dzerusaremua qaaqi Dzesuho sinabidza attiamake abi pobi hiire qaata. ²⁹Ma Dzuta abi qesa Girisi noota hiire qaata noi nokoma noo hiire nookaqi noo buribaro eeteta. Oonita obera abi noke teetare hiireta. ³⁰Hiiremi dzairamane noho nokoi nookaqi noke Kaisarea nagapata dzeima tuuma dzoobiremi tuuma qaaramuti Tarasu nagapa khooba nometa biranateta.

³¹Qate sobasoba abi ma paimane Dzuta ma Garirea ma Samaria habana qaata nokohota hasu ma keba biranateta. Hasu ma kebata

isakiqata qaaqi nokoi Ohongaho pengata subateqi qesa qahiqahi eete qaata. Oonihe Qaheuba Sumasai husi ma pai nokoho naatemi sinabidza haba gegebetemi tupu nokohoi mina naateta.

PEETOROI AIREA MA TABITTA QIDZAITETA

³²⁻³³ Qate Peetoroi teteta tuuma qaaramuti Ohongaho oko ma boto Ritta nagapata qaata nokoho toro biranateta. Oonihe noi ota abi teke moota, dzapa noho Airea. Noi oko ma boto atimanoma naate tii eith-ho isakita meera keke eete qaata.

³⁴ Ma Peetoro noke pobi hiireta, Airea, Dzesu Kiristu niike qidzaihibita qori qepe niime qoomare. Hiiremi hairiamake qoridzeta. ³⁵ Oke eetemi Ritta ma Saromi nagapanai oke mooqi cupa burisi eeteqi Ohongaho oko ma boto tupu naateta.

³⁶ Qate paha Dzoopa nagapata atapa eehaha teei qaata dzapa noho Tabitta (Qate girisi noota oke hee Subaroho isaki ooniqi hiiqa qaata) noi abi samaneke kokora qidzanipamuke abiho tteki aimia qaata. ³⁷ Oonita Peetoro Dzoopata qaata bodzata Tabitta heme minake eeteqi baatare eeteta. Aoke baatemi quesai keba nohoke akobeteqi naga teeho nakuta ai pei mootota.

³⁸ Oonihe Ritta nagapa oi Dzoopa nagapaho samaqata qaata. Oho qubake sobasoba abi tupu nokoi Peetoro ho pobi nookaqi abi eserike dzoobiremi tuuma noke dzeima ao baabare hiireta. ³⁹ Hiiremi Peetoroi nookaqi adzanoke noko tuumata. Tuuma biranate moomi kebai meeqota. Ota dzeima peiteta, peite moomi paimane ttarumi keke keba nakunaite tti ma ttaka eete Tabittai eehaha qaaqi nokoho quba sasa hiboto qaata oke peetoro keba banaiteta.

⁴⁰ Banaitemi Peetoroi noko tepatetemi biranahimi noi pomai kotoroqi pupu hiireta. Pupu hiiqa qaasuqi keba dzaga bobotoqi eraiqi hiireta, Tabitta nii qoridzare. Hiiremi noi nese parara eeteqi Peetoro mooqi qori habeseta. ⁴¹ Habesemi noho botota aimami qori qoorota. Qooqimi sobasoba abi ma ttarumi paimane nokoi peiteqi moomi Tabitta qaraqaranoma naatemi cupa qidzanipamu naateta.

⁴² Obetemi oho pobi Dzoopa nagapata gegebetemi tupu minanipamui noko Soopara nooka hiisi eeteta. ⁴³ Ma Peetoroi Dzoopata qaatahe abi teeho dzapa Simona sihu korakora abi noi noho nagata bodza samane noma nopo ttaike qaata.

KONERIOI ANGEROHO NOO NOOKATA

10 ¹ Qate Kaisarea nagapata abi teei qaata, dzapa noho Konerio, noi raaba abi Itaria habaho qaa abi tupu nokoho soopara naateta qaata. ² Oonita noi oko ma boto nomema noko Ohonga qupadzoma qaata. Noi Dzuta abi samaneke kokora bageke eete qaata, paha Ohongaho toro saninoqake pupu hiiqa qaata.

³Oonita Konerio noi oke eete qaami ete teeho surenake Ohongaho angero teei noho toro biranateqi noho kira hiireqi hiireta, Konerio.

⁴Oonita kira oke hiiremi noi nese qooroqi moo sahateteqi hiireta, Soopara name, quba apeni? Hiiremi noi hiireta, Pupu ma kokora niihoho pobi Ohongaho tomata taatemi noi nookami bagenoma.

⁵Oho qubake nii qaru dzoobiremi tuuma Dzoopa nagapata abi teeho dzapa Siimo, dzapa usaqe noho Peetoro noke dzeima baabare. ⁶Noi Simona ma nopo oorai. Simona noi sihu korakora abi noma nopo oora ma qaara eetorai. Naga nohoi besa patisigiqata oorai.

⁷⁻⁸Oonita angero noo oke hiire tuusumi Konerio noi qaa abi Ohonga ai tataumanoma teeke uhutoqi kokora abi eseri noho baura eete qaata nopo oho qesa uhuto nokoke noo ma pobi hiire soubiremi Dzoopa nagapata tuumata.

PEETOROI BAKUHO ISAKI MOOTA

⁹Qate iihai mootomi abi noko tuumaqi teteta meeta. Meeqomi iihai mootomi tuusumi ete bisa naatemi noko nagapa dzamoitemi Peetoro naga suruho heena pupu hiibare peiteta. ¹⁰Oonihe noi patta quba ttidza saa eetemi qesai noho quba patta khautomi noi bakuho isaki geemata. ¹¹Geema moohimi qusu papatemi boto qesai ttoba khabanoma nakunomaho isaki oke pobi ma mage, tume ma dzaga aimaqi oke dzoobiremi ttokata gaibata.

¹²Oonihe oho nakuta kabira maina paina, dzotata ma siriquba ma qusuho nee maina paina ota oota. ¹³Oomi totoho teei biranateqi hiireta, Peetoro, nii qori kabira oke teete dzuubete muunare. ¹⁴Oonihe Peetoroi bai hiireta, Ohonga name, oio Baamu. Quba qataqtani mae quba sepesape oke ana muunaamanipamu.

¹⁵⁻¹⁶Oke hiiremi totoho oi paha hee, Ohongai ao sasari eetorai oke nii eto baaba eetaino oiqi hiiretanihe quba biranateta oi qupi tapari naatemi ao hairiamake dzeimami qusuta peiteta. ¹⁷Oonita Peetoroi quba nese agiagi oke moo nookaqi qupa muunaqi hee, oi quba ikanomani? Oiqi hiireta.

Hiimi Konerioi abi dzoobire baata nokoi nagapa biranateqi Simonaho naga qasa hiire tuuma qaaramuti naga pouta qoorota. ¹⁸Qooroqi qasa hiireta, Siimo dzapa usaqe noho Peetoro noi naga erata meeqrail mae?

¹⁹Oke hiimi Peetoroi quba nese agiagi mootaho quba iihia ma dzoobidza eesumi Sumasai noke pobi hiireta, Moorare, abi tapari naga erata biranate niiho qasa hiiibi. ²⁰Oonita nii gaibaqa nokoma nike tuumare, oonihe nii eto oho qupa ororo eetaino. Oi anai noko gainene eetemi baabe.

²¹Hiiremi Peetoro qurate noko pobi hiireta, Anaho qirike eetorai qate anai eranita naane quba baaorai? ²²Hiiremi abi nokoi hiireta, Qaa abi

soopara nanaho Konerio noke Ohongai moomi qidza ma pobipobi, noke Dzuta abi nookami qidza naatorai. Oonihe qaheuba angero teei baaqi noke hee, Nii tuuma Peetoroho quba hiiremi baaqake noi too nomema noo hibare. Oke hiiremi nanai baabe.

²³ Hiiremi Peetoro nokoho quba qepe ma haba eetemi noko meeta. Qate iihai mootomi Peetoroi Dzoopa abi quesama noko gama Kaisarea abike gainene eete tuumata.

PEETOROI RAABA ABI KONERIOHO NAGATA PEITETA

²⁴ Tuumomi iihai mootomi Peetoro ma nokoi Kaisarea nagapata biranateta. Qate Konerio noi oko ma boto ma dzairamane nome gama ttuttuite beebe eetomi noko biranateta.

²⁵ Biranateqi Peetoro nagata peitemi Konerioi noho dzagata pomai kotoro hasa hiireta.

²⁶ Oonihe Peetoroi noke ai qusubaiteqi hiireta, Anai paha abi, niiho gesanita nii qoridzare. ²⁷ Hiireqi nopo qesa noo ma too eeteqi nagata peitemi abi tupu minanipamui oomi moota.

²⁸ Mooqi Peetoroi noko gama pobi hiireta, Nikei Dzuta abi nanaho khoobake nikemae gesinani. Nanai abi agiagi nikema ipibidza ma hongasidza eetaquho qagai oorai. Oonihe Ohongai oho kuku ma khooba anake banaitemi anai bamu isanate abi teeke paha hee ngiiginomaniqi hiibaqu, baamu. ²⁹ Oonita nikei anaho quba hiiremi ana te qupa minake muunaranihe baaqi oho hasa hiibita naane qubake nike naho quba hiirorai?

³⁰⁻³¹ Oiqi hiiremi Konerio erake no pobi hiireta, Maqa, anai quba nese agiagi moo baa qaimi ete bodza eserisa eseri naate. Oho noo nii pobi hiire nii nookare. Ana naga nameta surenake pupu hiromi abi tee, sasa noho khabanomanipamu noi naho toro biranateqi ana pobi hiireta, Konerio, Ohongai niiho pupu nookami niiho kokora oi qidzani.

³² Oho quba nii abi dzoobiremi Dzoopa nagapata tuuma Simona, dzapa temu noho Peetoro noke dzeimami niiho toro baabare. Abi noi Simona siihu korakoraho naga besa pouta oorai. ³³ Oonita Peetoro erata baaqa noo qesa hiiremi nii nookakoi. Oke angeroi hiiremi anai abi dzoobiremi niiho quba qeemami nii baabe. Qate nii naho noo nookaqi baami anaho ttidza qidzanate. Ohongai noo nii pobi hiireta oke nii nana pobi hiiremi nana oke nookareiqi ttutituratorai. Oiqi Konerio hiireta.

KONERIOI PEETOROHO TOOTA SINABIDZA NOOKATA

³⁴ Oke Konerio hiiremi Peetoroi hee, Meeke ana qupadzomami Ohongai abi napahoke te nookami teqaha teei teemuke riite oraaidzara. ³⁵ Oonita abi noo ma sama maina paina nokoho neta qesai Ohongaho atti ququimaqi baura qidza eete qaaraquko nokohoke Ohonga nookami qidza naatakoi.

³⁶ Qate Ohongai Isirae abi nanaho quba noo meenomake dzoobiremi saridzeta oho pobike nike nookorai. Noo oio Dzesu Kiristu noi abi minara napaho Soopara oioni, noke dzoobiremi noi hasu ma ponaho tete biraitemi oho isere qidza pobi hiire soubirorai. ³⁷Oonita noo Dzutea habata igabire oorai oi erani.

Bosata, Dzohane noi sobasobaho baura eete qaata oho ipita Nadzarete nagapa nena Dzesu noi Garirea habata qori qooro tuumata. ³⁸⁻³⁹Qate Dzesu noke Ohongai Qaheuba Sumasama beedzaenomaitemi noi tuumaqi kokora baura qidza eetemi libadzai abi sesero eete qaata nokoke qidzaite qaata. Oi Ohongai noke gainene eetemi noi baura oke eete qaata.

Eete qaami Dzutea haba ma Dzerusaremu nagapana hiireta ma eeteta oke qesa ma nanai gama moo nooka soubire oho mee hibahiba naate oorai. Oonihe abi nokoi Dzesuke hapahapata teetemi baateta. ⁴⁰Baatemi ete tapari naatemi Ohongai noke baata neta tukutota. Tukutoqi hiiremi noi qesahota biranatemoo nookata. ⁴¹Oonihe abi sepehota bahe, Ohongai qesa ma nanake asatemi oomi Dzesu baata neta qoridzemi nana nese nanameme noke mooqota ma noma nanai ttaike oba ma patta muunata oioni.

⁴²⁻⁴³ Qate noi baata neta qoridze nanake noo tatanga moitemi nanai abi minarake noho pobi hiirorai. Kiristuhu nooke Ohongaho too abi gama hiireqi agobake noho qaamodzamodza hiire qaata. Oonita Ohongai Dzesu Kiristuke upubiremi noi abi eehaha ma baateta gamaqa batabidzakoi. Oonihe poiqa apenei noho dzapa nookaqi hiisi eetaqu kahosa nokohoke Ohongai ao dzamutakoi. Noo oke nanai pobi hiirorai.

QAHEUBA SUMASAI RAABA ABI RARAKU BIIRETA

⁴⁴⁻⁴⁶ Qate noo oke Peetoroi hiimi abi oona noo nookata nokoke Qaheuba Sumasai ao raraku biiremi nokoi nagapa noo maina painaho totohota Ohonga hasa hiirota. Hasa hiiromi Dzuta abi qesa sobasoba tupuna ooqi Peetoro gainene eete baata nokoi moohimi Ohongai oonomake raaba abike Sumasama irangi eetemi pairuru eeteta.

⁴⁷Hiiremi Peetoroi erake hiireta. Qateqa, nanahota Sumasa qurateta oho qesa abinaga erahota quratemi ikaqi nokoke sobasobaho oba qaanatemisianataqu? Baamu. ⁴⁸Oiqi hiireqi noi noko qupanomaiitemi nokoi abi nokoke Dzesuhu dzapata ipibireqi obama soorota. Sooromi nokoi Peetoro qaanatemisianataqu? Baamu.

PEETOROI ISERE DZERUSAREMUTA HIIRETA

11 ¹Oonihe Qaru abi qesa ma sinabidza abi Dzuta habana qaata nokoi raaba abi sinabidzake nookaqi Ohongama ipibiretaho pobi dzadzangike nookata. ²Oonita Peetoro Dzerusaremuta peitemi sama geebanomaho dzaodzaonoma nokoi raaba abiho nookami hou peunoma

naateta. ³Nokoi Peetoroke hee, Nii naane quba raaba abiho botota patta aimaqi nokoma nike ttaike muuna ma aima eetemi nana nookorai.

⁴⁻⁵Hiiremi quba Kaisareata biranateta oke Peetoroi toqoma teeteqi noko pobi hiireta, Oore, Anai Dzoopa nagapata pupu hiire oomi Ohongai naho qupata erake paanaitemi ana moota.

⁶Ota ana nese qooroqi moomi qusuta boto qesai ttoba khabanomahoh isaki oke mage ma pobi, tume ma dzagata aimat tokata quratomi oho nakuta quba sepesepa kabira oko ma botonoma ma oko ma botoama qesai qaanoma ma qusuho nee gotta oi paha oota. ⁷Ma noo totoho teei naho tomata dzubata oi hee, Peetoro nii moori oke teete khauto muunare.

⁸Hiiremi ana hiireta, Eo, Ohonga name, quba muunaama, quba sepesape oonoma oke ana te muunoraidzarani. ⁹Oke hiimi qusu neta noo totoho oi beedzae eeteqi hiireta, Ohongai quba hiire sasari eesubi oke nii etoqa ooho ngingi eetaino. Oiqi hiireta. ¹⁰Quba biranateta oi qupi tapari naho dzagata biranatemi botoi oke paha dzeimami qusuta peiteta.

¹¹Oonita quba oi bamu naasuhimi aoke Kaisarea nagapa nena, abi tapari naho qaru qeemaqi nanai ootata biranateta. ¹²Biranahimi anai nokoma tuumareiqi Sumasai hiireta. Oonihe noi hee, Eetoqa qupa bitobitoma tuumainoqi hiireta.

Oke hiiremi dzairamane napaho 6 noko anama baata nanai tuumaqi qaaho bosa qobaqobaho nagata peiteta. ¹³Peitemi abi oi noo ma pobi nanake hiireta. Hee, Naho nagata angero teei baaqi ana pobi hiireta, Nii Dzopa nagapata qaru dzoobire tuumaqi Siimo Peetoro dzeima niiho toro baabare. ¹⁴Noi baa noo hiiremake abi niiho nagana oorai ma nike gamaqa qidzanatakoi.

¹⁵Oke qaa pobipoib noi hiiremi ana sinabidza noko pobi hiimi agoba napahota Sumasa qurateta oho qesa nokohota gaibata. ¹⁶Eetemi ana Sooparaho noo erake qupadzomata: Dzohanei abi obama soorota oonihe niukeke Sumasama soobakoi. ¹⁷Oke Dzesu Kiristui agobake hiiremi napa Soopara napame nooka hiisi eetemi Ohonga napake Sumasa moitetai teena oke raaba abiho quba irangi eetemi ana ikaqi Ohongake bai hiibarota? Baamu, ooiqi Peetoro hiireta.

¹⁸Noi oho ipi hiiremi noko nooka nipanatemi qupa nokohoi kebaratemi nokoi gama Ohongaho hasahaha hiireqi hiireta, Oboboo, Ohongai raaba abi nokoho qupa ai burisi eetemi qaraqara mai eetareiqi hiibi. Dzoobe mina! Oiqi hiireta.

BANABE MA PAUROHO BAURAI ATTIOKHIATA BIRANATETA

¹⁹Qate bosata Setepanoke teetemi uuba ma sakaba mina biranateta bodzata abi apenei Poenikia haba ma Kiporo sunga ma Attiokhia nagapata atti tuumata nokoi Dzuta abiqake sinabidza pobi hiire qaata.

²⁰Oonihe nokoho neta qesa Kipuro kusu ma Kirene haba nena nokoi Attiokhia nagapata tuumaqi Dzuta abiqake keke bahe paha Giriki abiike

Soopara Kiristuhu sinabidza pobi hiireta. ²¹Obetemi Soopara noko beedzae moitemi oho isakita nokoi abi tupu minake pobi hiiremi qupa nokoho burisi eetemi noko Ohongaho pobi naateta.

²²Ma oho pobi Dzerusaremuta baami Dzesuho oko ma boto tupu nookaqi Banabe dzoobiremi tuumaqi Attiokhia nagapata biranateta. ²³Biranateqi noi Ohongaho qupa kokora oke moomi noho qupa qidzanateta. Oonita noi nokoke qogo ma saga hiireqi hee, Nike qupa teenaiteqa Ohonga Sooparaho torota atimaqi battigara naate qaarareiqi hiireta.

²⁴Oi Banabei abi bagenoma oho quba nohota Qaheuba Sumasai heuheu eete qaami ai tatauma noho meupunoma naate qaata. Oho qubake nagapa oho abi adzapei adzahaha naateqi Ohongaho pobi naateta.

²⁵Oonihe Banabe noi Ttarasu nagapata tuumaqi Pauroho qiri eeteta. ²⁶Qiri eete saridzeqi noke dzeima Attiokhia nagapata nopo baata. Baaqi nopo abi samaneke sinabidza pobi hiire banaite qaami tii teena bamu naateta. Oonita Attiokhia nagapata Dzesuho oke ma botoi dzaodzaonomna naate qaami abi siginai sohoroqi nokoke Kiristuke suimorai abiniqi hiire qaata.

²⁷Qate bodza ota too abi Dzerusaremuho nenai Attiokhia nagapa tuumata. ²⁸Ma nokohota tee, dzapa noho Agobo, noke Sumasai qupanomaiitemi haba samaneta seebe mina biranatarota oho hore noo hiireta. (Oonihe seebe oi Karauttio Gaminihio abi mina noi qaata bodzata meenoma naateta.)

²⁹Oonita abi Attiokhiana qaata nokoi seebe biranatarotaho pobi nookaqi oma nokohoi ootaho isaki ttuttuiteqi Dzutea habata quesamane nokoho qaataho torota dzoobidzare hiire tatangaiteta. ³⁰Oma oke ttuttuiteqi Banabe ma Pauro moitemi aima tuuma Dzerusaremuho sinabidza abi mimi noke moitemi seebe oho paramu naateta.

HEROTEI DZAKOPOKE TEETEQI PEETOROKE SUUTOTA

12 ¹Qate bodza oho robeta Kana habaho kiape mina abi qiba Herote, noi sobasoba abi qesa teete kootoroqi sutasuta nagata mooto qaata. ²Noi hiiremi Dzohaneho nane Dzakopo noho paruke noko geemami baateta.

³Oke eetemi Dzuta abi basesanoma nokoi oke moo hasa hiiremi Herote ohongahonga naate hiiremi oho qesa Peetoroke Ingona dzumaho bodza ooqata suutota. ⁴Oi noi hee, Ingona dzuma baamu naatemi Dzuta abike banaiteqa teetare qupadzomaqi hiiremi sutasuta nagata mootomi qaa abi 16 nokoi soopara eeteta. ⁵Oonihe oko my boto tupu nokoi Ohongaho toro pekhure teeteqi noho quba pupu hiireta.

ANGEROI PEETOROKE SAQOROMI SINABIDZA TUPUTA BIRANATETA

⁶Noko pupu hiromi Herote noi hee, Iihai mootomi anai noke Dzuta abi banaitakoiqi hiireta. Oonihe qupi ota qaa abi eseri nopol Peetoro ngibira

eserima bisa nopometa suutomi noi meeta. Meeqomi qaa abi quesai tete sirasirata soopara qoro oota. ⁷Oonihe naga suruho nakuta Ohongaho angero teei biranatemi naga gama saa eeteta.

Eesumi angeroi Peetoroke qebata tuputupu teeteqi hiireta. Ae, nii hairiamake qoori. Oke hiiremi Peetoroho botona ngibira suuto oota oi saqobata. ⁸Ma angeroi hee, Oko sasa niime dzaabare. Hiiremi no dzaarota Dzaromi noi hee, Oionita sasa khara niime dzaaro baa anake iihare.

⁹Hiiremi noi noho ipita biranateta. Oonihe angero noke quba pobi hiire banaiteta oke noi qupadzohimi bakuta mooraiko isaki naateta. ¹⁰Obetemi nopoii teteta tuusuqi qaa abi qoro oota teeke riiteqi oho qesa paha teeke riite tete sirasira tatanga qainiho oke moomi noomae kuraubami nopoii biranateta. Biranate qaaramuti, teteta tuusuqi tete teeke riiteqi angero noke gaubire papateta.

¹¹Oonihe, Peetoroho qupa ota rikeqomami noi erake qupadzomata. Ohonga noi ao angero nome dzoobiremi Heroteho angi neta ma Dzuta abi nokoho dzauba neta ana saqohibi. ¹²Noi oke qupadzoma rikeqomaqi tuuma Dzohane Marekoho pai, dzapa Maria, noho nagata biranateta.

Oonihe abi adzapei ttutturateqi ota Peetoroho quba pupu hiirota. ¹³Hiiromi Peetoro baaqi nagapa qaahota tuputupu teetemi kokora atapa tee dzapa noho Rootte noi hee, Apei pou tupu teete hiireqi qurateta. ¹⁴Qurateqi noo totoho nookami Peetoroho. Oonihe te tete geemaranahihe qaki eeteqi naga nakuta peiteqi hee, Peetoro baaqi qoo paata qoro oorai. ¹⁵Hiiremi nokoi noke hee, niiho qupa ruume naatemi nii hiiire. Oonihe noi qiba baqebeteqi hiireta, Baamu! Peetoronipamui qoro oorai. Hiimi nokoi hee, Idze! Oi poi gisi noho ooniqi hiireta.

¹⁶Oonihe Peetoroi paha tonabetemi nokoi tete geemaqi Peetoro mooqi ubaqomata. ¹⁷Ubaqomami nokoi noo nidanatareihi nokoke bodo qamuni eeteqi Ohongai sutasuta naga neta noke saqoromi tta eete baata oho pobike noko hiire soubireta. Ma noi hee, Nike noo ma pobi erake Dzakopo ma dzairamane gesamanek pobi hiibare. Noi oke noko pobi hiireqi nebe teeta qaheuba tuumata.

¹⁸Onita iihai mootomi qaa abi nokoi Peetoro qiri minake eeteqi ikanomake eete bamu naateta oke hiireqi ruume naateta. ¹⁹Obetemi Herotei hee, Nike ao saridzeqake aimare. Hiiremi noko qiri eeteqi bittanipamu eetemi qaa abi sutasuta nagata Peetoro soopara eeteta nokoho khoobaho qirike eete saridzaama naate Herotei hee, nokoi ao baatareihi hiireta. Hiireqi noi Dzutea haba qaateqi Kaisarea nagapata qura ota qaata.

HEROTEI BAATETAHO KHOOBA

²⁰Qate Herote noi bodza ota Ttiro ma Sittona nagapa nena nokoke ibo eeteta. Oi nokoi bosata Herotema muuna ma aimaa ttaiqake eete qaata oi

ota ipi uhubata. Oonihe nagapa oho maikhametoi teena naate biranateqi Herotema paha qesa dzaira eetareiqi abi ohongaho abi mina tee dzapa noho Barasto noke noko hiire kebaitemi noi abi qiba Heroteke noo oke pobi hiireta.²¹ Oonihe Herotei oho noo ipi hiibarotaho bodza baami noi abi qibaho nee ma bau nome eeteqi poro quereta qooromi abi samane ttutturate oomi Herotei sama qaupu noo nomeke noko pobi hiireta.

²² Hiiromi abi gama susupu noke qoqopa eeteqi qarutoqi hiireta, Ububuu noorai abiho baamuhe Ohongahoni.²³ Oke nokoi hiire qaami noi oke qamuni hiibaama naatemi Sooparaho angero teei ao noke heme mina moitemi dzoodzo minanipamui noho ttidza geemami baateta.

PAURO MA BANABE DZERUSAREMU TUMATATI MAREKOMA BAATA

²⁴ Qate Ohongaho noo oi haba gegebeteta. ²⁵ Haba gegebetemi Banabe ma Pauro Dzerusaremuta baura eetare hiireta oke eete soubireqi burisi eete Attiokhia nagapata tuumare eesuqi Dzohane Mareko noke nopo i dzeima noko gama tuumaqi Attiokhia aimata.

PAURO MA BANABEKE SUMASAI UHUTOTA

13 ¹ Attiokhia nagapata sobasobaho tuputa too abi qesa ma paha banaita qesai qaata. Nokohota Banabe ma Simeo (dzapa totaqi noho Nigere) ma Rukio Kirene nena ma Manae, noi abi qiba Herote noho sinasina tupuho abi teei ooni, qate musaqi baatao Pauro.

² Oonita qupi teeta nokoi pattaho hutingi naate naa ma pupu eetomi Sumasai paanaiteqi hiireta, Anai Banabe ma Sauro baura pobi hiiremi ooraita oho quba roibetare. ³ Hiiremi nokoi hutingi naate qaaqi boto nokome qiba nopohota mooto agoago eeteqi sinabidza baurata dzoobireta.

QARU ABI KIPOROTA SINABIDZA SOHOROTA

⁴⁻⁵ Qate abi khata tee, oi Dzohane Mareko, noi mai Banabe ma Pauro nopoike baurata tuuhobare hiiremi nopohota isanatemti Qaheuba Sumasai nokoke dzeimami tuumaqi Serukia nagapata biranateta. Ota biraneteqi nokoi sisima aimaqi Kiporo kusuta tuumata. Tuumaqi kusu oho hagapa qiba Sarami ota biranateqi Dzuta abi nokoho sinabidza guhuta peiteqi nokoke Ohongaho noo hiireta.

⁶⁻⁸ Ota noo hiire qaaramuti kusu oke dzongobete soubireqi nokoi Paapo nagapata biranateta. Biranate nokoi ota kiape teke saridzeta dzapa nohoi Seregio (dzapa temu noho paha Pauro). Oonita kiape Seregio noi abi nakanokonomai Ohongaho noo nookareiqi Banabe ma Pauroho qaru hiireta.

Hiiremi nopo baatahe ota moomi kiapeho sinasina abi teei oota. Noi Dzuta abi tee, dzapa noho Dzesukhata (ma dzapa temu noho Girisi noona

hiirorai oi Erima. Oho khooba hee, Baabe ma Basarani). Noi too abi oberaoberanita baabe ma basara nometa qaata. Oonita Banabe ma Pauroi kiape Seregioho torota sinabidza hiibare boohimi Dzesukhatai kiapeke sinabidza oke qaanateqi Banabe ma Pauroke basesa eeteta.

⁹⁻¹⁰Basesa eetemi Pauro (dzapa bosabosa noho Sauro) Sumasai cupa nohoke adzahahaitemi noi abi oke hee, Nii Dzesukhata bahe Iibadzakhata! Oi nii qidza ma pobipobiho ibo tatangani! Cupa niihota ikoiko ma baabe oberaoberaho nooi heenipamu eete oraiho qubake Sooparaho tete rasiki eetorai oke qidzoke qaataqu. ¹¹Oho qubake Ohongaho beedzae khooba moorare. Nii ao ibau khabau eeteqa bodza gesata dzadzaho ruumeke qaarare.

Oke Pauroi hiremi ota nese noho qupi sooromi houpeu eeteqi basabasa eete abi boto nohota aimareiqi hiireta. ¹²Oonita quba agiagi oonomai biranatemi kiape mooqi sinabidzahoke nookami attinoma nasuhiumi Ohongahota atimata.

PAURO MA BANABEI ATTIOKHIA ABI SINABIDZA HIIRETA

¹³Nokoi Ohongata atimami Pauro ma Banabe ma Mareko nokoi Paapo nagapa oke qaateqi sisimata peite Papiria habata Peraga nagapata biranateta. Oonihe ota Dzohane Mareko noi ikanomake eete nokoke qaateqi burisi eete Dzerusaremuta tuumata?

¹⁴Qate Pauro ma Banabe nopo Peregia nagapa mina Attiokhia ota biranateqi Dzuta abiho sinabidza guhuta gama pei habeseta. ¹⁵Habese oomi soopara nokoi hu noo ma too abi nokoho qetaqeta qesa oke gama isaite soubireqi eraiqi hiireta. Dzairamane, nike sinabidza teeke hiiroraiqake hiire nana nookare.

¹⁶Onita Pauroi qoridzeqi boto qusubaite botoma nokoke qamuni hiireqi hiireta, Isirae abi ma abi qesa nikema gama Ohongake ququimorai nike nookare. ¹⁷Isirae abi napaho Ohongai uimane napahoke asatemi Agitta habata qaami Ohonga hiiremi nokoho dzare huba haba biireta.

¹⁸Qate kebanoke noi beedzae ma tatanga nometa noko dzeimami baata. Baaqi haba habanata birante barubaru hiire qaami Ohongai pokeba sama kebata nokoke dzeima qaami tii 40 baamu naateta.

¹⁹Paha ipita noi Kana habata abi tupu sebeni nokoke rubengaiteqi hiiremi neimane napahoi ttoka ma haba oke karabeteta. Oke eete ota qaami tii 450 baamu naateta. ²⁰Ma oho tongo neta nokoi Kana habata qaami noi nokoho quba batabidza abi uhutomi nokoi abi minarake soopara eete qaami bodza ota too abi Samuei biranateta.

²¹Too abi Samuei biranate qaami noko abi qiba quba hiiremi Ohongai Bedzamiho eemane tupu nokoho neta Kiisiho khata Sauroke uhutomi noi tii 40-ho nakuta noko dzeima qaata. ²²Qaami Ohongai noke qasuhiqi Dzeseho khata Tabitike abi qiba nokoho upubireta.

Oi teeho bahe Ohongai hee, Ana Dzeseho khateke saridzemi noio anaho too qusubaite soubidzakoiqi hhireta. ²³Qate Tabitihi ttarita Isirae abi napaho Ingona mai teei ao biranateqi Ohongaho naru noo agobake hhireta oke meenomaiteta oi ape bahe Dzesu ooni.

²⁴Oonihe Dzesui paana naataamake oomi abiho bisata Dzohane sobasoba baaqi Isirae abi qupa burisi eeta qubake nokoke obama soorota. ²⁵Oonihe Dzohane noi hee, Anai ape oniqi hiirorai. Oi nike anake hee, Kiristui baabaqu abi oioniqi hiiroraihe baamunipamu. Abi noi Noomae ipita baabakoi oonihe noi abi mina, anai oko sasa nohoke eka suuta quba bamu isanataqu oke Dzohane hhireta.

²⁶Oonita dzairamane name, nike Abarahamuho eemane khameto ma quesamane nikoho bisata Ohongaho ququimorai ana nike noo ma pobi hiiremi nookare. ²⁷Ohongai napake ingonaitarota naru noo oke too abi napaho quba qeetemi dzuma samaneke isaitorai oke Dzerusaremu abi mina ma adzai nookorai oonihe nokoi Dzesuke teesuqi naru noo oke meenomaiteta oke noko teqaha qupadzomara. ²⁸Nokoi Dzesuho kahosa qirinipamu eeteqi quba bamenoma saridzaama naatetahe sepeke Piratoho torota qiba qeereqi Dzesuke teete baateta.

²⁹Obete sinabidzata hhiretaho isakita nokoi eete soubireqi hapahapata hiumaqi nesetuho oma nagata mootota. ³⁰Oonihe Ohongai Dzesuke tukutomi qoridzeta. ³¹Qoridzeqi noma Garirea haba nena Dzerusaremu nagapata gama peiteta noi nokoho torota ete bodza samaneta biranateta. Biranatemeti moota abi nokoi pobi hibahiba noho naate oorai.

³²Oi Ohongai uimane napahoke naru hhiretaho mee oho isere qidzake nakai era hiibi oi Ohongai Dzesu tukutomi eemane khameto napahota meenoma naate oorai. ³³Oho quba nike ttidza qidzaqidza eetare. Oi Samu Hu tutu Ohonga abi qibai noo erake hhiremi qeeteta, Khata name poiqake ana niike (baata neta) dzoohibita nii naho poro quereta peiteqa ota qoro qaarare, oke qeetemi oorai.

³⁴Oi Ohongai Dzesu baata neta tukutomi ooraita noi bamu paha ipita baatata biranataqu. Oho quba Ohongai noke erake hhireta, Anai Tabitihi pobi hhireta oho mee qaheuba qaraqara tatanga oke ana ao Khata niike moite qaate. ³⁵Oiqi hhireta paha Samu teeta no erake qeetemi oorai, Qaheuba abi niihoi eto baate aritete gnausa natainoho isakita Ohonga nii qidzoke noke qaataqu.

³⁶Oke Tabitti qeetetahe oi te noomaeho noonidzara. Napa nookami Tabiti noi Ohonga baura hhireta oke abi nomeho torota eete soubireqi noomae baateta. Baatemi uimane neimane nokoho tuputa mootomi keba nohoi arinate ngausa naateta. ³⁷Oonihe Ohongai Dzesuke tukutomi abi oi teqaha arinate baamu naatara.

³⁸Quni ma mani name hture nookare. Napaho kahosa dzumudzamuke abi oi ooqata saridzemi nikoho naatemi ana niki ke qupanomaisubi.

³⁹Moseho hu nooi nikoho kahosa biisi naatareiqi bitta eeteta. Oonihe Dzesuhota soomami nikoho kahosa qagaubakoi.

⁴⁰Nookare, too abi nokoi basesaho nooke qeeteta oi hee, ⁴¹Nike qaaraquta ana baura bamenoma teeke eetemi baura oho pobi hiiremi nikoho tomata taatemi qidzoke nike nookaqu. Oho quba puutta abike nike tomama nooka roqobetakohe ao rubenga naatakoi. Oiqi qeeteta. Oonita noo oi eto nikoho naataino hiireqi naka qogo noo hiiire.

⁴²Oke hiireqi Pauro ma Banabe nopoii sinabidza guhuta biranahimi abi noko dzuma temuta paha noo teena oke hiibareiqi hiireta. ⁴³Oonita garuba nokohota Dzuta abi samane ma Dzuta abiho qahiqa qesa (oi raaba abi) nokoi gama Pauro ma Banabeta atimami nopoii hee, Dzoobe, Ohongaho kokorata subate qaarareiqi qogo ma saga hiireta.

⁴⁴⁻⁴⁵Qateqa dzuma temu nokohoi dzamonahimi nagapa oho abi Onongaho noo nookare samanei biranateta. Biranahimi Dzuta abi qesa nokoi moo nookahimi qanga naatemi Pauroho noo baaba eeteqi noke ai curateta.

⁴⁶Oke eetemi Pauro ma Banabe nopoii nokoke qanganipamuta moo hiireta, Dzuta abi nikoho Ohonga noo bosata hiibareiqi baaorai. Oonihe nikemae goottae eeteqi qaraqara tatangaho pobi naatare bai hirenita nakai nikoho qaaqra raabe abi nokohota tuumakoi. ⁴⁷Oi teeho bahe Ohonga erake hiireta, Anai nii raaba abiho dzongi ma eepa moototata korakora nokoho naate tuuma qaaqa habaho moirata soubidzare oiqi hiireta.

⁴⁸Oke Pauro hiiremi raaba abi nokoi cupa qidzanateqi noko Ohongaho noo nookaquho hasa minake hiireta. Qaraqara tatangaho pobi naatarota nokoi gamaqa sinabidza nooka hiiisi eeteta. Eetemi Ohongaho noo haba ota gegebeteta.

⁴⁹⁻⁵⁰Oonihe nagapa oho abi mimi ma paha paimane qesaqesa apene Dzuta abiho sinabidzata qahiqa eeteta nokoke Dzuta abi kosikosi eete suu ma pai mootomi nagapa ma haba qaa aimaqi Pauro ma Banabe nopoike teete iihaqi haba ota hotou biireta. ⁵¹Hotou biiremi nokoke qomaqoma hiireqi nopoii oko nopomeho kaususu tepateteqi Ikonio nagapata tuumata. ⁵²Tuusumi Qaheuba Sumasai nopolta meupunoma naatemi qakiqaki eeteta.

PAURO MA BANABEI IKONIOTA BAURA EETETA

14 ¹Oonita Pauro ma Banabei Ikonio nagapata biranateqi oho qesa Dzuta abiho sinabidza guhuta dzuubaqi sinabidza hiiremi meenoma naateta. Obetemi Dzuta ma Girisi abi samanei Dzesuho oko ma boto tupu naateta.

²Qate Dzuta abi qesaio sinabidza oho gottae eeteqi nagapa oho abi ttidza kootoromi Kiristuhu abi nokoho dzauba eeteta. ³Oonihe nopoii

beedzae eete dzasidza ma bodza qesa nagapa ota qaaqi Ohongaho neta soomaqi attiamake sinabidza hiire qaata. Oke eesuhimi Ohongaio ingona noo nomeho khooba paanaiteqi nopoho husi ma pai naatemi obaoba bamenoma maina paina ota eeteta.

⁴Eetemi nagapa oho abi batabireqi quesai Dzuta abihota soomata ma quesai qaru abi nophota soomata. ⁵Oho ipita raaba abi ma Dzuta abi quesai qaru abi nophoke omama teetare guunu dzoomata.

⁶Guunu Dzoomami nopoq nookaqi atti Rikaonia habata tuumata. ⁷Paha Ristera ma Dzerebe ma nagapa quesata nopoq tuumaqi ota sinabidza hiire qaata.

QARU ABI NOPOI RISTERATA BAURA EETETA

⁸Qate Ristera nagapata abi teei qaata noi oko atimanoma paiho ttidza qausuta oonomake eete biranateqi tuuma ma baabaamake qaata.

⁹Pauro sinabidza hiromi abi noi nookami Pauro moohimi abi oho ai tatauma isanatemi noi qidzanataquho isaki naateta. ¹⁰Oho qubake Pauro dzaubama sokateqi hiireta, Nii oko niimema qori qobare. Hiiremi abi oi tukuba qoridze qoro tuumata.

¹¹Qoro tuumami Pauroi quba eeteta oke abi tupu mina nokoi mooqi too ttutturateqi Rikaonia noo nokometa hiireta, Ohonga qesaquesai ao abi sama eeteqi abi napaho bisata biranatareqi orai. ¹²Hiireqi noko Banabeke hee, Dzeusi mai ooniqi hiireta. Qate Pauroi noo hibahibata adzahaha naatemi nokoi noke hee, Heremesiniqi hiireta. ¹³Oonita Dzeusihoko kiridza abi hiiremi burimakau ma sihidzake khakhaumaqi nokoi nagapa oho kosoramuta Dzeusihoko naga qaatata tuuma mootota. Ota nokoi Pauro ma Banabeho kiridza qeebare ttutturateta.

¹⁴Oonihe Pauro ma Banabe nookaqi sama ma sasa nopolome utotoqi ao hairiamake abihi bisata tuumaqi Girisi noota sokate hiireta, ¹⁵Idze abinaga, naane qubake nike qubarake eetora? Nakai napa gama abi sama teena, nikoho quesanihe noo qidzake aimaa baa hiirorai. Oi teeho bahe Ononga qaraqaranomai quusu ma ttoka ma besa ma quba minara mootota nohoke nookaqa baura meeama eranomake nike tume biireqa Ohongaho pobi naatareiqa naka baaorai.

¹⁶Oi agoba baaorai raaba abi quesama nikiei tete maina paina nikeme saridze qaata. ¹⁷Oonihe Ohonga mee noi te nike ma nokoho seeno naatara, nike noho khooba gesina naatareiqa hiiremi quu ma ete iso keke biranatemi meupunoma naatemi ttidza qidzanate qaabi. ¹⁸Qate qaru abi nopoq tototo hiire kebaite qaami qaami nokoi kiridza qebaqeba oke qaateta.

PAUROKE TEETEMI EEHAHA NAATE TEREBETA TUUMATA

¹⁹Oonihe Attikia ma Ikonio nagapaho Dzuta abi nokoi biranateqi Pauro omama teetareiqi nokoke hoobire kosikosi eete teetemi baateta.

Oonihe nokoi hee, Bamu eehaha naataquiqi hiireqi kebake nagapa tumeta dzeimaqi tapata biidzarota. ²⁰Oonihe tumakhametoi biranateqi Pauro nakunaite herohero eesuhimi noi paha eehaha naateqi nagapa peiteta. ²¹Peitemi iihai mootomi Banabe ma nopo Ristera nagapa qaateqi Terebe nagapata tuumata.

Ma nopo nagapa ota sinabidza baura eete qaami tumakhametoi samanenipamu naatemi nopo burisi eete Ristera ma Ikonio ma Attiokhiata paha biranateta. ²²Oi nopo nagapa samaneta biranateqi Dzesuho oko ma boto tupu noko ke ai tataumata hoobire noko Sooparama qaarareiqi hiire tatangaiteqi erake hiireta, Napa ima ma bagoho neta qaaqa Ohongaho pobita dzubaridzoniqi hiireta.

²³Hiireqi nopo nagapaho isaki soopara nokoho upubireqi hutingi naate qaaqa pupu ma agoago eeteqi nooka hiiisi etaeta nokohoho isakita Ohongama ipibidzare hiireqi noko ke qaateta.

QARU ABI PAHA SIRIAHO ATTIOKHIATA TUUMATA

²⁴Qaateqi Pauro ma Banabe nopo Pisitia haba dzongobeteqi Papiria habata biranateta. ²⁵Oonita nopo Perega nagapata sinabidza hiiroramuti Attaria nagapa qurateta. ²⁶Qurateqi nopo ota sisimata tuuma qaramuti paha Siria habaho Attiokhia nagapa ota biranateta. Oi sinabidza abi tupu noko Ohongaho kokora quba mootoqi baura nopo pobi hiiremi bosaho eeteta nopo paha ota biranateta.

²⁷Nopo ota biranateqi oko ma boto tupu ttuttuiteqi hee, Ohongai nakaho husi ma pai naatemi raaba abihota baura eetemi noko sinabidzata dzubata, dzoobe! Oke eete isere hiire soubireta. ²⁸Ma nopo bodza kharabariqa ota Dzesuho oko ma boto tupu nokoho bisata qaata.

QARU ABI DZERUSAREMUTA GARUBA EETETA

15 ¹Pauro ma Banabei Attiokhiata qaami Dzutea habaho sobasobaho tuputa abi quesai Attiokhia nagapata tuumaqi sinabidza abi erake hiireta, Nike Moseho noo qusubaite sama nikeme geeba mootaama naataquko baamuqa Ohongaho pobi naataqu. ²Oke hiiremi Pauro ma Banabei nokoma kurebeta minake eete qaaramuti erake hiire suutota. Pauro ma Banabe ma sobasoba abi oi Ttitto ma qesa nokoho neta noo oke Qaru abi mimi ma sinabidza bosa qobaqoba Dzerusaremota nagapana oorai nokoho toro aimaa tuumare.

³Oiqi hiireqi tete nokohoke biiraite tuumaqi Poenikia ma Samariaho sinabidza oko ma bato samaneke eraiqi hiireta. Hee, Paha raaba abi samane sinabidza nookorai. Oho pobi hiiremi nookami nokota ttidza qidza minanipamu biranateta.

⁴Qate noko Dzerusaremota baaqi sinabidza abi mimi ma quru abi mimi ma noko garuba eeteqi Ohongai Pauro ma Banabe nopo hoobiremi

sinabidza baura eetemi meenoma naateta oho noo ma pobike nokoke hiire paanaiteta. ⁵Noo ma pobi oke hiiremi Pariseo qesa Kiristuhu sinabidza ai tataumanoma nokoi eraiqi hiireta, Raaba abi nokoho torota sinabidza hiireqa nokoke sama koko geebanomaitieqa hiiremi noko Moseho hu noo qusubaite soubiremi isanatakoi oiqi hiireta.

⁶Oho quba Qaru abi mimi ma sinabidzaho bosa qobaqoba noo oke nokoqeke hiire ttuttureteqi noo hiire buribaro eeteqi Peetoroi qoridze erake hiireta, ⁷Dzairamane name raaba abi noko bosata teeho toota sinabidza nookaridzoniqi hiireqi Ohongai napahota ape bahe anake asatemti oho too naatemi nokoi nooka tani naateta.

⁸Obetemi Ohongai qupa mohimohi oonita Dzuta abi napake Qaheuba Sumasa moiteta oho qesa raaba abi qaupuiteqi moiteta. ⁹Napai noke nooka hiisi eetemi qupa napahoi sasari naateta oho qesa nokoi nooka hiisi eetemi qupa sasari naatetaho isakita Ohongai te hiimotara.

¹⁰Oi erake eete oorai. Hu noo ma apo oi Dzuta abiho uimane neimane ma napaho moirata gama pereborai. Oonita nike ikaqi hiireqi Ohongake toronaiteqi oke paha raaba abiho qereta goosobaqu? ¹¹Oe, oi baamu isanataqu. Napa erake nookorai: abi qidzanate pobirataqu oi Dzuta abi ma raaba abi gama susupu Soopara Dzesuho baruna heenata keke pobirate qidza naatorai.

¹²Peetoroi noo oonomake hiiremi sinabidzaho abi mimi nokoi nipanate oomi Pauro ma Banabei raaba abiho bisata Ohongai kinisa nokoho botona mootota oho pobike noko korabete pobi hiiremi nooka pobiteta.

¹³Nopo hiire soubiremi Dzakopo oho ipi erake hiireta, Dzairamane, toma tiite nookare. ¹⁴Ohongai raaba abi nokohota abi aimami noho pobi naatare tete saridzeta. Oho noo ma pobike Siimo Peetoroi ao hiiremi napa nooke.

¹⁵Obetemi noho nooi too abihoma iso keke naatorai. ¹⁶Nokoi erake hiireqi qeeteta, Ohonga anai paha qurateqa Tabitiho naga arinateta oke paha usari eeteqi upubiremi bagenoma naatakoi. ¹⁷Oonihe raaba abi qeba nena ma tume nena nokoi Ohongaho qiri eete saridzakoi oi raaba abi nokoi naho pobi naatemi naho dzapai nokoho irita biranatakoi. ¹⁸Ana nikoho Onongai noo oke hiire baa qaatai hiibi oi oni.

¹⁹Dzakopoi hee, Oiqi Amosi ma Dzeremia ma Dzesea nokoi qeeteta, oonita Raaba abi ango Ohongahota qeemami eto napai nokoho irita hu nooho bameke mootaino, naho noo oi oni. ²⁰Oonihe, raaba abi ai tataumorai nokoi eto Ohongaho habara quqa qesa qesa upubidzaino, mae apuata eetaino mae kabira dzaganoma muunaino eo keba ooraike muunaino oho isakita napa noo hiire geeta qeete tatangaiteqa pepa oke Pauro ma Banabeho botota mootare.

²¹Oi teeho bahe Moseho noo agobake ehahaiteqi sohoroqi nagapaho isakita isaite baa qaabi ma bodza erata sinabidza nagaho isakita isaite nookorai. Oho qubate oi dzaetainoho isaki oioni. Oiqi Dzakopo hiireta.

GARUBAI RAABA ABIHO QUBA PEPA QEETETA

²² Oke Dzakopoi hiiremi qaru abi ma bosa qobaqoba nokoi sobasoba tupu pobi hiiremi isanatemi abi eserike uhutota. Dzapa nopoqo Dzuta, oi Sabaho khata, ma Siira nopo dzaira pepa oke aimaa tuumareiqi sinabidzaho bosa qobaqoba nopoqo uhutoqi Pauro ma Banabe nokoke Attiokhia nagapata dzoobireta.

²³ Ma Nokoho quba pepa dzoobireta, Oi hee, Raaba abiho bisata Attiokhia nagapa ma Siria ma Kirikia ma haba quesata oorai qaru abi ma bosa qobaqoba nanai dzairamane naname nikeho qaki naateqi pepa erake nikeho quba dzoobire. ²⁴ Oi nanai moo nookaama naasuhimi abi qesa nanaho neta qeemaqi cupa nikelohoke rasakitemi nikelohota kurekure biranateta.

²⁵ Oho quba nana oke nooka ttutturateqi abi eserike dzoobiremi Pauro ma Banabe ma noko nikeloh toro qeemorai. ²⁶ Abi naga oi Soopara Dzesu Kiristuho dzapa quba sama nopome bagara biirorai. ²⁷ Obete abi eseri uhutota Dzuta ma Siira nopoqo qeemami noo oke nookare.

²⁸ Oi Sumasa ma nanai cupa teenaitaqi eraqake keke hiire. ²⁹ Nike eto Ohongaho habara quba qesaqesa upubidzaino ma kabira dzuuma ooraike muunaino, ma dzaganomake muunaino, paha etoqa pasena eetaino. Nike nooraqake qusubaitemi bagenoma naatakoi. Dzoobe, aipo!

³⁰ Noo oke qeeteqi nokoho botota mooto dzoobireqi aipo biiremi tuumata. Tuumaqi Attiokhia nagapata biranate oko ma boto tupu ttuttuite pepa moiteta. ³¹ Moitemi isaiteqi dzaira noo qeeteta oke mooqi oho ttidza qidzaqidza eeteta.

³² Oonita Dzuta ma Siira nopoqo sinabidza abi oonita quesamane sinabidzaho noo samane pobi hiire tatangaiteqi too teeteta. ³³ Qate nopoqo nokoma oora ma qaara eetarotaho bodza baamu naasuhimi nokoi oho ttidza qidza eeteqi nopoqo paha dzoobiremi Dzerusaremuhu quesamane nopomeho toro tuumarota. ³⁴ Oonihe Siirai nokoma oorareiqi hiiremi Dzutai keke tuumata.

³⁵ Qate Pauro ma Banabe Attiokhia nagapata ooqi sinabidza abi quesama nokoi hobihobi eeteqi sinabidza hiireqi Ohongaho nooke bodza minaminaho isakita abi ma khata pobi hiire qaata.

PAURO MA BANABEI QESA PAPATETA

³⁶ Ohongaho noo Attiokhia abike banaite qaaqi Pauroi Banabeke eraiqi hiireta, Baa naka burisi eete paha nagapa samanena raaba abi sinabidza pobi hiiremi nooka qaata oke tuuma karabidzare, nokoi ikanomake eetora?

³⁷ Oho qubake hiiremi Banabe noi paha Dzohane Marekoma nokoi gama tuumareiqi hiireta. ³⁸ Oonihe Mareko noi bosata nopoqo Papiria

habata baura agiagita biranateqi nopoqe qaateqi burisi eeteta oho qubake Pauro abi onomake qupadzomami teqaha nohota isanatara.

³⁹Oho qubake Pauro ma Banabe kure ma taara minake eeteqi batabireta. Batabireqi Banabe noi Dzohane Mareko dzeimaqi nopo sisima pei Kipuro sungata tuumata. ⁴⁰⁻⁴¹Qate Pauroi hobihobi nome Siira aimami nopoqe sobasoba tupu agoago eeteqi dzoobireqi hee, Ohongaho kokorata tuumareiqi aipo biiremi tuumata. Tuuma Siria ma Kirikia haba dzongobeteqi Dzesuho oko ma boto tupu qesaquesa saridze tatangaiteta.

PAUROI PAHA SINABIDZA TUPU QESA KARABIDZARE TUUMATA

16 ¹Pauro ma Siira nopoit tuuma qaaramuti Tterebe ma Ristera nagapata biranateta. Obetemi Ristera nagapa ota Dzesuho tumakhata tee qataa dzapa noho Timottee noho pai Dzuta atapa ai tataumanoma, ma mai nohoi Giriki abi ooni. ²Oonihe Ristera ma Ikonio nagapa nena sinabidza nokanoka nokoi Timottee khooba qidza hiire paanaiteqi Pauro pobi hiireta.

³Pobi hiiremi Pauro noma nokomae tuume baabe eetareiqi hiireta. Oonihe ttoka ota Dzuta abi qaata nokoi khatake hee, mai nohoi Giriki abi oniqi qupadzoma soubireta. Oonita oho noo kebaitareiqi Pauroi Timottee aimaa sama geebanomaiteta. ⁴Sama geebanomaiteta qidza hiire paanaiteqi Pauro pobi hiireta.

⁵Baura oke noko eete qaami Dzesuho oko ma boto tupu noko ai tataumaqi kata gaamata ma ete samane raaba abi nokoho torota biiresore eete qaaqi nokanoka abi tupui samane naateta.

SUMASAI BAKUTA PAUROKE ABI BANAITETA MA RUKAHOO NOO

⁶Oonita Pauro ma Siira ma Timottee nokoi Asia gattiagaho habata sinabidza hiibarotahe Qaheuba Sumasai oho bodzata qamuni hiiremi nokoi Perigia ma Garattia haba dzongobete tuumata. ⁷Tuumaqi Misia haba kokota biranateqi totaqike paketomaqi Bittinia habata tuumare hiiremi Dzesuho Sumasai paha nokoho bai hiireta. ⁸Oho quba nokoi Misia haba paketoma tuuma qaaramuti besa pakita Ttoroa nagapata biranateta.

⁹Ota biranateqi qupidake Pauro noi bakuta moohimi Maketonia abi tee noho toro biranate tti ma sori hiireqi erake hiireta. Nii Maketonia habata qeemaqi nanake hoobidzare. ¹⁰Oonita Pauro noi quba oke bakuta mooqi eraiqi hiireta, Maketonia habata tuuma pobi qidza hiibareiqi Ohongai hiibi oi oni. Oke hiiremi Ruka anai nokoho gainene naatareiqi nokoma tuumare roibeteta (oi anai ttotta ooqi nokoke kokora eetarota).

ATAPA RIITIAI KIRISTUHO POBI NAATETA

¹¹Ruibeteqi Pauro ma Siira ma Timottee ma Ruka nanai gama sisimata peiteqi Ttoroa nagapa qaateqi tete paake tuuma qaaramuti Samottara

kusuta biranateta. Iihai mootomi tuuma qaarumuti Neapori nagapata unateta. ¹²Ota sisimata tta eeteqi tuuma qaaramuti Maketonia habaho nagapa qiba Piripi ota biranateta.

Oonihe Roma abi nokoio oho maikhametoi qaata. ¹³Nagapa ota bodza gesata nanai qaami dzuma dzamo naatemi nagapa kokota oba teei qaata ota erake hiirequi qurateta. Dzuta abi pupu hiirorai oho qopa oioni oba tee oraita napa qura moorare. Oke hiirequi qurahimi paimane ttutturate oomi saridzeqi ota habeseqi sinabidza pobi hiireta.

¹⁴Hiremi nokoho tuputa atapa teei Ohongake ququima qaata, dzapa noho Riitia, noi ttoba ma sasaho pai, Ttiattira nagapa nena. Oonita Sooparai hiiremi atapa oho qupa uhubami Pauroho noo toma qepe tiiteqi nookata. ¹⁵Nookaqi Riitia noomae oko ma boto nomema noko sinabidzaho sobasoba quba hiiremi soorota. Sooromi noi hee, Nike ana moomi Sooparaho pobi naahibiqako naho nagata peitemi ana nike kokora eetakoiqi hiiremi nana peiteta.

¹⁶Qate bodza teeta pupuho sobadzata qurahimi sutasuta atapa teei nanake saridzeta. Atapa noi songenanomai qaaqi khooba ma bangaro paana eete qaami maikhame toho sinasina nohoho quba abiho torota ttuma aimi qaata. ¹⁷Noi Pauro ma nanake saridzeqi sokateqi hiireta, Abi nagarai Ohonga Minaho qaru eeteqi tete nohoke hiiire paanaitorai.

Oonihe noi onomake eete kira ma husu bodza samaneke hiirota, ¹⁸Hiiromi Pauroi oho gottae eeteqi burisi eete songena erake pobi hiireta, Ana Dzesu Kiristuho quba eeteqi nii pobi hirenita atapa oke nii ao qaate papatare. Oke hiiremi songenai ao biranate tuumata.

ABIHO TTUMA BAMU NAATEMI PAURO MA SIIRAKE SUUTOTA

¹⁹⁻²⁰Pauroi songenake iihami tuumami atapa khata oho maikhametoi moohimi ttumaho isaki nokoho oi ao bamu naatemi nokoi Pauro ma Siira aimaqi nagapa bisata kiapeho toro dzeima tuumaqi nopho qomaqoma hiirequi eraiqi hiireta. Nopoi Dzuta abi nagapa nanahota baaqi qupa rasaki eetoraidzo. ²¹Oke eesuqi poma agiagi samane Roma abi eetaamata eetoraidzo.

²²Oke hiiremi abi tupu minai qoro oota nokoi dzauba minake eeteqi nophoke tetatetake teesuhimi kiapei sasa nophohoke ao kuima teetare hiiremi gouma teeteta. ²³Gouma buribaroke teeteqi sutasuta nagata biireqi sooparai tete siiremi tatanga naatemi hee, Bageqake eete soopara eetareiqi hiireta.

²⁴Oonomake hiiremi sutasutaho sooparai naga naku bisa qaputa mootoqi oko nophohoke puuta tooma suutota.

SUTASUTA SOOPARAI PAUROHO TOROTA SINABIDZA SARIDZETA

²⁵Suutomi Pauro ma Siirai naa ma pupu hiiromi sutasuta abi qesai oke toma tiite nookota. ²⁶Nookomi saubapo dzeubami Idze! tumu mina

rubabetemi sutasuta nagaho hahari poupa eetemi tete sirasira hiuba soubireta ma abi gama puuta too hiuba soubiireta.

²⁷Eetemi sutasuta soopara noi meera neta nookaqi qoridze moomi tete sirasira paatinoke oomi noi hee, Idze! sutasuta abi nokoi ao atti tuumeiqi hiireqi qaa dzube quhisata dzeima sama nome ao kootobare eeteta,
²⁸Oke eetare eesumi Pauroi sookateqi hiireta, Eo, sama niime eto sesero eetaino, nanai gama susupu ooraidzo!

²⁹Hiiremi qaa sooparai dzongi quba hiimi oko ma boto nohoi moitemi bukhittidzake naga dzuubami suu gaa eetemi noi tititima qeemaqi Pauro ma Siira nopocho dzagata taateta. ³⁰Taatemi Pauro hiiremi noi qori naga neta nopoche dzeima biranate qasa hiireta, Abi ohonga name, ana dzaetare eeteqi kebai ooraita ikanomake eeteqi qidzanataqu?

³¹Hiiremi nopoai erake hiireta, Nookao Soopara Dzesu Kiristuke ai tataumaqake qidzanatakoi. Oonihe nii quni ma mani niimema gama qidza naatakoi. ³²Oke hiireqi nopoai oko ma boto nohoma nokoke Dzesu Sooparaho noo hiire paanaiteta.

³³Hiire paanaitemi nookaqi noi ao nopoche dzeimaqi gou qetta nopochoe akotete suutota. Suutoqi hiiremi nopoai quni ma mani nohama nokoke sinabidzaho obama soorota. ³⁴Sooromi noomaeho nagata mootoqi hiiremi patta khauto urai eetemi muunata. Oonihe qaa abi oi quni ma mani nomema nokoi Ohongaho pobi naatetaho quba ttidza qidzaqidza minanipamuke eeteta.

PAURO MA SIIRAI SUTASUTATA TTA EETETA

³⁵Iihai mootomi kiape noko pirittoni seike erake hiire dzoobireta, Abi eseri nopoche dzaheqake soqobare. ³⁶Oke hiiremi sutasuta sooparai nookaqi Pauro erake pobi hiireta, Ana nipe saqoromi tuumareiqi kiape noko noo dzoobiremi baabe, oho quba nipe biranate tuuma keba ma dzapata qaarare.

³⁷Hiiremi eehe, Pauroi bai hiireta. Hee, Baamu, nokoi Roma abi nakake noota mootaamake ao abiho soobadzata nakake gabeho biireqi sutasuta nagata biireta. Biireqi paha eranomake eete tteike naka dzoobidzaqu? Oi baamu! Nokomae baaqa paata naka dzeimami nana isanate tuumakoi.

³⁸Pauro noo oke hiiremi pirittoni nokoi burisi eete tuumaqi kiape pobi hiiremi nopoai Roma abiho isaki ootaho pobi oke nookaqi roqobeteta. ³⁹Roqobeteqi qupa muunaqi nopocho toro baaqi ttapuiteqi sutasuta naga neta dzeima baaqi hee, Nike isanate nagapa nanahoke qaate tuumaqu mae? Oke hiireta.

⁴⁰Hiiremi nopo sutasuta nagata biranateqi Riitia noho nagata tuumaqi Dzesuho okoma bato tupuke qogo ma saaga hiireqi tuumata.

PAURO MA SIIRAI TTESARONIKA ABIKE SINABIDZA HIRETA

17 ¹Oonita Pauro ma Siira nopoai Apiporo ma Aporonia nagapa eseri oke riite Ttesaronika nagapata biranate oota. Oi Dzuta abi nokoho sinabidza naga tee ota oota.

²Oonita Pauro nome eete qaata oke eeteqi dzuma taparike nokoma sinabidza naga nokohotauzu baqis sinabidza hiire nookata. Hiireqi sinabidza ma noo qesaho khooba hiire paanaiteqi erake hiireta,
³Kiristui baateqa qoridzarotaho teteke noi saridzaama naatapuko bamu isanatarota. Oke sinabidzata hiiremi ooraita Dzesuho dzapa pobi ana nike pobi hiirorai noio Ohongaho abi mina Kiristunipamu oni.

⁴Hiiremi qesa nokoi noo oke nooka hiisi eeteqi Pauro ma Siirahota soomata. Eetemi Giriki abi Ohongaho ququima qaatai oho qesa nokoho neta ipibireta, ma paimane mimi samanei paha biranateta.

⁵Eetemi abi samanei sinabidza nookami Dzuta abi noko nookami nokota qanga naatemi nokoi abi ngiingi nganginoma ma basesanoma ttutuiteqi sokasoka hiireqi Dzasoho nagata Pauro ma Siira ootata ttutturateta. Ttutturateqi nopo ke aimaqi abiho tuputa mootareiqi hiireta. ⁶Hiiretahe nopho qiri eeteqi saridzaama naate nokoi Dzaso ma sinabidza nakanoka qesa aimaqi nagapa soopara nokoho toro dzeima tuumata.

Oonihe erake hiireqi sokasoka hiire tuumata, Haba samaneta cupa rasaki eetorai abi oio nanaho toro biranate. ⁷Oonihe Dzasoi nokoke kokora eetorai ma nokoi Roma abi qiba Kaisaho noo riiteqi abi ohonga agiagi tee, dzapa noho Dzesu, noho pobi hiiremi haba gegebete. ⁸Noo oke hiireqi nagapa abi ma soopara bitta ma kaka eeteta. ⁹Eetemi nagapa soopara hiiremi Dzaso ma qesamane noho nokoi sama nokomeho ttuma naru hiire moootomi nagapa sooparai nokoke saqromi tuumata.

BEREA ABI PAURO MA SIIRAHOTA SINABIDZA NOOKATA

¹⁰Ma sinabidza nakanoka nokoi Pauro ma Siira qupibake dzoobiremi Berea nagapata tuumata. Ota biranateqi nopo Dzuta abiho sinabidza guhuta peiteqi sinabidza hiirepu.

¹¹Obetemi Berea nagapata ota Dzuta abi nokoi keba ma dzapaho pobi qate Ttesaronika nagapata nena nokoi abi naga bise baisanoma. Berea abi nokoi sinabidza nooka quba dza minake eeteta. Eeteqi noo nopho kee, meeni mae oberaniqi hiireqi cupi samane kuku ma khooba qiri eeteqi suutauzu baqis sinabidzaho gee isaite nooka qaata. ¹²Oke eeteqi nokohota samanei Dzesuho oko ma boto naateta ma paha nokohota Giriki abi ma paimane mimi qesa samanei nokota ipibireta.

¹³Oonihe Pauroi Ohongaho noo Berea nagapata hiire paanaitemi oho pobi Ttesaronike nagapata tuumami oho quba Dzuta abi nookaqi Berea nagapata baaqi nagapata maikhame toke bitta ma kaka eetemi cupa mutu ma biribiri eeteta. ¹⁴Oke eetemi Siira ma Timotteo nopo Berea ota keke qaata. ¹⁵Oonihe sinabidza nakanoka nokoi Pauro pobi hiiremi noi nagapa oke qaate tuuma qaramuti besata biranateta. Oonita abi noko Pauro dzeima tuuma Atteni nagapata moootomi noi erake pobi hiireta, Nike

burisi eete hiiremake Siira ma Timottee nopoai adzanoke erata baabare. Oiqi hiireta.

PAUROI ATTENI NAGAPA ABI QUPANOMAITETA

¹⁶ Oke hiiremi Berea abi nokoi burisi eeteta. Ma Pauro noi Atteni nagapata Siira ma Timottee nopho beebe ooqi neemi gisigisi samanei ota oomi mooqi qupa nohota eepa gaiteta. ¹⁷ Qaitemi noi Dzuta abi nokoho sinabidza guhuta dzubaqi Dzuta abi (nokomae ma Giriki abi quesai Dzuta abihota atima qaata) nokohota gama sisinabidzaho noo hiiremi nookata. Ma noi paha qupi samane otoba patita abi saridze sinabidza pobi hiire ke tuumata.

¹⁸ Qate nagapa ota abi nokonoka minanoma samanei qaata, dzapa ttari nokohoi Epikure abi (nokoi quba samane etteimorai) ma Sittoike abi (huttinginoma). Oho neta abi nokoi Pauro saridzeqi quesai hee, Ae, ttetterapo ooraqi ikaitorai! Hiiremi quesai Pauroho erake hiireta, Bamu, noi ohonga dzapa samanehota agiagi teehoke hirorai kaqani. Oke hiireta oi teeho bahe Pauro noi Dzesuho pobi hiireta ma noi baata nena qoridzeta noo hiiremi nokoi totoho oonomata hiireta.

¹⁹ Oke hiireqi tora kokota uta apiapi naga minanipamu teeho dzapa Areopago ota dzeima peiteqi noke hee, Isanate nii noo agiagi hiibi, naane qubake hiibi? ²⁰ Noo oi toma agiagi nanahoni, oho khoobama hiire nookare. ²¹ Oiqi hiireta oi Atteni nagapaho abi dzore ma nagapa maikhata nokoi noo ma pobi agiagi hiire nookoraqu ooqaho dzaodzaoke eete qaata.

²² Oionita Pauro noi Areopago noo sobadzata tuuma qooroqi abi erake pobi hiireta, Dzoobe Atteni nagapaho abi mimi. Ana khooba nikeho erake moorai. Nike sinabidza ma ohonga maina paina samaneho pomata atimorai. ²³ Ana nagapa nikehota tuuma ma baaba eesuqi neemi gisigisi nikeho moo qaaramuti aratta teeta qetaqeta teeke ana isaitemi hee, Erai Ohonga agiagi teeho tekaniqi hirorai. Oonita nike ohonga agiagike ao qupadzomaqi noho kokora sohororai Ohonga teena oke ana nikeho quba rerengi eetake boobita nookare.

²⁴ Ohonga noqeke ttoka mootoqi oho heeta quba samane mooto soubireta noi ape bahe qusu ma ttokaho maikhatanipamu. ²⁵ Abi guuhuke botoma gootorai ota noi oora ma qaara te eetoraidzara. Ma noi quba teeho qiri eetemi abi baura eetemi biranatoraiho tete baamu. Oi noi keke abi napa qaraqara ma hee ma hoonomake saridzeta paha quba minara saridzorai.

²⁶ Noi abi biidza teenaqake saridzeqi noho neta abi tupu samane huba haba biireqi noko ma napai tuuma qaararotaho bodza ma hu ma koridza noi keke hiireta. ²⁷ Noi hee, Abiho qupa khatai qiri qee ma baa peite qaama abi noomae Ohongake saridzaqu mae, oiqi hiireqi Ohongai oke

eeteta. Oi noi kharaqata bahe bisa napahota abi napake gama isanate oorai.

²⁸ Oi paha naa sutasuta abi nikehota teei hee, Napai noho qaraqaraho nakuta ooraiqi quba minara eetorai oi teeho quba bahe napai Ohongaho biidza ma suunaniqi hiiremi naa oi oke hiirorai. ²⁹ Oonita napai meeke noho biidza ma suuna ooraiqako ikaqi hiireqi abi napai boto napamema gori ma siriba ma omama gisigisi nee ma baunoma ohongaho qaseqase korabеторai? Oi Ohongai oho isaki ooniqi eetoqa napai qupadzomaino.

³⁰ Oi abi ruumema baa qaata oke Ohonga moo te oho kahosa hairiamake eete qaarara oonihe oho bodza ao bamu naate. Poiqa ttoka abi gama susupu qupa burisi eetareiqi hiirorai. ³¹ Noi bodza ao hiireqi, ota haba samane abi napaho khooba paanaitakoi, ipi ma ariho isaki moitakoi. Ma abi teei baura oke eetareiqi Ohongai noke upubireta. Oonita ttoka abi gama susupu abi oke nooka hiisi eetareiqi Ohongai noke baata neta tukutomi oorai.

³² Qate Pauro noi Dzesu Kiristu ao baata neta qoridzetaho noo hiiremi quesai ao gattagatta hiireqi noke ngiingi ma baaba eeteta. Qate quesai tete siireqi hee, Oionita noo oke bodza teeta paha hiire nana nookaqu kaqani. ³³ Oke hiiremi Pauroi noko qaate tuumata.

³⁴ Oonihe abi quesai Paurohota atimaqi Dzesuho pobi naateta. Nokohota sinasina abi mina Areopagona qaata dzapa Tionision, ma atapa tee dzapa noho Dzamari ma paha abi quesai nooka hiisi eeteta.

PAUROI KORITTI NAGAPATA BAURA EETETA

18 ¹ Oonita Pauroi Atteni nagapa qaateqi Koritti nagapata tuumata. ² Ota Dzuta abi teeke saridzeta dzapa noho Akuira (noi Potu habata biranateta) ma ata noho Pirisira. Oi noma nopoit Itaria habata oomi abi qiba Kaisa Karauttio noi Dzuta abike Roma qaanateqi iihata. Iihami nopo nagapa oke qaateqi burisi eeteqi Koritti nagapata biranateta.

³ Biranatemti Pauroi nopho toro noo hiibareiqi peiteta. Peite moohimi parai korakora noomae gesina naate qaata baura teena oke Akuira noi ooqata eetota. Oho quba noi nopolma noko qesa baura nokome ipibireta.

⁴ Ma Pauro noi dzuma samaneta Dzuta abiho sinabidza guhuta peiteqi Dzuta abi ma Giriki abi nokoho quba sinabidza dzuubeteqi adzahahaiteta.

⁵ Qata Siira ma Timottee nopo Makettonia habata baaqi moomi Pauroi sinabidza baura mekeqoma eeteqi Dzesu noi Kiristunipamu oho khooba Dzuta abike hiire rerengi eete soubireta. ⁶ Oonihe hiire soubiremi nokoi noo nohoke basesa eeteqi ngiingi robe eetemi noi sasa nome baabaaba eetemi miriququ perebami erake noko pobi hiireta. Nikei baatareiqa baatare, oonihe kahosa nikehoi bamu nahoh naataqu. Oionita ana Dzuta abi nike qaateqa raaba abi nokohota keke baura eetorakoi oiqi hiireta.

⁷ Qate abi teeho dzapa Titio Dzusto noi Giriki abi oonihe noi paha Dzuta abiho sinabidza qahiqahi ooni. Oonita Pauroi noho nagata peiteqi

ota sinabidza hiire qaata. Oi naga nohoi Dzuta abiho guhu saamaqata oota.⁸ Oonihe Dzuta abiho guhu soopara, dzapa noho Kirispo, quni ma mani nohoma nokoi sinabidza nookaqi Dzesuho oko ma boto naateta. Eetemi Koritti abi nokoho neta samaneqai sinabidza nookata, nooka hiisi eetemi sinabidza obama soorota.

⁹ Ma quipi teeta Sooparai bakuta Pauroho torota biranate erake hiireta, Nii eto atti ququimaqa sinabidza qaatainoh, oke hiire qaarare. ¹⁰ Oi ana niike hohoba eesuhima abi noko bamu quba teeke niike eetaqu. Oi nagapa erata naho abi tupu quba minai oorai. ¹¹ Oke hiiremi Pauro noi sohoro sama nomeho hutingike naate nagapa oho abike Ohongaho noo hiire banaite qaami tii bodza teena ma qetta naateta.

¹² Oonihe Gario noi Giriki haba Akhaiaho totaqita kiape mina naate qaata bodzata Dzuta abi nokoi qesa hongasireqi Pauro ibo eete kiapeho toro aimaa tuumata. ¹³ Nokoi noho qomaqoma hiireqi hee, abi erai quba nanai hu noo qusubaite eetorai oke riiteqi hiiremi abi qesa Ohonga agiagi teeke ao qusubaitareiqi eetorai.

¹⁴ Hiiremi Pauroi noo totaqi hiibare eesumi Gario qamuni hiireqi Dzuta abi pobi hiireta, Abi erai roota kahosa bamenoma teeke saridzapuko oi ana isanate nikeyo noo nookarori, oonihe baamu. ¹⁵ Nikei noo sepeho quba ma noo khooba nikemeho quba ma sinabidza nikemeho quba noke geema mootorai oonita nikemae noo oke hiire tatangaitare oi naho baura baamu.

¹⁶⁻¹⁷ Hiireqi noi nokoke iihami biranateta. Biranate midza nokome quba eeteqi abi nokoi Dzuta abiho sinabidza guhu soopara dzapa noho Sostene noke kiapeho pengata buribaroke teete iihami kiape moo nomena naateta.

PAUROI PAHA SIRIA HABATA TUUMATA

¹⁸ Oionita Pauroi Koritti nagapata paha isakiqata qaaqi burisi eetareiqi nokanoka tupuma nokoi qesa aipo biireqi Pirisira ma Akuira noma nokoi sisima peiteqi Siria habata qesa gainene eete tuumata. Oonihe Sekherea nagapa gattiqaho unaunate biranate Pauroi sama nomeho hutingi naatota oke qaateqi some nome topotota (oi teeho bahe noi moomi Ohongai noke Koritti ota herohero eetarota oi ao meenoma naateta). ¹⁹ Ma ooneta paha tuuma qaaramuti nokoi Epeso nagapata biranateqi Pauroi dzairamane eseri nomeke sisimata qaateta.

Qaateqi Pauroi Dzuta abiho sinabidza guhuta peiteqi nokoma sinabidza qesa pobipobi hiire nookata. ²⁰ Noi isanate nokoma qaarareiqi Dzuta abi noko qaanatare hiiremi bai hiireqi erake hiireta. ²¹ Anai tuumake boohibita, ipita Ohongai nookami ana nikeyo toro burisi eetakoi. Oiqi hiire aipo biireqi sisima peite Epeso nagapa qaateqi tuumata.

²² Tuuma Kaisarea nagapata biranateqi ota sisimata tta eeteqi Kiristuhu oko ma botope dzoobe hiireta. Hiireqi burisi eete girodzomaqi Attiokhia nagapata biranateta.

PAUROI PAHA POBI NOME KARABIDZARE TUUMATA

²³Biranateqi Pauroi Attiokhia nagapata gattiqo ooreqa boohiqi sinabidza qaru dzongobeteqi nagapa quesake karabidzare tuumata. Oi Garattia ma Pirigia habata Dzesuho sinabidza quni ma manike noo hiire tatangaiteta.

²⁴Qateqa Epeso nagapata Dzuta abi teei baata dzapa noho Aporo, Aresattaria, Aprikaho nena. Noi nooho kotanganipamu oomi noi sinabidza hiire qaami oi kinisaho isaki naate qaata. ²⁵Oonihe Ohongaho sinabidza qesa noke banaitemi ooqake keke gesina naate qaata. Noi Dzohane sobasoba maikhata noho pobike nookata Dzesuho sinabidzake paha heeqata abi banaite qaata. ²⁶Oonihe noi oho koko nookaamake qaaqi oke qaate qaata. Abi oi Dzuta abiho guhuta peiteqi attiamake sinabidza hiireqi suu ma heeta hiirota.

²⁷Hiromi Akuira ma Pirisira nopoit nookami koko isanataama naatemi noke dzaira eeteqi Sumasaho sinabidza kokoke noke banaitemi pobirateta. Pobiratemi noi ao Girisi habaho totaqi Akhaidzata tuumare hiiremi sinabidza nokanoka abi nokoi qesamaneho quba dzaira pepa qeeteqi moitemi aima tuumata.

Onita Aporo tuuma qaaramuti Koritti nagapa biranateqi abi Ohongaho baruna heenata sinabidza nooka hiisi eeteta nokoke hobidza minake eeteta. ²⁸Oi noi sinabidza pepa bosabosa oho neta giimaqi Dzesu noi Kiristunipamuniqi hiire oho khoobake abiho pengata hiire paanaitemi Dzuta abi oona qaata nokoi bai hiibaquo isakama naateta.

PAUROI EPESO NAGAPATA BAURA EETETA

19 ¹Oonita Aporoi Koritti nagapata oomi Pauroi tora ma haba dzongobeteqi tuuma qaaramuti Epeso nagapata biranateqi sinabidza nokanoka abi saridzeta. Oonihe nokoho sinabidza teqahama naatemi noi qasa hiireta. ²Nike sinabidza nookaqi Sumasaho pobi naate oorai mae baamu? Hiiremi noko hee, Baamu, Qaheuba Sumasa ooraiho pobike te nookoraidzara.

Oke hiiremi Pauroi hee, Oonita nike apeho teteke qupadzomaqi sinabidzaho sobasoba aimata? Hiiremi nokoi hee, ³Nanai Dzohane sobasobaho sinabidza qupadzomaqi sobasoba saridzeta.

⁴Hiiremi Pauro erake noko pobi hiireta, Maqa, Dzohanei abi qupa burisi eetareiqi nokoke obama sooroqi hee, Teei anaho tumena baaorai noke nooka hiise eetareiqi hiireta, Oi ape bahe Kiristuhoke hiireta.

⁵Pauro oke hiiremi abi nokoi noo oke nookaqi Soopara Dzesuho dzapa qupadzomami obama soorota.

⁶⁻⁷Sooroqi Pauroi qiba nokohota boto nome mootomi Qaheuba Sumasai nokoke raraku biiremi oionita nokoi ao Ohongaho too naate noo maina painata sinabidza hiireta. Oonihe abi oke eeteta oho dzare oi tuerebe oni.

⁸ Eetemi Pauro noi Dzuta abiho sinabidza guhuta beubeuamake peiteqi dzasidza tapariho isakita noo hiireqi Ohongaho pobi ma tete hiire hunateqi oho khoobake rerengi eete hiireta.

⁹ Oonihe abi quesai basesa eete noo nookaama naateqi garubaho pengata Kiristuhu tete qanga hiiremi Pauroi nokoke qaateqi sinabidzaho dza eeteta nokeke ttuttuiteqi ete samaneke abi teeho dzapa Ttirano noho sukuru nagata sinabidza banaite qaata. ¹⁰ Oke eete qaami abi Asia gattiq habana qaata nokoi gama susupu Dzuta ma Giriki abi sinabidza nooka qaami tii eseri baamu naateta.

SIKEBAHO KHAMETO PAUROHO QASAQASA OBERAMA EETETA

¹¹ Obete Ohongai Pauroho husi ma pai naatemi noi obaoba nese agiagi eeteta. ¹² Eetemi abi nokoi Pauroi bauraho ttoba ma dzamudzamu ttoba aim aqata oke aimaqi khettedzanoma nokoho toro aim auumami hesateqi qidzanaate qaata ma songena nokoho irina qaata atti tuumata.

¹³⁻¹⁴ Oonihe Dzuta abi qesa kaabanoma nokoi oota oi Dzube abi teeho dzapa Sikeba noho khameto sebeni nokoi oota. Nokoi bodza teeta girodzomaqi hee, Napai qaseqase eeteqa Soopara Dzesuho dzapa hiireqa songena abiho irina ooraike iihareiqi hiireta. Nokoi hee, Napai Songena erake pobi hiibare, Dzesuho dzapa pobi (Pauroi hiirorai) nii noho too quba paapatare. Oke hiireqi nokoi qemata.

¹⁵ Qeemaqi nokoi noo oke abi songenanoma pobi hiimi songenai noko noo ipi erake hiireta, Ae, Dzesuke ana qupadzomorai ma Pauroke oho qesa ana qupadzomorai. ¹⁶ Qate nikel ika nena? Oke hiire abi songenanomai qaa eeteqi sasa qaite khametoke teete sigubireqi sasa nokoho qohata teetemi habanake dzuu suura naate nagata tta eete sakaba tuumata.

¹⁷⁻¹⁸ Ma quba oho pobi Epeso nagapata baami Dzuta abi ma Giriki abi nookaqi atti minake eeteta. Eeteqi nooka hiisi eeteqi biranateqi baabe ma basara nokome quba eete qaata oke ngiingi ma baaba eeteqi oonoma gama gaubireta.

¹⁹ Qate abi adzapei baru ttari eete qaata nokoi pepa nokome khakhauma biranateqi otoba patiho eepata keereta. Oonihe gee oho ttumake noko ttuttuitapuko siriba gettara 50 ttauseni naatarotahe noko ooma Ohongaho kiridza keereta. ²⁰ Oi abi nokoi oonomake eetemi Ohongaho noo pobi qoridzeqi souba sakabata.

EPESO ABI PAUROHOKE NOOKAMI QANGA NAATETA

²¹ Oonita Pauroi baura oke eete qaaramuti soubireqi hee, Ana Maketonia ma Akhaidza abike tuuma karibireqa Dzerusaremota tuumaqa oho tongo neta oho qesa ana Roma moorakoi. ²² Oiqi hiiretanihe hobihobi nome eseri Timottee ma Erasto nopo bosa dzoobiremi Maketonia habata qoro tuumami noomae qaata ota paha gattiq a oota.

²³ Ma oho bodzata Epeso nagapata sinabidzaho taara minai biranateta.

²⁴ Oi siribaho nee ma bau korakora abi tee qaata dzapa noho Temettero abi oi Attemi neemi oberaho guhu gisigisi gamittimittike siribama korabetemi abi noko ttuma eetemi noma baura oonoma eete qaata nokoho toro oma minai biranate qaata.

²⁵ Obetemi Temettero noi baura abi qesa nome ttuttuite erake hiireta, Dzairamane napaho baura oi oma napaho saridzorai oke nike gesinani.

²⁶ Oonita abi teei baaorai, Pauro oioni, nike noho khooba gesina. Noi Epeso nagapa napaho Asia Gattiqahabana nena abi adzepeke qupa rasaki eeteqi hee, Abi botoma neemi gisigisi korabetorai oi quba meeama.

²⁷ Noi hee, Pauroi oke hiiremi baura napahoho dzapa pobiamana naataqu oi keke bahe, neemi napaho Attemi noho guhu barari biidzakoi, ma Attemi nomaeho dzapake Asia Gattiqahabana haba ma haba qesaho abi gama susupu ququimorai oonita dzapa pobi nohoi isanate napahota baamu naataqu mae?

²⁸ Temettero noo oke noko pobi hiiremi nookami qupa nokoho dzauba eetemi sookateqi erake hiireta, Epeso nagapa neemi Attemi noi minanipamu. ²⁹ Hiire qarutomi nagapa abiho qupa tukutomi oko tumutumu biireqi biranate ttutturatoramuti sobadza nokometa tuumata. Obetemi Maketoniaho abi eseri Pauroke hoobire oota, dzapa nopohoh Gaio ma Arittako, nopoche noko karabete aima tuumata.

³⁰ Tuumami Pauroi nookaqi abi oho garubata tuumare hiiremi quesamane noko qaanateta. ³¹ Qate haba oho abi mimi qesa Pauroho dzairamane qaata nokoi paha garubata tuumaino hiireqi noo dzoobiremi Pauro noo nookata.

³² Obetemi garuba nokometa noo nganganoma hiimi qesa mina oota nokoi hee, ikanomake hiire eetoraiqi hiireqi hou eeteta. ³³ Abi nokoi oke eete oomi Dzuta abi nokoi gesina abi nokome dzapa noho Aresatte noke abiho bisata mootomi qooroqomi nokoi noke qiruqiru biiremi noi noo hibahiba qohareta peiteqi noo geemare boto qamuni eeteta.

³⁴ Obetemi abi nokoi noke mooqi hee, Dzuta abi ooniqi hiireqi too samanei ttutturateqi hee, Ohonga bahe Epeso nagapaho neemi Attemi noqaho dzapa pobi minanipamu oni.

³⁵ Oonoma hiire qaaramutti Epeso nagapaho gamani qetaqeta abi noi nokoke hasu hiire kebaiteqi erake hiireta, Epeso nagapa eraho abi nookare. Napai Attemi mina napameho guhu soopara eetorai ma qusu neta gisigisi nohoi qaratemi napahota oho soopara eetorai. ³⁶ Oonita haba minarata apei oke ruume naataqu? Oonomai baamuhe, qupa nikeho kebaratemi quba eto sepesapeke eetaino. ³⁷ Abiho obera hiibaino. Nokoi neemi guhu napahota teqaha quba teeke aima dzukubara ma neemi Attemi Ttianake te ngiingi eetara.

³⁸ Mae Temettero ma abi noho nokoi abi teehoke nookami qanga naatoraiqako noo ma kahosa hiibagu bodza dzamonatemti Kiape oorai

nokoho torota hiibare. ³⁹Mae nikemaeho noo teei ooraiqako bosa qobaqobaho garubata aimaa tuumare.

⁴⁰Oonihe nikeye ikoiko eesuhimi sepeke qaa biranatare eete oho noo qubake abi qiba napaho qaruu hiiremi napa tuumaqee tee ma teeke hiimi nookami baamu isanataqu. ⁴¹Qateqa qetaqeta abi oke hiiremi garuba nookaqi sakabata.

PAUROI PAHA MAKETONIA MA GIRISI HABATA GIRODZOMATA

20 ¹Noo ma nooaga oi baamu naasumi Pauroi sobasoba tupuho quba hiiremi baami qogo ma saga hiireqi Maketonia habata tuumata. ²Haba oke dzongobete tuusuqi sobasoba tupu qaata nokoke qogo hiire tatangaiteqi tuuma qaaramuti Girisi habata biranatata.

³Ota dzasidza taparike qaaramuti besata qura sisima aimaa Siria habata tuumare hiiremi Dzuta abi ota qaa mootomi tete mainake aimare hiireqi Maketonia habata tuumata.

⁴Tuumami abi naga erai noke iiha Asia Gattiqata tuumata, oi Berea napaga nena Sopate noi Pirihuho khata ma Ttesaronia nagapa nena Aristako ma Sekutto ma Gaio ma Timottee ma Asia Gattiqaa habaho nena Ttikhiku ma Ttoropimo. ⁵Abi oio bosa qooroqi Ttoroa nagapata Pauro ma nanaho beebe oota.

⁶Qate nanai ingona dzuma baamu naatemi Piripi nagapata sisima peiteqi ete paiputa tuuma qaaramuti Ttoroa nagapata noko saridzeta. Saridzeqi ete bodza sebenike qaata.

PAUROI TTOROATA EUTTIKOKE EEEHAHAITETA

⁷Obete Sateta nanai qupi posa muunareiqi ttutturateta. Oonihe Pauroi hee, Iihai mootomi tuumare hiiqi sinabidza hiire qaami saubapo dzeubata. ⁸Dzeubami naga naku nanai oota ota dzongi samanei dzadza eetota.

⁹Oonihe Pauro sinabidza hiiremi bodza khara naatemi abi khata tee dzapa noho Euttiko noi haba moramorata habeseqi mee ruume naateta. Oonihe suruho nokoi oota oi heenata oomi noi taate suruho eserike riite ttokata taate baateta. ¹⁰Baatem Pauro ao hairiamake qura khata dzogebiire aimaqi erake pobi hiireta. Eo baamu, eto tti ma ttaka hibaino, noho baruna eehahake oorai.

¹¹Oke hiireqi naga nakuta peiteqi qupi posa moiteqi qaate patta muunata. Muunaqi nokoma sinabidzaho noo hiromi iihai mootota.

¹²Iihai mootomi abi nokoi khatake ttidza qidzaqidzake eete naga nohota dzeima tuumata. Qate Pauro ma nanai qaate tuumata.

PAURO NOI TTOROA QAATE MIRETTE NAGAPATA BAATA

¹³Pauro hiiremi qesa nanai sisimata peiteqi Aso nagapata tuumata.

¹⁴Qate noomae torata tete biireqi Aso nagapata nanake saridzeqi sisimata

peite hee biireqi nanai gama tuumata. Tuuma qaaramuti Mittirene nagapa biranateta.

¹⁵ Oneta tuuma qaaramuti iihai mootomi Kio sungata biranate riiteqi Samo kusuta biranateta. Ma ooneta tuuma qaaramuti Mirette nagapata biranateta. ¹⁶ Oi Pauro noi Sumasaho dzumata Dzerusaremu biranatakoiqi hiireqi Epeso abima bodza minake oorainoho quba Epeso nagapa riiteqi pobi neta sisimata tta eeteta.

PAUROI EPESO ABIKE AIPO BIIRETA

¹⁷ Pauroi sisimata tta eeteqi qaru dzoobiremi Epeso nagapata tuumaqi sinabidzaho bosaqobaqoba dzeima unaunata baata. ¹⁸ Baami Pauroi noko erake pobi hiireta, Dzoobe, ana khoobanipamuta Asia Gattiqa nikeho habata biranateqi ao nikeho toro baura name bosana eete qaata oke nika nooka baaqoraaidzo.

¹⁹ Anake abi ngingi ma baaba eete qaami ana tti ma ttidza heme ipima Sooparaho qaru eete qaata. Oi Dzuta abi noko sesero ma dzakidzaki eesubomi ana teeta ma taanga ipima qaata. ²⁰ Ma ana te noo nikeke qoredza eete qaarara. Nike qidzanata quba sinabidza noo samaneke naga ma paata nika pobi hiire qaata. ²¹ Ma Dzuta abi ma Giriki abi Ohonga dzaga bobotoqi Soopara napame Dzesu Kiristu nooka hiisi eetareiqi qupa nikeho tukuto qaata.

²² Obete poiqa Sumasa naho qupa qoro teetemi Dzerusaremu nagapa tuusubi. Tuusuhiimi quba ikanomai naho toro biranataqu? Oke ana ruume. ²³ Teena anai nagapa samaneta biranate qaimi Qaheuba Sumasai ana erake pobi hiirorai, sutasuta ma heme ma bame qee ota niiho beebe eetorai oiqi hiirorai.

²⁴ Oonihe anai qaraqara nameho nookami ttuma minanoma naasuidzara, tete naho quba roibeteta oke iiha qaarareiqi hiirorai ma Ohongai hasu ma keba noho pobi qidza hiire gegebetareiqi Soopara Dzesui ana pobi hiireta, baura oke eete qaaqa soubidzareiqi qupa nahoi hiirorai.

²⁵ Paha teeke hiire nookare, ana qusuho noo pobi qidza hiireqi nika bisata oora ma qaara eetemi nika ana mooraihe paha ipita nese ma penga naho baamu mooraqu. ²⁶ Ohongai sinabidzaho noo naho irita suutomi orai oke ana nika pobi hiire soubireta, ²⁷ teeqake te qaatemi ooraidzara, baamu.

Oho quba poike toma agiagita hiire nookare, teebo kahosa oorareiqi oorakohe oi baamu naho naataqu. ²⁸ Oonita nika sama nikeme soopara eeteqa sinabidza tupu nikeme isanate soopara eetorare. Qaheuba Sumasai nika nokoho bosa qobaqoba hiireta quba nika Sooparaho oko ma boto noomaebo dzuui soorota nokoke sinabidzaho sogo moite qaama keba ma dzapata qaarare.

²⁹Oonihe ana qupadzomami haa idzahuba qaanoma nokoho toro biranateqi sipisipi baamu ingonaitaqu. ³⁰Paha nikemaeho bisata abi biranate sinabidza ngiingirobe eete ai tatauma abi nokoho ang i naatemi ota dzuubakoi. ³¹Oho quba nikemae bakena geema qaarare. Oi tii tapari qupi samane tti ma dzasa ma qogo ma saga, noo hibahiba oke te qaatemi perebara nike oooh qupadzomaqi qaarare. ³²(bisa 32 oi qoorata oorai)

³³Anai te ttuma ma quruma quba tti ma sori hiibara. ³⁴Ana abi naga namema nana ttuma gattiqa saridzeta oke boto eseri namema saridzemi nanaho quba biranatetake nike nookorai. ³⁵Ana koo ma taanga nikeho quba irangi eetemi ooma nike ao baura beedzaema eeteqi pepeqa ma roroqa nokoke hoobire qaarare. Oho teteta qoroqi ana oke nike banaitemi oorai.

Oonita nike ota qoroqa Soopara Dzesui noo erake hiireta oke qupadzomare. Hee, Isaki teeke biraitemi ooraike nike aimaku tete nome ooraihe, nikemae abiho ttiihu biidzaqu tete oio dzapa pobinomanipamu, oiqi hiireta. Qate ana nike Ohongaho botota mootomi baruna heena nohoi nike bakena geemami Beedzaeho Maikhatai nike isakinomaite qaarare. Qaama nike noho qabeuba abi tupuma ttaiqa naate ipi ma ari saridze isanatakoi.

³⁶Oonita Pauro noi noo oke hiire soubireqi pomai kotoroqi nokoma pupu hiireta. ³⁷Pupu hiiremi tti ngusuru ngasuruiqi dzoge biire aimaqi noke kanabeteta. ³⁸Oi noi noo samane hiireta oonihe noi hee, Nike baamu paha ana mooraqu ooqaho quba qupa nokohoi qanganipamu naatemi tti minake hiireta.

Oionita noko Pauroke dzeimami sisimata peitemi nokoi aipo biireta.

DZERUSAREMUTA TUUMAREIQI PAUROI SISIMA PEITETA

21 ¹Hiibi nanai Epesoho maimane gaubireqi pobinoke tuuma qaaramuti Koo sungata biranateta. Iihai mootomi Roti sungata dzuubaqi tuuma Pattara nagapata biranateta. ²Ota sisima teei Peonike habata tuumareiqi roibetomi saridzeqi ota peiteqi tuumata.

³Tuuma qaaramuti Kiporo sunga moohimi mage neta oomi riiteta. Ma Siria haba neta tuuma qaaramuti Ttiro nagapata biranateta. Ota sisimai quruma perebireta.

⁴Perebiromi nana Ttiro nagapata peiteqi sinabidza tuputa abi qesa saridzeqi nokoma qupi sebenike qaata. Qaami Sumasai bapotopotomi nokoi Pauro Dzerusaremu nagapata eto tuumainoho qubake qaanateta.

⁵Ota nana qaami tuumaqu bodza dzamonatemi abi ma paimane ma khata ma khameto nanai gama igasata pomai kotoroqi pupu hiireta. ⁶Pupu hiireqi qesa aipo biireqi sisima peqimi noko nagapata burisi eeteta.

KAESAREA NAGAPATA AGABOI PAUROKE SINASINA HIRETA

⁷Ma Ttiro nagapake qaate tuuma qaaramuti Ttoremae nagapata biranateqi sisimata tta eeteta. Qate nanai ota sinabidza tupu abi saridzeqi qupi teenake nokoma meeta.

⁸Iihai mootomi tuuma qaaramuti Kaisarea nagapata biranate Piripo saridzeta. Piripo ape bahe bosata Dzerusaremuta ttiihu abi sebenike aimata noi nokohota teei oonita nanai noho nagata peiteta. ⁹Qate noho atasare eserisa eseri somoroi qaata nokoi paha too abiho isaki naate qaata.

¹⁰Obetemi nanai ota ipibire qaami Dzutea haba nena too abi teevo dzapa Agabo noi nanaho toro biranateta. ¹¹Biranateqi makuku Paurohoke aimaqi ooma oko ma boto nohoke suutoqi hiireta, Qaheuba Sumasa noi erake hiire, Makuku eraho maikhata noi Dzerusaremu nagapata tuuma biranatemti Dzuta abi noko eranomake eeteqi raaba abiho botota mootakoiqi hiire.

¹²Noo oke Agabo hiiremi nanamae ma nagapa maikhamento ma gama Pauro Dzerusaremu nagapata tuumainoho bame eeteqi qaananateta.

¹³Qaanatemi noi erake hiireta, Naane quba tti minake hiireqi qupa nahoke ai buribaro eetoraidzo? Ana Dzerusaremu nagapata sutasuta peitaqu oi keke bahe, Soopara Dzesuho quba eeteqi baatare roibetorai.

¹⁴Hiiremi oho bai hiiremi tatanga naatemi noko ma nanai gama qaateqi hee. Isanate, Sooparaho noo meenoma naatare.

PAURO DZERUSAREMUTA TUUMAQI ISERE NOME HIIRETA

¹⁵Baura bisa qesa baamu naatemi nanai roibeteqi Dzerusaremu nagapata tuumare eeteta. ¹⁶Eetemi Kaisarea nagapa nena sinabidza tupu abi quesai nana dzeimaqi abi teevo dzapa Manaso, sinabidza abi agoba Kipiro sunga nena, noho hagata nana mootota.

¹⁷Obete tuuma qaaramuti Dzerusaremu nagapata biranatemti ota sinabidza abi quesai nana dzaira eeteta. ¹⁸Oonihe iihai mootomi Pauroi naanake dzeimaqi Dzakopoho torota peiteta.

Nanai ota peiteqi oomi sinabidzaho bosa qobaqoba qesa biranate soubireta. ¹⁹Biranatemti Pauroi bodo nokohu aimaqi, Ohongai husi ma pai naatemi raaba abi nokohu toro sinabidza baura eetemi mee biranateta, oho noo ma pobi mekeqomake hiire soubireta.

PAUROI BIIRITA PEITETA

²⁰Pauro isere mootho soubiremi nokoi gama Ohonga hasa hiireqi Pauro erake pobi hiireta, Dzaira naname, abi dzare ttauseni bahe oho samanenipamu ao nooka hiisi eetoraimi nii moorai. Oonihe abi qesa erata oorai nokoi paha hu nooho dzaodzaonomia. ²¹Oonita sigita niiho noo teeke erake hiire baami nana nookorai. Hee, Dzuta abi raaba abiho bisata oorai nokoi Moseho noo qaatareiqa pobi hiiyorai, hiiqi khametoho samata geeba mootainoiqi qamuni hiiyorai, ma Dzuta abi oora ma qaara tete napame qaatareiqa qamuni hiiyorai. ²²Nagapa eraho abi noko niiho totoho erake nookorai. Ma nii Dzerusaremu nagapata baabe oho pobi nokoi ao nooka soubidzakoita nookare.

²³Oho qubake nii quba apeke eetaqu oke nana hiiremi nii niimae oke eetare. Nanahota abi eserisa eseri oorai nokoi Ohongahota noo tatanga nokome mootomi ooraiho qubake ttarumi nokome topotaamake oorai.

²⁴Oonita nanai niike nokohota mootomi nii nokoho isakita quba eeteqa ttuma nokohoke biiremi ttarumi nokome topotare. Nii oke eetemi minarai niike eraiqi hiibakoi, Oo, noo nohoi baami nana nookata oi meeama, noi hu noo qusubaitoraiqa hiibardzonita oke nii eetare.

²⁵Qate nanai raaba abi sobasobahoke hee, Ohonga oberaoberaho kiridza kabira dzuuma oorai, kabira dzaganoma oke qaasuhiqi dza ma rumubake biidzare hiire tatangaiteta, oke nii gesina.

²⁶Oke hiiremi Pauro noi abi eserisa eseri nokohota ipibiremi iihai mootomi sama sasa ma quba nokome roibete soubireqi Ohongaho biirita dzuubata. Dzuubaqi Pauroi bodza nokoho hutingi bamu naatarota ma oho kiridza qeebarota oho noo abike pobi hiireta.

DZUTA ABI NOKOI PAUROKE BIIRITA KARABETETA

²⁷Oonita nokoi ttarumi nokome topotomi ete bodza sebeni oi baamu naatare boohimi Dzuta abi Asia Gattiqaho haba nena nokoi Pauroke biirita mooqi abi qesa oona oota nokoke gama kosibeteta. ²⁸Kosibete Pauro aimaqi suu ubaqotoqi hiireta. Ae, Isirae abi baa nana hoobidzare. Abirai haba samaneta tuumaqi Dzuta abi napa ibo eeteqi hu noo napaho ma biiri napaho baaba eeteqi biiri napahota Giriki abi dzeima baaqi qaheuba nagake kanesanomaitorai.

²⁹Oiqi hiireta oi teevo quba bahe bosata nokoi moomi Pauro noi Epeso nagapa nena Ttoropimo ma nopoi Dzerusaremu nagapata tuuma ma baaba eetota. Oho quba nokoi hee, Raaba abi oke qaheuba biirita dzeima peite ootaiqi qupadzomaqi oho areare hiireta. ³⁰Oonita Pauroke nokoi karabetem nagapa abi gamaqa oko tumutumu biireqi gururuiqi ttutturateqi abi qesai Pauro biirita hotou biireqi ao hairiamake oho tete siireta.

ROMAHO QAA SOOPARAI PAUROKE HEROHERO EETETA

³¹Oonita abi noko Pauro aimaqi teete kebaitare eesumi oho pobi oi Roma qaa abi minaho tomata taatemi roqobeteqi erake hiireta, Dzerusaremu abi noko gama susupu qaa aimaqi eetora. ³²Noo oke hiireqi hairiamake qaa abi mimi ma gamitti aimaqi gururuiqi tuumata.

Oonita Dzuta abi nokoi Pauroke teesuhiqi moomi soopara minai qaa abima gama biranatem noko qaata. ³³Oonihe qaaho soopara minai biranateqi qaanhahiqi ngibira eserima Pauro suutota. Suutoqi noi Pauroho dzapa qasa hiireta ma quba apeke eeteta oho qasa eeteta. ³⁴Eesumi abi noko sokasoka ma garugaru hiire rasaki eetemi te nooka pobitara.

Onita sooparai hiiremi qaa abi noko Pauro aimaqi qaa naga nokometu tuumata. ³⁵Tuusuhiqi Pauroi irita peitare boohimi Dzuta abi noko noke

qeegoromi qaa abi noke qusuta aimaqi peiteta. ³⁶ Peitemi abi tupu minai iihaqi sokasoka hiire tuumaqi erake hiireta, Abi oi baamu naatare! Oiqi hiireta.

PAUROI NOO HIIBAROTA OI QAA SOOPARATA ISANATETA

³⁷Dzuta abi sokasoka hiimi Pauroi iri qusuta ooqi dzuubare boohiqi qaa sooparake Girisi noota qasa hiireta, Maqo ana isanate noo teeke nii pobi hibaqu mae? Hiiremi sooparai hee, Ae, Nii Girisi noo nookorai mae? ³⁸Abiniqake Aigitta abi teei qaa eetare qaa abi po ttauseni aimaqi haba habanata tuumata nii abi ooni mae ape?

³⁹Qasa hiiremi Pauroi erake hiireta, Ana Dzuta abi, Kirisi habaho nagapa Ttaraso dzapa pobinoma, anaio oho nenani. Oonita nii nookami ana noo gattiqa abi pobi hibare. ⁴⁰Hiiremi nookami Pauroi iri kokota qoroqi abi boto qamuni eetemi noo nipanatemi Dzuta abiho noota noo hiireta.

PAUROI ISERE NOME SOHOROTA

22 ¹Heboro noota Pauroi hee, Dzairamane ma abi mimi name, ana khooba name hiire nookare. ²Pauro noi oke hiiqi Dzuta abiho noota noo hiiremi noko nookaqi poupaamake oota.

³Oomi noi ipibile pobi hiireta, Ana Dzuta abi, Kirisi habata Ttaraso nagapata biranateta. Oonihe ana Dzerusaremu eraqata baa nokanoka nagata qaaqi bitotota. Bitotoqi banaita Gamarie noho dzagata qaami sinabidza banaitemi abi mimi napameho noo qusubaite kokora eete qaata. Paha poike nike Ohongaho dzaodzao eetoraidzo anai oho qesa Ohongaho eeteqi ima ma bago heeta qaaqi tatanga naateta.

⁴Eeteqi sinabidza usaqe baamu naatareiqa ana ibo eeteqi abi oni mae paimane gama suutoqi sutasuta nagata mooto qaata. ⁵Oi dzube abi mina ma sinasina abi mimima nokoi naho khooba gama gesina. Nokoi quesamane napaho Ttamasiko nagapata ooraidzo nokoho pepa qeeteqi ana moitemi erake hiireqi aimaa tuumata, Ana qeota abi ma paimane oonoma saridze suutoqa Dzerusaremu nagapata aimaa baamake ipi moitare. Oke Pauro hiireta.

PAUROI IKANOMAKE EETE KIRISTUHO ABI NAATETA

(*Apo 9:3-19; 26:12-18*)

⁶Oonita Pauroi noo nome ipibileqee hee, Anai oke qupadzomaqi teteta tuumomi ete bisata Ttamasiko nagapa dzamoihimi qusu neta eepa dzadza minai biiqi baa anaho nese kootorota. ⁷Kootoromi ana tookata taate ooqi totoho teeke erake nookata, Sauro, Sauro oe nii naane quba ana teete iihoraidzo?

⁸Hiiremi anai hiireta, Soopara name nii ape oni? Hiiremi erake ana pobi hiireta, Dzesu Nadzarette nagapa nenake nii teete iihorai teena

anaio. ⁹Oiqi hiireta oonihe abi anama qaata nokoi eepa dzadza keke mootahe, noo anake pobi hiiretake te nookara.

¹⁰Eetemi ana qasa hiireqi hiireta, Soopara name, ana quba apeke eetareke nii hiibi? Hiiremi Sooparai erake ana pobi hiireta, Nii qoridzeqa Ttamasiko nagapata tuumamake, quba nii eetoraaidzoke ota nii pobi hiibakoi. ¹¹Oiqi hiiretanita eepa dzadzai nese naho kootoromi qupi sooromi quesamane nahoi ana basidzomaqi Ttamasiko nagapata dzeima tuumata.

¹²Nagapa ota abi teei qaata dzapa noho Anania. Noi hu nooho tete aimanoma, Dzuta abi nagapa ooqana qaata nokoi noho nookami qidzani. ¹³Abi oi naho toro biranateqi erake hiireta, Dzaira name Sauro. Nii nese parara eetare. Hiimi anai nese parara eete haba moota.

¹⁴Moomi noorake pobi hiireta, Uimane napaho, noko ma napaho Ohonga noi khooba nome paanaitareiqi hiiremi nii qidzaho maikhata moorare mooqi too nohota noo nookareiqi nii asateta. ¹⁵Obetemi nii quba moo nooke oho pobike haba samaneta abi pobi hiire tuumare. ¹⁶Sigita nii ikabete sepeke ooraqu? Nii qoridze Dzesuho dzapa qiraitemi niike sinabidza obama sooromi pasena niiho dzamutare. Oiqi Anania ana pobi hiireta oke Pauro hiireta.

PAUROKE OHONGAI RAABA ABIHO QUBA UHUTOTA

¹⁷Pauroi hee, Oke Anania ana pobi hiiremi qusubaiteta. Oonihe ana burisi eeteqi Dzerusaremu nagapata biranateqi Ohongaho biirita peiteqi pupu hiireqi neneho isakita Dzesu moota. ¹⁸Moomi erake ana pobi hiireta, Nagapa eraho abi noko niiho toota noo naho nookaqa gottae eetakoi. Oho quba nii hairiamake Dzerusaremu qaateqa tuumare.

¹⁹Hiiremi ana noo ipike hee, Soopara name ana abi niihoke sutasutata mootoqi sinabidza naga samaneta aima peiteqi gouma teete qaata. ²⁰Qesai hibahiba niiho Settepano teetare sasa nokome tupubiremi ana soopara eetemi teeteta oke ana nookami isanateta. Oi nagapa eraho abi gama nooka soubiroraita ana niiho pobi isanate hiibakoi.

²¹Oke hiiremi Sooparai bai hiireta, Baamu. Ana haba kharata raaba abiho torota nii dzoobihibita ao tuumare. Oiqi Dzesu hiiremi ana nookata.

QAA SOOPARA PAUROKE HEROHERO EETETA

²²Oke Pauro hiimi eehe, Abi noko toma tiisuta nokoi noo musaqi nohoke nookami raaba abiho naatemi noko sokate qarutoqi hiireta, Ae! Pauro noi peranomanipamu oonita noho dzapa baamu naatara. ²³Oke hiire sookateqi sasa khara nokome kuimaqi pomu tupu teetemi peiteta.

²⁴Peitemi soopara minai hiiremi qaa abi nokoi Pauro naga nokometa aima peiteta. Obetemi abi noko naane quba sookateo oho khooba

nookakoiqi qaa sooparai gouma teetare hiireta. ²⁵Oonihe nokoi gouma teetareiqi hoo sasa siihuma suutare boohimi Pauroi qaa sooparake erake hiireta, Nikei Roma abi anake sepeke sesero eete noo nahoke hiire pobitaamake gouma teetemi isanataqu mae?

²⁶Oke hiiremi noi soopara mina nomeho toro tuuma pobi hiireqi hiireta, Nii ikake eetareiqi hiibi. Abi oio Roma abinipamu oni. ²⁷Oke hiiremi soopara minai ao Pauroho toro tuumaqi qasa hiireta, Maa meenipamu nii Roma abi oni mae? Hiiremi Pauroi hee, Oi meenipamu.

²⁸Oke noi hiiremi quesai Pauroke buribaroke eete toronaitare boohita nokoi ao qaateta.

²⁹Qate Pauroi Roma abi ootaho pobike qaa soopara minai nookaqi sahateta. Oi teeho bahe Pauroke noi ao suutomi oota.

³⁰Oonita iihai mootomi qaa soopara minai Dzuta abi noko Pauroke naane quba nookami qanganateta oho khoobanipamu nooka quba dzube abi mimi ma sinasina tupu gama susupu hiiremi ttutturateta. Ttutturahimi Pauro dzeima qura nokoho torota mootota.

PAUROI DZUTA ABIHO SINASINA TUPUHO TOROTA NOO HIIRETA

23 ¹⁻²Pauroi Dzuta abiho sinasina tupuke qeraqera eeteqi noorake hiireta, Qesamane name, ana hu nooho bai ma qamuni hiibaamake Ohongaho pengata qaatai qaabi. Oke hiiremi dzube abi mina Anania noi abi Pauroho dzagana qoroqota nokoke hee, Pauroke toota teetare. Hiiremi teeteta.

³Teetemi Pauroi hee, Ttidza makanoma nii! Oi nii anake Ohongaho hu noota batabidzare hiireqi oho tekata habese ooraihe hu noo oke riiteqi ana oberama teetare hiire oonita Ohongai paha niike teetare boohibi.

⁴Oke hiiremi abi qoroqota nokoi hee, Nii oonomake Ohongaho dzube abi minake pobi hidzo? ⁵Hiremi Pauroi hee, Qesamane name, sinabidzata noo erake hiilorai. Nii eto abiho sooparake qanga hiibaino. Ana noo oke nookorai. Oonita abirai dzube abi mina oori oke ana nookaamake noo oke hiire.

⁶Pauroi oke hiireqi nese dzoobire moohimi tupuho abi quesai Satukeo ma quesai Pariseo oonita nokoi hu ma koridza biidzareiqi noi sokateqi hee, Abi quesamane name ana naamae Pariseo abi oho gottanipamu. Oonita baata neta qoridzaquho noo orai oke qusubaitorai ooqaho quba niike anake noota mootoraidzo.

⁷Pauroi oke hiiremi Pariseo ma Satukeo nokoi qesa kurebeteqi hu ma koridzanoma naateta. ⁸Oi Satukeo abi nokoi baata neta qoridzaqu ma angero ma gutu boto khara quba oonomaho baike hiilorai qate Pariseo abi nokoi oho nookami meenomani.

⁹Oho quba garuba nokometa qesa kurebeteta. Kurebete Pariseo abi nokoho tuputa sinabidzaho banaita quesai qoridzeqi tatangama erake

hiireta, Nana abi eraho kahosa moomi baamu, angeroni mae gutu boto khara teei noke pobi hiiretaiqako ikabete sepeke bai hiibaqu? ¹⁰ Hiireqi baaba minake hiiremi qaa soopara minai hee, Tupu nokoi Pauroke ngausa etainoiqi hiiremi qaa abi nokoi biranateqi Pauroke abi bisata dzeima naga nokometa tuumata. ¹¹ Obetemi qupi ooqata Ohonga Sooparai Pauroho torota biranateqi qupanomaiteta. Nii Dzerusaremu nagapa erata anake paanaisubi oho qesa Roma nagapata anake paanaitakoita etoqa ququimaino oiqi hiireta.

DZUTA ABI PAUROHO GUNU MA NARU TATANGA HIIRETA

¹²⁻¹³ Oonita iihai mootomi Dzuta abi qesa hongasireqi pattaho hutingi naate hee, Pauro teeteqanoke oba ma patta muunare hiireqi gunu dzoomata. Oonihe abi erake hiireta nokoho dzare poti riiteta.

¹⁴ Abi nokoio too abi mimi ma Dzuta abi mimi nokoho toro tuumaqi paanaiteqi erake hiireta, Nana patta hutingi minanipamuke eeteqi Pauro teeteqanoke ooqata quba muunare naru hiire. ¹⁵ Oho quba sinasina tupu ma nikel qaa soopara minaho toro noo dzoobireqa hee, Nii Pauro nanaho garubata dzoobire baami noo noho paha hiibare. Hiiremi noi noo nikel nookaqi oke eetema nana ao Pauro teteta teetakoi. Oiqi hiireta.

¹⁶ Oonihe Pauroho mapui teetaquho noo nookata. Nookaqi qaaho nagata peiteqi nasami nome pobi hiireta. ¹⁷ Pobi hiiremi Pauroi qaa abih kira hiireqi erake hiireta, Nii khata erake qaa soopara minaho toro dzeima tuumami noo teeke pobi hiibare. ¹⁸ Hiiremi qaa abi noi khatake soopara minaho torota dzeima tuumaqi noke pobi hiireta. Sutasuta abi Pauro noi naho kira hiireqi hee, Khata erake dzeima qaa sooparaho torota mootomi noo hiibare. Hiiremi khata erai noo nii pobi hiibare dzeima naka baabe. ¹⁹ Oke hiireqi pobi hiiremi soopara minai khata botota aimaqi sigiqata tuumaqi qasa hiireta, Noo apeke hiibaqu?

²⁰ Hiiremi khatai hee, Dzuta abi noko niiho toro noo mootomi baabareiqi hiire nookao. Pauro garuba nokometa dzeima tuumaqi khooba nome paanaite soubidzareiqi hiibakoi. ²¹ Pobi hiiremi noo nokoho eto nookaino. Abi nokoho dzare 40 riite oio Pauro teetare hiiroraidzo. Noko patta hutingi minanipamuke eete ooraiqi Pauro teeteqi sapunge muunare naru hiire roibeteqi niiho noo beebe oorai.

²² Khata noi noo oke hiiremi soopara minai hee, Nii noo hiire paanaisubi oke eto abi pobi hiibaino hiireqi dzoobireta.

PAUROKE SEIKE KIAPE PERIKHIHO TOROTA DZOOBIRETA

²³ Oonita qaa soopara minai qaa bosa qobaqoba eseri dzeima baaqi erake pobi hiireta. Nipe hiiremi qaa abi okoma tuumaqui oi 200, qate oosina tuumaqui 70, qate koo aimaqi 200 oi roibeteqa quipibaho 9 kiroko eesuhiiama nikel Kaisarea nagapa tatangata tuumare. ²⁴ Ma Pauro

oosi teeke saama mootare. Eeteqi tteike soopara eeteqi kiape mina Perikhi noho toro aimaa tuumare.

²⁵ Oke hiireqi kiapeho quba dzaira pepa teeke erake hiireqi qeeteta.

²⁶ Hee, Dzoobe Pirikhi, kiape qidza name, anai niiho quba pepa era geete.

²⁷ Qaa abi noko abi teeke aimaa qeeme noko Dzuta abi teetare eeteta (dzapa noho Pauro). Anai nookami noi Roma abinipamu naatemi qaa abima nana tuumaqi nokoho botota hiumata.

²⁸ Oonihe noke noota moototaho quba khooba nookareiqi bosa qobaqoba nokoho garubata aimaa tuumata. ²⁹ Aima tuumami hu noo nokomeke qupadzomaqi qomaqoma hiiremi ana nookata. Quba eeteta oite peiteqi teeta ma suutaho isaki naatara.

³⁰ Qate abi quesai geema mootoqi Pauro teetare hiiremi nookaqi niiho toro dzoobiremi qeeme oio. Ma qomaqoma hiarorai abi oio noke oho qesa ana iihami niiho toro qeeme nokoi noo nohoke nii pobi hiibare.

Anai Dzerusaremuhu kiape, Kautio Risia.

³¹ Noo ooqake dzaira pepata qeetemi qaa nokoi soopara nokomeho too qusubaite pepa aimaqi quhibake dzeima tuuma qaaramuti Attipatti nagapata biranateta. ³² Biranatem iihai mootomi okoma tuumataho qaa abi nokoi naga nokometa burisi eesumi oosinai keke Pauro dzeima tuuma qaaramuti Kaisarea nagapa biranateta.

³³ Biranateqi Kiapeho dzaira pepa moiteqi Pauroke oho qesa noho botota mootota. ³⁴ Mootomi kiape Perikhi dzaira pepa nome isaiteqi Pauroke haba khooba nohoho qasa hiiremi hiireta, Ana Kirikia haba nena.

³⁵ Hiiremi kiapei hee, Noota nii mootorai abi naga oi baamake niiho noo hiibakoi. Oke hiireqi qaa abi pobi hiiremi Heroteho qaa guhuta mootoqi Soopara eetota.

DZUTA ABI BAAQI PAUROKE QOHARENAITETA

24 ¹Ete bodza boto teena bamu naatemi dzube abi mina Anania noma abi mimi qesa, ma noo soopara teevo dzapa Tetturu, nokoi Kaisarea nagapata tuumaqi kiapeho torota Pauroho noo hiibare biranateta.

²Oonita kiapei hiiremi Pauro qeemami Tetturui qomaqoma hiireqi kiape noorake pobi hiireta, Kiape qidza naname, nii isanate nana soopara eetemi keba ma hasuta oorai. Paha abi tupu era nanaho quba iihia ma dzoobidza eeteqi hoobirorai. ³Hoobiremi nanaho nagapaho isaki quba samane isanate soubirorai.

⁴⁻⁵Oonita noo hiire kharanatainoho quba nii kebarateqi nookami noo hote teeke nii pobi hiibare. Abi eraho nookami qanga naatorai, noi iima barunoma Dzuta abi haba samane tuuma oorai nokoke kosibetorai.

Qate paha sinabidza abi obera nokoke nanai hee, Nadzaretteho nenaniqi hiirorai noi nokohota bosa qobaqoba naate oorai

⁶Ma paha noi biiri nanaho makanomaitare eesuhimi aimata. ⁷⁻⁸Ma nanai noo nii pobi hiibi oke niimae qasaqasa hiireqi khooba isanate paanaitakoi.

⁹Noo oke Tetturui hiiremi Dzuta abi noko noke hoobireqi noo noho qaupuiteta.

PAUROI PERIKHIHO TOROTA NOO NOME POBI HIRETA

¹⁰Oonita kiapei Pauro botoma qaseqase eetemi noorake hiireta, Nii haba erata tii samaneke kiape oorai oke ana qupadzomaqi noo name iihia ma dzoobidzaamake hiibakoi. ¹¹Ana Dzerusaremu nagapata Ohonga penga bototareiqi qeema qaami ete ma qupi 12 keke naateta nii noo oho quba abi qasa hiiremi nii pobi hiibakoi.

¹²Oi ana biirita mae sinabidza guhu quesata mae sinabidza nagapata abi ma nana sinabidzaho baabani mae abike kosikosi oke ana te eetemi noko moorara. ¹³Ma abi oi qomaqoma hiireqi noo hiirorai oho mee apeke nii banaitaqu?

¹⁴Paha teeke hiire paanaitemi nookare. Tete meeho ngiingike nokoi eetorai ota ana qoororai oke noko hiirorai, oi meenipamu eetorai. Ma nokoho noo ma sinabidza aimaqi hu noo qibata sinabidza qeetemi oorai ma too abi hiire qeeteta oke ana nookami oi mee, uimane neimane napaho ma nokoho Ohonga noho qaruke eetorai.

¹⁵Oonita qaaqi abi qidza ma qanga baata neta qoridzaquke mai etetakoi, oho quba abi era noko ma ana gama qupadzomorai. ¹⁶Oke eete qaaqi Ohongaho pengata ma abiho pengata kahosaamake oora quba sama nameho bakena geema oorai.

¹⁷Ma ana tii samaneke haba kharata qaaqi sinabidzaho ttuma samaneke ttuttuite qaatati Dzerusaremu nagapata quesamane nameho torota aimata tuumata. ¹⁸Ma kiridza qeeba quba roibeteqi Biirita dzuuba oomi noko ota ana saridzeta. Sarihimi nanai te abiho tupu gairuru ma soropuruho tuputa oorara te husu ma noo agata oorara, baamu.

¹⁹Oonihe Asia haba neta Dzuta abi qesai Biiri ota biranate naho qomaqoma hiireqi abi kosibeteta oonihe ikaqi hiireqi nokomae teqaha niiho toro biranate oke hiire paanaitoraidzara. ²⁰Mae ipita ana sinasina tupu nokohota qoroqomi naho kahosa teeke nookataiqako abi erana qoororai nokoi isanate nii pobi hibare.

²¹Oonihe anai noo teenaqake nokoho bisata hiiremi oke noko nookami nokohota isanataama naateta kaqa, oi ana paata erake pobi hiireta: Baata neta qoridzaqu oi oorai noo teena oke ana qusubaitorai qesai oke nookaqi anake noota mootomi nikeloh pengata qoororai. Oke Pauro hiireta.

²²Hiiremi kiape Perikhi noi Pauroho noo oke hiire hiumaranihe oke mootota. Oi teeho bahe noi sinabidza usaqe Dzesuho pobi te nookaamake

oorara. Oonihe noi gimuttake eete erake hiireta, Qaa soopara Risiai Dzerusaremu nagapa neta quratemake noo nokohoke hiumakoi.²³ Oke hiireqi noi qaa soopara erake pobi hiireta. Nike baaqi kokora eetare hiiremi eto bai hiibainoiqi hiireta.

PERIKHI HIREMI PAUROI TII ESERIKE SUTASUTATA OOTA

²⁴ Oonita qupi qesa naatemi Perikhi noi Dzuta abiho neta ata noho Tturisira noma nopo ooqi Pauroho quba hiiremi dzeima peiteqi Pauroi Dzesu Kiristu nooka hiisi eetaridzoho khooba pobi hiireta.²⁵ Oonihe hiiqi pobipobih tete ma pasenaho hutingi naataquho tete ma ipi bodzaho ipi ma ari hiiremi Perikhi atti roqobeteqi Pauro erake pobi hiireta. Oo, kebanoke naamae bodza mootoqake paha niiho quba hiiremi ipibidzakoita tuumare.

²⁶ Hiireta oi noi dza eetemi Pauroi noke ttuma moitakoiqi hiireqi bodza samane dzeimaqi noma nopo noo hiire qaatahe Pauro te noke ttuma moitara.

²⁷ Oonihe tii eseri bamu naatemi kiape teeho dzapa Porokio Pesto noi Perikhihi habara naateta. Oonihe Perikhi noi Dzuta abi qupa qidzaqidza moitareiqi te Pauro sutasuta nagata saqobara. Bamu, qaateqi tuumata.

PAUROI NOO NOME KAISAHO TOROTA HIIBAKOIQI HIIRETA

25 ¹Qate ao ete tapirihonakuta Pesto noi bukhi ttidzake soopara baura nome mai eeteqi Kaisarea nagapa qaate Dzerusaremu nagapata peiteta. ²Peite biranatemi dzube abi mina ma Dzuta abi mimi nokoi noho toro bitanateqi Pauroho noo pobi hiireta. ³Hee, nii nanahoke nooka isanatemake hiire Pauro Dzerusaremuta biranatare pobi hiibare. Oiqi hiireta oi noko teteta qaa mooto Pauro teetare qupadzomaqi oke kiape pobi hiireta.

⁴ Hiiremi Pestoi erake hiireta, Pauroi Kaisarea nagapata sutasutata orakoi oonihe ana paha hairiaamake burisi eete ota quratakoi. ⁵ Oonita nike Pauroho kahosa noo hiibareiqa anama gama qurate hiibare. Hiiremi mee eetaqu mae baamu. Oiqi hiireta.

⁶ Oonita Pestoi qupi 8 oni mae 10 oke Dzerusaremu nagapata ooqi Kaisarea nagapata qurateta. Iihai mootomi noi noo qohareta peiteqi hiiremi Pauro aima peiteta. ⁷Peitemi Dzerusaremu nagapa nena Dzuta abi noko rome biireqi bedzabedza eete Pauroke qomaqoma hirota. ⁸ Oonihe qomaqomaho mee te biiranatara. Oi Pauroi noo nokohoke ai qurateqi erake hiireta. Maqa, Dzuta abi nikohu noo mae nikohu qaheuba Biiri mae Roma abi qiba oi te anake qomaqoma hiiremi isanatoraidzara.

⁹ Hiiremi Pestoi Dzuta abiho ttidza qidzaqidza quba Pauro qasa hiireta, Nii isanate Dzerusaremu nagapata tuumaqa ota noo niime hiire uhutaqu mae?

¹⁰ Hiiremi Pauroi hee, Baamu. Roma abi qibaho noo qohare oi eraqanita naho noo erata hiire uhutare. Nii niimae naho khooba gesina naatemi ana Dzuta abike quba qanga teeke eetara. ¹¹ Ana honga ma kahosa mina teeke eetapuko hiibarori. Teetare hiiremi ana sama name baamu qanatarori. Nokoi obera qubake qomaqoma naho hioraita apei nokoho ttidza qidzaqidza quba eete anake nokoho botota mootaqu, baamunipamu! Oonita anai Roma abiho pobita Roma abi qibake noo nameke hiibareiqi hiibi.

¹² Oke Pauro hiiremi Pestoi qeraqera eeteqi sinasina abi nomema noko hiire qaasuqi Pauroke pobi hiireta, Abi qiba Kaisaho quba hiire oonita isanate nii abi qiba noho toro tuumare. Oiqi hiireta.

PESTOI AGIRIPAKE PAUROHO QASA HIIRETA

¹³ Oonita ete bodza qesa baamu naasumi abi qiba gattiqi Agiripa ma Benike nopo ipai keke Kaisarea nagapata qurateqi Pestoma nokoi qesa dzaira eeteta.

¹⁴ Obete nopo noma oora ma qaara eesumi Pestoi Pauroho noo ma pobike Agiripa eraiqi hiireta, Perikhi noi sutasuta abi teeke qaate tuumami oorai. Oonita ana Dzerusaremata peiteta. ¹⁵ Peitemi dzube abi mimi ma bosa qobaqoba nokoi naho torota ttutturate anai abi oke teete baatareiqi ana pobi hiireta.

¹⁶⁻¹⁷ Oke hiiremi anai bai hiiremi Dzuta abi paha quesai anama nagapa erata baahumi iihai mootomi anai no ma noko gama dzeima noo qohareta tuumata. ¹⁸ Eetemi noko Pauroho pasena khooba teeke paanaitare hiimi ana moohimi oi mainata tuumata.

¹⁹ Oi noko sinabidza nokomeho quba kurebeteta. Ma abi baateta teeho dzapa Dzesu noho dzapake aimi hiireta. Abi oo hoke Pauroi eraiqi hiireta: Abi oi ao qori oorai.

²⁰ Oke hiiremi ana noo oonomaho quba hou eeteqi hee, Pauro nii Dzerusaremua nagapata peitemi ana ota noo niihoke suhe hiumare, oke anai noke pobi hiireta. ²¹ Hiiremi Pauroi Roma abi qibani pamu noo nome suhe hiumare hiireta. Hiiremi isanateta oonihe Pauro tuumaquho bodza naatemarka ana hiiremi Roma abi qibaho toro tuumareiqi noke sutasuta nagata mootomi beebe oorai.

²² Oke Pestoi hiiremi Agiripai hiireta, Abi oi noo teeke hiire ana nookare dza eete. Hiiremi Pestoi hee, Isanate iihaike niimae noo nookare.

²³ Oonita iihai mootomi Agiripa ma Benike nee ma bau nopomema garuba nagata peiteqi qaa soopara mimi ma nagapa oho abi gama dzeimaqi peiteta. Peite soubiremi Pestoi hiiremi noko Pauro ai peiteta.

²⁴ Peitemi Pestoi noo erake hiireta, Dzoobe abi qiba Agiripa ma abi gesamane name ana noo hiire nika nookare. Abi erana qoro oorai noho qubake Dzuta abi adzapei Dzerusaremua nagapata sookate bedzabedza

eete eraiqi hiireta, Noi baamu ooraqunipamu oni! ²⁵Oonomake hiiremi anai noho kahosa qiri eete qupadzomami noke teete baataquho isaki baamu. Oonihe noi Roma abiho qiba Kiasaho qubake hiiremi oho qubake anai noke noho torota dzoobire tuumakoi.

²⁶Oonihe ana noo mee qiri eete abi qibaho quba dzaira pepa qeetare hou peu eesubi. Eetemi oho qubake abi erake abi qiba Agiripa ma nikeho quba qaasuhimi nikiei khooba noho saridzemake ana noo noho qeetemi tuumare. ²⁷Oi anai abi teevo noo ma kahosake qeetaamake sepeke dzoobire Roma nagapata tuumaquho teteke ana isanatamani. Oke Pestoi hiireta.

PAUROI NOO NOME AGIRIPAHO TOROTA HIIRETA

26 ¹Oke Pestoi hiiremi Agiripai Pauro pobi hiireta, Oionita niimae khooba niime hiire nana nookare. Hiiremi Pauroi boto nome dzoobireqi noo erake noko pobi hiireta. ²Hee, Ao Dzuta abiho nooi anake qomaqoma hiirorai oho totaqike poike abi qiba Agiripa niiho pengata hiibareiqi naaho qupa qidzanate.

³Oi teevo bahe ana nookami nii dzuta abi nanaho sinabidzaho kurekure ma quba eetoraiho khooba gesina. Oonita nii nookamake ana noo name hiibare.

⁴⁻⁵Ana bittina nameta Dzuta abi qesamane nameho bisata oora ma qaara eete bitotoqi Dzerusaremata baa qaata oke noko gama gesina. Pariseo sinabidzaho nanemane gotta naate qaata nokoma nanai qaataho khoobake noko noo nooka qaaqi oke ao mee hiibarorihe baamu.

⁶Anai sutasuta nagata oorai oi quba teevo quba bahe, Ohongai uimane napahoho naru hiireta. Ma sau samane Ohonga kiridza ma qonoqono qeere qaibi. ⁷Oonita abi qiba name ana noo ooqaho ttidza dzebidzebi nokoi anake qomaqoma hiirorai.

⁸Oi Ohongai abi baatetake tukutorai, oke nike naane qubake nookami quba eetaamaho isaki naatorai? ⁹Oho qubake ana namaehoke hiire nike nookare.

Anai Dzesu Nasarette nena noho dzapake ngausa eetare oho baurake name eete qaata. ¹⁰Dzerusaremata nagapata ana oke eetota. Eetoqi dzube abi mimi nokoke qasa hiiremi gee tatanga ana moitemi ana sobasoba tupu adzepeke teete sutasuta naga samaneta mooto qaata. Paha abike gabehoma teete baatareiqi noko boto peitemi naaho botoi oho qesa peite qaata.

¹¹Oi ana Dzuta abi nokoho sinabidza guhu samaneta peiteqi hee, Sobasoba tupu nike Dzesuho dzapa benatorai dzapa oke noko poiqa ngingi ma peranomake hiibareiqi ana bedzabedza eete hiire qaata. Anai paha qaa battigarake naate nagapa kharanipamuta tuuma nokoke teete sigubire qaata. Oke Pauro hiireta.

PAUROI IKANOMAKE EETE KIRISTUHO POBI NAATETA
(Apo 9:3-19; 22:6-16)

¹² Pauroi hee, Anai tete oonoma eete qaaramuti dzube abi mimiho toro peitemi nokoi pepa tatanga ana moiteqi hiiremi ana Ttamasiko nagapata tuumareiqi tuumata. ¹³ Ana tuuma qaami ete bisana naatare eesuhimi qusu neta dzadza qurateqi ana ma abi anama tuumota nanake rome biireta. Oboboo! Abi qiba name, ete dzadza oi saparaparanoma, dzadza mootai minanipamu!

¹⁴ Obetemi nana ttokata taate oomi totoho teei Dzuta abiho noota hiireta, Sauro, Sauro qoe! Nii naane quba ana teete iihoraidzo? Nii qidzoke sama niimeke bagara biire qaaraqu. ¹⁵ Hiiremi anai hee, Ohonga name nii ape oni?

Hiiremi noi hee, Nii Dzesuke teete iihorai anai oni. ¹⁶ Oonihe nii nahoke moohibi ma paha ana ipita niike banaitoraqu oke nii qaupuiteqa nahoh qaru eete qaarareiqi ana isaki name niike banaihibi oonita nii ao qori qoobare.

¹⁷⁻¹⁸ Oi ana niike dzoobiremi nii raaba abiho toro biranatem i nokoni mae Dzuta abi nokoi niiho qaa mootomake ana niike herohero eetakoi. Oke eete qaama raaba nokoho nese uhubami nokoi qupi nokome tume biireqa Saataho eka kuibire Ohongaho botona naate kahosaho dzamudzamu saridzakoi. Kahosaho dzamudzamuke saridzeqa quesai ao anake nooka tani eetorai nokoma gama qidzata qaarakoi. Totoho oiqi hiireta oke Pauroi hiireta.

PAUROI BAURA NOME AGIRIPA BANAITETA

¹⁹ Pauroi ipibireqi hee, Oonita abi qiba name Agiripa, ana qusu neta noo oke nooka qusubaiteta. ²⁰ Oi bosata Ttamasiko nagapa abi ma Dzerusarem nagapa nena abi ma paha Dzuta haba maikhameto nokoi keke bahe raaba abi gama qupa nokoho burisi eeteqi Ohongaho toro atimaqa noho botota oho mee qidza saridzare anai sinabidza pobi hiire baaorai.

²¹ Ooqaho qubake Dzuta abi nokoi Biiri nokometa ana aimaqi teetare eeteta. ²² Eesumi Ohongai ana hohoba eete baaqoraimi ana sinabidza hiiretai hiilorai. Hiireqi abi mimi ma gamitti gama pobi hiilorai.

Oi noo agiagi bahe, Mose ma too abi hore noo hiire noo qeeteta paasa oke hiilorai. ²³ Oi teeho bahe Kiristu noi heme mooqa baatarae hiireta. Paha, baateqa oho neta bosa qoro qoridzemake dzadzaho tete nohoi Dzuta abi ma raaba abi nokoho torota biranatareiqi nokoi hiireta, noo oke ana too teetorai.

AGIRIPAI NOOKA HIISSI EETAREIQI PAURO KOSIBETETA

²⁴ Pauro noi khooba nome hiire pobitapihimi Pestoi noo minake hiireqi hiireta, Ae, Pauro, niiho qupa rasaki naate. Pepa minake qeetemi oorai oke isaite qabarobaro naatorai oio.

²⁵Hiiremi Pauroi hee, Abi qidza name Pesto, ana qupa rasaki noo bahe, noo mee, noo attinoma hiirorai. ²⁶Noo oho khoobake abi qiba Agiripai isanate nookorai, noho torota ana adzahaha naateqi hiirorai. Quba ana hiirorai oi dzukudzukuta te biranatara, oke ikanomake eete ruume naataqu?

²⁷Oke hiireqi Pauroi temuke dzaga bobotoqi hee, Abi qiba Agiripa, nii too abi nokoho noo nooka hisi eetorai mae? Ana qupadzomami nii nooka qupadzomorai kaqani.

²⁸Hiiremi Agiripai Pauro qepuqepu hiireqi hee, Ae, nii bodza hoteqa teeke noo oonomake hiiremi ana ao Kiristuhu abi naatake boobi mae?

²⁹Hiimi Pauroi hee, Bodza hoteqani mae khara, oonihe Ohongaho pengata ana dza eetemi nii keke bahe abi quesama nike poiqake noo erana nookaidzo, nikeke Ohongai hoobiremi anaho qesa naatareihi hiibi. Oi sutasutahoke te hiibidzaranahi sinabidzahoke hiibi.

³⁰Oke hiiremi abi qiba Agiripa ma kiape Pesto ma Benike ma abi qesa noko qoridze ao biranateta. ³¹Biranateqi qesa pobi pobi hiireqi erake hiireta, Mmhm, Pauro eetorai oi te teeta ma taangaho pobi oonidzara.

³²Ma Agiripai Pesto erake pobi hiireta. Abi noi Roma abi qibnipamu Kaisaho torota noo nome hiibareiqi hiireta oke hiibaama naatapuko nii isanate noke saqoromi tuumarorihe baamu.

PAUROKE SISIMATA MOOTOMI ROMA ROBETA TUUMATA

27 ¹Oonita Itaria habata tuumaqu bodza dzamo naatemi kiape hiiremi Romaho qaa soopara tee, dzapa noho Dzurio, noi Augustuhu qaa mimiho hohota tee onita noi Pauro ma sutasuta abi qesa aimaqi sisimata peiteta. ²Sisima oi Attaramitte nagapa nena, oi Asia Gattiqaho nagapa unauna ttarita oota, ota tuumare hiiretaho isaki. Sisima ota peiteta, Maketonia abi teeho dzapa Aristako, Ttesaronike nagapa nena, noma gama tuumata.

³⁻⁴Oonita iihai mootomi sisimai Sitto nagapata unatemi Dzurioi Pauro dzaira eeteqi nookami nagapata peiteqi quesamane nome noo hiiremi teteho heeba ma apo moiteta. Qate sisimata paha peitemi utai tuumota neta baami nanai Kiporo sunga ma Asia habaho takurata tuumata.

⁵Tuumaqi Kirikia ma Pamuria haba girodzoma qaaramuti Rikia habata nagapa Mira ota biranateta.

⁶Ota Aresattiria nagapa neta sisima teei oota. Oi Itaria habata tuumare eetemi qaa sooparai nana aimaqi ota peiteta. ⁷Peiteqi kebanqake tuuma Kinita nagapa oota neta biranateta.

⁸Paha utai nanake ai burisi eetemi nagapa oke tuume biireqi Kerete sunga ma Saramo sungaho takurata tuumata. Kaipoke eete tuuma qaaramuti sunga oke riiteqi kebanoke Rasa nagapa samaqata besa khata tee oota, oho dzapa Unauna Qidza, ota nanai dzuubaqi oro (aga) biireqi oota.

⁹Ooqi besata bodza kharanipamuke tuuma qaata paha bapamu bodza dzamoqa naateta, oho quba Pauroi qogo noo hiireta. ¹⁰Hee, Maimane name, kabira dzubetaquho dzuma aoke bamu naatemi bapamuho bodza dzamo naasubita eto tuumaino. Tuumaquko ana qupadzomami napaho sisimai huhunaatemi quruma keke bahe, abi napa gamaqa besata quratainoho qubake ana iihha ma dzoobidza eete.

¹¹Oke hiiretahe qaa sooparai Pauroho noo nookaama naateqi sisima soopara ma sisima maikhata nopoho noo qusubaiteta. ¹²Oi teeho bahe oba iruru moomi sisimai ota bapamu bodzata isanaate ooraquho isakiama naateta. Oonihe Kerette sunga oho besa khata paha tee, dzapa noho Poiniki, oi oota oonita ota dzuuba ooma bapamu naataqu mae baamu oiqi hiireta. Oi besa khata oho puita sisima dzuubaquko uta dzagana toobaqu bodzata bamu sisima sesero eetequ oke qupadzomata.

BAPAMU MINAI TOOROTA

¹³Oonita nanai beebe eete oomi tume nanahota uta oberai tooromi sisimaho abi tuumare hiireqi oro (aga) dzeimaqi Kerete sungake girodzoma tuumota. ¹⁴Oonihe tuumomi dzaga neta uta minanipamu toorota dzapa noho Dzagana.

¹⁵Oi tooroqi sisima suqobiremi tuumare biita eetoramuti qaatemi ai qee ma baa biireta. ¹⁶Biire tuuma qaaramuti sungahoho gattiqi tee, dzapa noho Kautta, oho tume neta qeehiqi kaipo minake eete sisima qaanateta.

¹⁷Qaanate eetoramuti botti nohoke dzeima pei neta teenaita suutota. Oonihe, sisima omata rubenga naataino hiireqi ngibira mimima suutota. Obete poodza teeho dzapa Siriti ota sisima ngausa naataino hiireqi parai qoqobiremi qurahimi utai nanake ai qee ma baa biiremi tuumata. ¹⁸Ma uta tatangai toorotaho qubake iihai mootomi nokoi quruma quba quesake besata biiremi tuumata.

¹⁹Paha iihai mootomi sisimaho koo ma tanga topoto biireta. ²⁰Oonihe qupi samaneho nakuta uta minanipamui tooromi ete ma pomatti teeqai te biranataama naatemi qupa nanahoi togo eeteqi hee, Qidzanataquho tete ao baamu naate oiqi hiireta.

²¹Hiiremi abi nokoi patta qaate qaami Pauroi tuuma bisa nokohota qoroqi eraiqi hiireta, Dzairamane, nike noo nahoh nookapuko hapa Kerete kusuta ooraropu. Oorapuko quba attinoma ma quruma sesero erai baamu biranatarori. ²²Oonihe nike eto atti ququmaino. Abi napai baamu dzaetaquhe sisimai meenipamu rubenga naatakoi.

²³Oi Ohonga apeho qaruke ana eetoraimi ana raraku biirorai noi angero nome qupibake dzoobiremi nahoh torota biranateta. ²⁴Biranateqi erake ana pobi hiireta, Pauro, nii eto atti eetaino. Nii Roma abi qiba Kaisa noho toro biranatanipamuke eetakoita nookare. Ohongai niiho quba eetemi abi niima sisimana oorai nikei gamaqa isanatakoi.

²⁵ Oiqi angeroi hiireta oonita dzairamane name, nikeho qupa qidza naatare. Anai Ohongaho quba te qupa naho esei naatoraidzara, noo ana pobi hiiire ooqai biranatakoi. ²⁶ Oi sisimai suunga teeta peiteqi huhunahimake napai unatakoi. Oiqi Pauro hiireta.

²⁷ Obetemi Attiria besata qee ma baa peite oomi cupi ma ete 14 naatemi saubapota sisimaho abi noko qupadzomami haba dzamitoraiho isaki naateta. ²⁸ Oke qupadzomaqi isakike dzoobire quratemi isaki noho 50 mita naateta. Eetemi paha qeehiqi isaki dzoobiremi ao 20 mita gattiqna naateta. ²⁹ Oonihe podzata peitainoiho atti eeteqi sisima ipita oro eserisa eserike biiremi quratemi iihai mootare hiireqi pupu hiirota.

³⁰ Hiromi sisimaho abi qesa nokoi sisima qaateqi atti tuumare qupadzomaqi botti gaubiremi qaratemi ikobeteqi eraiqi hiireta. Nana sisima bosata oro teeke biidzareiqi quratakoi. ³¹ Oke hiiremi Pauroi qaa soopara ma abi nome erake pobi hiireta, Sisimaho abi atti tuumami nike besata quratakoi. ³² Pobi hiiremi qaa abi nokoi botti eka geemami besa aimaa tuumata.

³³ Obetemi iihai mootare beebe eeteqi Pauroi abi gama susupu eraiqi pobi hiireta, Nike patta muunaamake oorami nikeho ttidza ma sama dzopa eetorami ete 14 baamu naate. ³⁴ Oho qubaka erata patta muunare hiiremi nike eto bai hiibaino. Patta muunaqa isanate qaama unate oorakoi. Oi nikeho oko ma boto khata teeqai bamu uhubaquhe gama isanatakoi.

³⁵ Oke hiiire soubireqi dzobadzoba teeke aimaa Ohonga dzoobe hiireqi qootoqi nokoho neseta muunata. ³⁶ Muunami noko moomi qupa nokoho uhubami oho qesa muuna soubireta.

SISIMAI RUBENGA NAATETAHE ABI ISANATETA

³⁷⁻³⁸ Qate abi sisimana oota dzare nokoho 276. Oonita patta muuna isanateqi eringa mutu sisimana oota oke gama besata biiremi sisima adzahaha naate heena naateta.

³⁹ Iihai mooto paana naatemi noko haba moomi ipi bosa naateta. Naasuhimi besa amena teete podzaama mooqi sisimai igasa ooqata unatareiqi, ⁴⁰ abi noko oro (aga) eke geemami besata quratemi birisa saqoroqi parai qusubaitemi uta aimami tuumata. ⁴¹ Tuusuqi ttoka heena naasuhimi sisima bosai kattiboto tatauhimi besaho pouma minai sisima ipike ngausaiteta.

⁴² Oionita baka huhunatemi sutasuta abi nokoi atti qosebetareimi qaa abi nokoke teete kebaitareiqi hiireta. ⁴³ Oonihe Soopara nokohoi Pauroho quba dzasa eeteqi qaananateta. Qaanateqi hiiremi qoseqose abi noko besata taateqi qosebeteqi unateta. ⁴⁴ Qate quesai ee sabina aimata ma sisimaho sabina heeta peiteqi tuumata. Oke eeteqi gama susupu tora aimata.

PAURO MA QESAMANE MARITA SUNGATA OOTA

28 ¹ Unate soubireqi suunga oho dzapa Marita hiiremi nana nookata. ² Nookami suunga oho maikhamento noko kokora

bagenomanipamuke nanake eeteqi quu ma dzapaho quba eepa minake
qeere qaitemi nana agimata.

³ Agihiqi Pauroi kau susu ttuttuiteqi eepata biihimi oho nakuta
dzootata gaama baataqu teei piruparama biranateqi Pauro botota
gaamaqi qeegoro oota. ⁴ Eesuhimi haba oho maikhamento noko dzootata
mooqi qesa pobipobi hiireqi hiireta, Noi abi gairurunomanipamu noi
besata qurate baatarorihe unateqi ipi nomeke ao era saridze.

⁵ Oiqi hiimi Pauroi dzootata kuima eepata biiremi dzootatai
gaamaamaho isaki naateta. ⁶ Qooroqomi noko mooqi hee, Biidzaqu mae
hairiamake taate baataqu mae hiireqi mooqota. Mooqomi tee ma teeke
eetara oke mooqi hee, Abi noi Poro gootta ooniqi hiireta.

⁷ Qate nanai qaata oho dzamonoqata abi qiba nokoho dzapa Pobirio
noho haba ma nagapa qaata. Eetemi abi oio nana dzoobe ma kanakana
hiiremi nana noho nagata peite ete taparike qaata. ⁸ Qaami Pobirioho mai
khetedza naateqi dzuu topotota. Topotomi Pauroi nookaqi naga nohota
peiteqi qiba nohota boto mootoqi pupu hiireqi qidzaiteta.

⁹ Oke eetemi suunga oho abi pobi nookaqi abi qesa heme ma
bamenomai biranatem iqdzaiteta. ¹⁰ Eetemi oho ipike abi nokoho qupa
qidza naatemi kokora ma korakora minanipamuke nanake eeteta. Ma
tuuma bodza nanaho dzamo naatemi kiridza ma qonoqono teteho heeba
ma quba sisimata mootota.

PAURO MA KARA ROMATA BIRANATETA

¹¹ Oi sisima ape bahe Aresatteriaho teei bapamu bodzaho isakita ota
(aga) biiremi qaata oonihe sisimaho koko bosanata neemi noma ma nane
teeho gisigisike qabitemi oota. Oonita nanai kusu ota dzasidza taparike
qaaqi sisima ota peiteta. ¹² Peite tuuma qaaramuti Siraku nagapata
biranateqi ete taparike ota qaata.

¹³ Oneta uta moiteqi girodzoma tuuma qaaramuti Regio nagapata
biranateta. ¹⁴ Obetemi iihai mootomi tume nanahota uta tooroqi nana
huitemi qupi ma ete tapariqake tuuma qaramuti Puteori nagapata
biiranateta. Ma oonomake eete tuuma qaaramuti Roma nagapata
biranateta.

¹⁵ Obetemi nagapa oho nohanoka abi nanaho pobi ao nookaqi baa Apio
oho qohare ma aabe naga tapari nagapa ooqata nana saridzeta. Saridzemi
Pauroi mooqi Ohongaho hasa hiiremi noho qupa qidza naateta. ¹⁶ Oionita
Roma nagapata biranatem kiapei hiiremi Pauro sutasuta nagata te mootara.
Qaa abi teei noke soopara eetemi naga sepe teeta oora ma qaara eeteta.

PAUROI ROMATA SINABIDZA PAANAITETA

¹⁷ Oonita qupi tapari naatemi Dzuta abiho bosa qobaqobaho quba
hiiremi ttutturatemi Pauro noo erake noko pobi hiireta, Dzairamane, ana

Dzuta abi qesa nameke te dzakidzaki eetara ma uimane napame nokoho noo te riitara. Obetemi abi noko anake sepeke teetomi Roma abi noko ana ingonaitareiqi Dzerusaremu nagapata sutota. ¹⁸Suutoqi Roma abi nokoi kahosa nahoho qiri eete saridzama naate saqobare hhireta. Oi noko moohimi anai teeta ma tangaho pobiamaa naateta.

¹⁹Oonihe Dzuta abi quesamane napame nokoho nooke erata aimaa baa hiibareiqi ana te oho quba baabara. Oonihe nike nooka quba ana nike dzeimami baabe. ²⁰Nokoi agobake Ohongai Kiristuhoke hhiretaho mee biranatareiqi Isirae abi ma napai gamaqa oho beebe eete baa qaata ooqaho qubake noko anake ngibira erama suutomi oorai.

²¹Oke hhiremi noko noke pobi hhireta, Eo qee Dzuta haba khooba napameta oorai nokoi niiho noo te nanaho quba qeetara ma abi nokome te dzoobiremi baa niiho kahosa noo hhiremi nana nookara, baamu. ²²Oho quba nii noo aimaa oorai oke niimae hhire nana nookare. Oi nanai nookami Dzesuho tete iihoraiho abike haba samaneho abi ibo ma kote eetorai.

²³Oke hhireqi nokoi bodza mootota. Obetemi oi dzamo naatemi Dzuta abi samanei Pauroho nagata ttutturateta. Ttutturatemi noi saunabake sohoroqi sinabidza hshireqi Ohongaho pobi oke hshire paanaite qaami qupi soorota. Eetemi noi Moseho hu nooho qiba ma too abiho geeta qeeteta oho neta Dzesuho mee paanaiteqi qupa nokoho kebaitare hhireta. ²⁴Hhire qaami abi qesai noo nohoke dzaira eeteta, qate qesai oke ibo eeteta.

²⁵Oonita noko qesa kurebetemi Pauroi teena erake noko pobi hhireta, Qaheuba Sumassai too abi Dzesea pobi hhiremi uimane nikehoho quba meenipamuke qeeteta.

²⁶Oi hee, Nii tuumaqa abi tupuke erake pobi hiibare: Tomama nookareiqa nookakohe baamu tete qupadzomaqu, nesema moorareiqi moorakohe qidzoke moo pobitaqu. ²⁷Oi abi tupu eraho qupai tatanga naatemi toma nokohoi susudzatemi nese nokohoi qupi sororai. Oonita qidzoke nokoho nese tete mooraqu qidzoke toma nokohoi noo nookaqu, qidzoke nokoho qupa uhuba burisi eetemi anai noko qidzaitaqu oiqi qeeteta.

²⁸Oho qubake Pauroi hee, Ana nike pobi hshire nookare: Ohongai korakoraho tete saridzeta. Oi ao Raaba abi nokoho pobi naatemi nokoi isanate nookaqa qidzanatakoi. ²⁹Noo ooqake Pauro hhiremi noko ao sakaba tuumata.

³⁰Oionita Pauroi Roma nagapata tii eserike ooqi naga noomae ttuma eetetata oomi abi noko noho toro biranate qaami noi tee ma teeke tete siibara. ³¹Noi Ohongaho noo ma pobi hshireqi Soopara Dzesu Kiristuhoo noo khooba attiamake hshire paanaite qaami sesero ma dzakidzaki te ooqata biranatara baamu.

Noo oidzoni
Anai Ttotta Ruka